

TORTURED FOR CHRIST

Richard Wurmbrand



Ishi Jisu
Khristo ghenguno
Ghimekeu

By Richard Wurmbrand

Foreword by
The Rev. W. Stuart Harris, F.R.G.S
(General Director, European Christian Mission)

Translated by
Nikheto Sema

LOVE IN ACTION SOCIETY
P.O. BOX 4532, NEW DELHI-110016, INDIA

"TORTURED FOR CHRIST"

(Sema Naga)

by

Richard Wurmbrand

© Richard Wurmbrand

Copies 5000

1991

Printed and Published by Evangelist Dr. P.P.Job for the
Love In Action Society at Sabina Printing Press, Faridabad,
Haryana, India.

To

REV. W. STUART HARRIS, GENERAL DIRECTOR OF THE EUROPE CHRISTIAN MISSION, LONDON. Khu-u atughushi 1964 mpelo akughukilono ipeghino ngoakelo Europelo khristomiqo pethapesu Romanialoikilo ighikeno. Putholono avekusashi ighino ikibolomilau kimiyeku, lokughuno eno nimulo shikumtotsuke ghenguno; nighi imulo kumutsu pesuno shikimithikeu petha tsupu-u ani.

HUKUTHUTSA

KUSHIYE KAKU HIPAU YETSUKENO

Ino alokughunoshi akeu kukuhou kumutsulau imeakeu tuqhou kukuhoulauno asutsa kivi nongulau sughiani. Ino adokushowa ime mla ighivekeu kukuhouno kuqhakulu shiluno ipulono ashou kighithe ipeghino asutsa hipaupesuno nongulau yelupeke ghenguno.

Kaku hipaulo akichiqhipu kumla shilukeu kutomo ani. Alhou no kishino ipulono akuxu achilishi aghino akukuhouqo sasu kuthulupekeno. Kaku hipaulo akhotouye ikuxu shepe kishi ikupulu ghenguno communist yeghilo imeighi eno akukuhoulo mlaighikeno, itaghi tuqhou kukuhoughi kishi mlaighikeno hami ithulunani.

AKIYE-U GHILI

Rev. Richard ye evangelist lakhi, paye ampe 14, kutolo communist kughukilo ache tiye pano yeghi Romania kughukiloke. Pakughapesu akughulo suvekeu akhotouye Khristo pulukeu ghengunoke, tinguno alau paye Romania ghakhulo Khristomi dolo sakiphe mi atughu-u, kighithimi lakhi eno kaku kihemighi lakhike.

Kughono 1945 mpelo, communist mino Romania qhasuluvono ayepeuvpekeno Khristomqo aghime tsuthuve eno tithiu akukuhoki eno tinhemugha kumutsu shipusa hekutsulu vetsukeno Rev. W. Wurmbrand ye Khristomiqo imeakeu kuphunike ghenguno tuqhou kukuhou huthuve. (under ground Church) Ikemu paghi 1948 mpeloye kughaluvono akughulo akughuki kututalo qhiveke ghenguno kujuthu kilemlave. Rev. Richard ye akughuki ayeghiqhou kiumo ithumlakeu zumoikeu alo qhive akughu khemi unguno alauye eno tishino ampe kuthu thiuye amipe pungu kughu ghenguno a-a kutaughive, tikutolo paye aghime tsususu ighike.

Paye Khristo sakiphe tomikeghenguno ayeghiqha kutami eno Foreign diplomats qono paxaphenike ghenguno Communist mishika lau qhuiniju ikemu paye Romanialo kuhaveaipi pishiqhive eno panipu viloghi paye thiveapi piveke ghenguno ayeghiqhalo khristomiqoye paghili adokushowa kughamove, ikemu tishiwo ampe akutacheu lo pakhaqhi phevakethiu paye itaghi ipe tuqhou kukuhoulo mlathuveke ghenguno itaghi kughaluvono tithiuye ampe 25 kughu ghenguno ghive. Tithiughi akuzupu ghenguno 1964 mpe loghi khaqhipekemu pano tamomitheno ipe shipu eno akughukilo

ilovenanipi ithipulaghino, Ampeu shepe shitsu ike kuchono paye ashekhaushi kughaluvono akughushive.

Ike Norwaylo Khristomiqono pakhaqhi phenike ghen-guno Communist mishika sasukuputsa ikemu communist mishikaye hipaughulokilo akughumi lakhilo Rs. 16,000 meshia, tighenguno Rev. W.Richard ye Rs. 50,000 no ametsuno xapheluke. tithiu paye 1966 May, qhilo American yeghilo Washingtonlo ighi eno pakuxu shepetsuno pazaku 18 kutol-opiyekelo American yeghi, Europe eno Asia yeghiqha kumutsulo paghili ighono ajekipishi kughathuvekelo communist mishikano paye kughape Sept. 1966 mpeloye pithe venikeushi azah tsuve. tishimu paye akithi tipaughu musamono tamomitheno tuqhou kukuhou ghenguno mlauvekelo Khristomi qono papesuno. "AYIKUMUTO KUPULU " eno Paul akiniu shitsu.

AZU-U TSA

Niye Dec. 1964, lono atughushi Romaniaalo ighi azu-u Albania lokumoaye Europe ghakhu hi Romania loye wumono acheke, Ikemu. Alhouno mutsuqhei tilewunani pipuakeu ghenguno Rev. John Mosely sasu Hungary ghuthu kathasu Romaniaalo ighike.

Timi kumutsuno ninguye communist yeghilono ighikemipi nipulupusano tsaqui nijokuto jauve. Tishimu Romaniaalo khristomi qono akivishi ningu ikhiluno atughushi niasu German Baptist kukuho Bucharestlo, suluno Alhou shepeshi eno akuxu shepetsulu peke, akukuhothiu timi kutomono niasu kuputsanishi akemu putho ayi 10 kiheloye chesusu Rev. W.Richard no ngo akeukilo ighi. Ninguye aqhouno itsususu vezhoi Rev. Richard no ngo akeukilo ighi kughengu ninguye azuuno paghili akivishi ithiake ghenguno, ikemu nino ighivekeu ithiveno akitipau khalau police mino chitoi veholuve eno ithamono nikheauve, tishimu ninguye akivishi pasasukuputsa eno pano paghimeghili nivilopi eno pazakuqo ni akivishipiyeno kumutsa akighini shiveno ninguye khalau ipeghikelo Alhouno akumuzapu ningulau mlake, tiye police miqo nhethi kighi chevetsuno panongu khunomu niju ithumlano ningu ye vejoi nilalo cheve.

Hiye nikuxulo pujushijukeu atughu-ushi Alhou kibolomi paghenguno akuxutsu mlachekemi sakiphemi sasukuthuluke, hiye nikupulughi alau shikumutolukeu eno ipulono kaku hipau yekeulo ikighini eno anguagha betsulughi yelupeke. Kaku hipau philukemikumutsu Alhou ghunguno putsano communist yeghilo Rev. Richard eno khristomiqo kiutoi

imevekeno ithipeniyenoke.

Hiye Khristono akukuhou ghenguno kishi paphimipi imevekeno pa kuyu piyekeuke. Xuakeu Lhou pulono phikulumi kumutsu kumughatsu apeni.

The REV. W. STUART HARRIS, F.R.G.S.
(General Director, Europe Christian Mission)

PEKIDETSU KEU SUTSA

Akigheu lono Ampeu Alhou shikimithi ani. Love in Action Society no azah itsuno ipulono kaku hipau timi tsauno Nisumi tsalo pekidesulu peke ghenguno. Kaku hipauye akhonto Rev. Richard Wurmbrand ghilike, itehi paye amipe 82, shiani. Paye Communismi Kughukilo amipe 14, pakupulu phemokeu ghenguno ache, paye akughu kilono ipeghiveno ayeghiqha kumutsulo Alhou shepeshi khristomi shikumutotsu ani. Ikemu paye ado kushowa akughukilo ngovekeu eno aphilo aghime zaku 18, akeu ghenguno puthugho mlano iqano alhou shepeshi cheni.

Ino kaku hipau akhoto shivekeuye Rev. Richard nguno alau khristomi kishi communist kughukilo imevekeno philukelo ighono imulo buvetsuno pekidetsunike ghenguno ilokumususu shive. tishino ino kughono kaku hipau kumla huthuvekeno ado akichiu lono inhezu ipeghi ikupulu alau heshelu.

Kaku hipau phikulumiyo pulo akupulu alau shikumuto luno KISHI Communist yeghilo khristomi imeanikeno, eno nikuxu kishi Khristo ghenguno imemoaye sakeno, tinguno alau Alhou kumla kutomo akeu ithipenike ghenguno yelu anike. Kaku hipau phikulumi kumutsu Alhou ghunguno putsa nanipi ino ikighini betsuani. Akighini lono philo.

Tamono Rev. W. Richard , panipu Sabina eno pagholo mla kuqha akemi ghenguno inikhutsulo. Communist yeghiqhalo nguno alau akuaqha kutauloghi akupulu kuxu ghili eno alhou shepe alau shilu apenike ghenguno.

SHIKIMITHI TSA

Ino akiqheu lono nibolomi Inoli N. Akheli shikimthi ani. Inoli no akibo makho kumtsu puluvetsu eno type kumla shikuphu, tinguno alau Inoli no shikipimi kumtsu akivishi phujuno kaku hipau pekide lupe. Akughushu Lhou no alau lono Inoli lau kumghakeu apeni.

Ino itaghi shikimithi keu pesuno Ino Akheto sema M.A. St. Stephen College eno Ino Ikishe Sema L.L.B. Pama tsu ani.

Pama dokivi kumtsu peveno kaku hipau ashekhau shi akivishi phujukide tsuno mlaphe lupeke.

Alhou pulo pama kuxulo alau kumghakeu shitsu peni.

Khristo Lono Aqeu

N. Nikheto Sema

New Delhi.

Alhou Kuha Pichekemino Khristo Puluvekeu

Niye achineyeh kuhakeu eno azah tsumokeu ghakhulono saputhu kemi lakhi. Tihenguno ino itimi shiakelo akupulu ghili phimo eno chimla. Tishino ampe chighi bidi shiakelo niye Alhou kuhaipikeu kighithi kutholo ilove, hiye ighono itimi kukhu kimiji kuxu lakhike. Itaghi niye itilono mighimishive eno akuxu vekusashive hiye aghushi atughu-u ghulok-ishiake. Hipaqa kuxulono ighivekehu niye Alhou eno Khristoye pulukeu kumono shipixiveni kughashi mithike eno hipauqhemi lono kichimi shisusu ithughike.

Ikemu ino athiu aloqhino vethalukeuye Alhou-u kupukini eno Pano ikulukeuye akimijikije eno ino ithikhawo tomulakeu kutomo ani. Ino Alhou pulumokemi shiaghimu ipulono akukuhoki kimiyelupeke, niye akukuhokilo ilokekumono vechewunikeughi ighono ighenguno shoke, niye akukuhokiloye kiushilopi achenikeno eno sermon lakhimu imulo putsalukepushimo kughengu ino mutsuqheino ithiakeuye Alhoukuha eno Alhou anipichekemiye niye mithike, ino puluchekeuye alokughuno hipau yeghilo khilekela anipipulu tishimu itilono kichimi kutolo niye alokughuno ithumla. Itehi ino kumusulukeuno kimiye kini Lhou kuha ipichekeuye amulokusapu lakhikeno; tishiwo atsala hamithiu ighungu aloqhino putakihiveke ghenguno Catholic kukuhokilo iloghi ike tile timiqono qhoqhunheno kiukenopi aqhike niqhi panonqu

gholo qhoqhunheno panonguno piakeu papeghi ghuthu kutomopi keuno akichiqhipu shinimalayeno, ike timiqoye akighinilo "Oh Mari, Kukumughau," ike nighi ghuthu kutomo hipaupi idea eno Maria julho qhipuakeulo jupuku ikemu ilaukiumo shimoke ghenguno niye ighono imlo kusashive.

Ghulo lakhi ino hitoi inikhu, Oh! Alhou ino mutsuqhei ithiakeuno noye kuha momu achemoe ikemu tsutsala nono xuakeu Lhou shiaghiaye ino opulunikeuye ikumlakumo ikemu nono ilau kiuano kichekipiye hamishitsulo? Niye ino pulu akeu chineyelo kiumo alokughuno phumlaveake. Atsala hamithiu Romania yeghilo aphu lakhilo muchomi asukum-lami lakhino ishi inikhu aghikeu inochilu, oh! Alhou niye oqe acheni tihenguno ayeghilo eno atsutsu kukaphulo asaxu itsumoaye sake ike tiye ipulono Judami lakhi likhimu olau saighimokeloye thivepekevilu; ikemu niye kitemi shivea eno kumlhomi tihenguno chewumla eno niphuloghi khu-unomu wukulumikuha ike Judami lakhi itsulo tishiaye ino papeithano okumla shinike. Alhouno ipulono aphu hipaulo ighilu-pekeuye Romania yeghilo aphu qhetonhe 12 akeulo Pakumla shipeniyeno, ike kughono ino amuchou tipausholukeno paye ighono alokivishi isunheluve kughengu niye Judami lakhikehu. Tishino Alhouno pakighini chiluvetsuapi ipulono phipenike Bible lakhi itsu. Nighi Bible kutau ghuthu kutomophi ighivea ikemu pano itsukeu gholakuta eno pano ivilo pikeuye pama akinanipuye ghuthu kutomo lpulono Alhou lauxaideighi penike ghenguno inikhu eno Bible khikhi itsukeno tiye anhezu kipijivecheo Aghungulono yekeuke. Bible hipauno imulo buve eno ino kughono phikeno niye Alhou kikimiye kimighi khamlaveno kumuzapushi qauve akhono ino ixineqo eno ino Pa mithichekeu kumsuchileluno. Hiye Alhou-u kupukini kijeke ighenguno Pa ikhiluno paushiluvepe keghenguno.

Tishiwo kushowa kumolo inipughi Alhoulau xaideighive

eno Lino timi kutami kutomo Alhou lausaighi. Tithiu Romania yeghilo Lutheran kukuhou alaushi ikowove. Ikemu adokushowa kumothiu Romania yeghilo Nazimi yekipedo ighiveno khristomi eno Judami kutomo aloqhino aghimetsuve. Hipau ghime sushonike ghengulikhino ipu Mihai ye Judamiye kutsumoke, ikemu aghime hipauvecheo nipulo akupulu alau shikmutolu eno pujushiju lupeke.

Ino Russia Yeghilo Atughushi Alhou Shepeshilukeu

Niye Alhou pulumokeu kuxulono ighikehu kughono ino Alhou pululuvekeno niye atughushi Russia yeghilo paghi Alhou shepeshinipi kumusu kughengu Russia ghakhuye alhou kuhapi shuphekeuake. Ike ino puloaketoi Alhouno ipulono Russia yeghilo Pashepe shilupeke ghenguno akhotoye Russiami suphahemi kutomo akughukilo akelono Alhou kumla kutomo shiluke. Ikemu akhotou Russiami apumi lakhi paye Engineer mulopepidetsu, paye atughuloye ivilo Alhou pulunikeuye ighono akhotoshi kumsuchemo ipiakemu, kughengu Timi hipaqo kumutsu communist chineyno khutivkemiokehu Alhou pulunikeu ighonosho akemu apumi hipau pesuno Khristolau saighiluke.

Niye Russia yeghiloye wukepushimo ikemu kughono august 25, 1944 mpelo Russiami suphahemi million lakhi Romanialo ighivekeno kushowa kumolo Romanialo communistno ayepeluve, hiye ighenguno adokivi Alhou kumla akumlashi shilupeke. Hipau ghulokilo Romanialo Timi Ihoxu million 18 ake, eno communistye ghetonhe 10 likhiakemu panono office kumutsu, ayekipe kumtsu panono akhotou shiluveke.

Communistmino Kimiyekeutsa Kini Peithakeu

Kughono communistno ayepeluve eno khristomiqo lau

kimiye keutsa jeli kinilono peitha, ike tiye totimi vilo "niye okimiye ani," inipu shini hiye kijili lakhi ghengu likhighi niye okimiye ani ipiluvi. Tighenguno Jisuno kupulumiqo vilo atsa hikuma kututashi ithipenike ghenguno tungutughano Bherimhi wunoighikeu kichepe piyeke. Kughengu Communist-mino ayepeuvekelo Pastormi eno Khristomi kutomono atsa hikuma kututa shimulaveno kupulumi kutomo pishiqhive, tishino Pastor eno achinetomi timi qhethonhe bidi kutolo zuluveno Jesoph Stalin pulono Khristomiqo congress shou Honorary President shivepe. Timi hipauye Alhou kuha ipikeu eno Khristomi heqhivenikeu shoughi President ke, eno tithiu khristomi eno communist yekipe kumutsa kulojiuve.

Hipau congress hoholo nikujo akinanipughi ake, ike inipuno ivilo; Richard noye puthughono hi akukujopu Jisu laumla akeulono tsughuvelo. Panonguye Jisu gilo musutepuku ani. Ike ino inipuvilo hitoi pive, Sabina; Ino tishiveaye noye akimi kuhavenia, niye inamo kimi shimonani tishino, ikemu Khristo Alhou likhi sheqhelo Alhou shepe hipau aqha kumutsulo kulha ikemu hipaulikhiye kiumoshimla. tithiu niye baptist congress Resita phulosuke, akukuhoki tipaulo soviet Union michiphi tsuqhipuani Baptist President no hitoipi, Stalin likhino Alhou zah kutsu kumutsupe kupulu ani. Paye Bible lo shikukatoughike. Ike achinetomi Patrascoiu eno Rosianu pamaghi communist qholo tuqhouno police kijemi lakhi shive, eno Bishop Rappye Romania Lutheran kukuhou shou Deputy lakhike, paye theology college loghi shika-a, ike pano shikakeuye Alhou-u piyekusu kuthu ani. 1. Mosa vecheono. 2. Jisu vecheono. 3. Stalin vecheono thokha kumutsu pephepiye ani.

Baptist kukuhou hipauye ino kimiyechekeu kukuhou kuchouke, akukuho hipauye Khristo ghenguno adokushowa imeighivea, tishimu Communismino qhasuluveno

akukuhouye kiukukamu kuhaveno Khristo zuqhulo communist miqo qeuveke. Tihutoi ishi kukuhoulo hitoikemi sakiphemi kutomo ani.

“AKHOTO” Akupuna hipaqo ghenguno RUSSIAMI kristomiqoye tuqhou kukuhou huthuveke, (Underground church) eno tishino nighi hipau kukuhoulo mlauve, niye hipauye ashou ikumla sasuno kumo kimighimla, kughengu niye Norwegian Lutheran kukuhoulo Pastor shia eno ‘World Council of Churches’ loghi akhotomi ampemi lakhishiake ghenguno timi kutomono ikumla kivighili ithia, ino mla akeu akhoto hipaqo:-

- a) Russiami suphahemi qhetonhe shou Alhou shepeshia,
- b) Norwegian kukuhoulo Pastor kumlashia,
- c) Tishino Romania loghi tuqhou kukuhoulono khristomiqo akughulo akemiqo kuphuake.

Russiamino Alhou Tsa Mineakeu.

Ighenguno Russiami lau Alhou shepe shinikeuye atsutsu eno ayeghike. Niye aghakhu kutomolo Alhou shepeshisu ighivea kemu Russiamino Alhou tsa avehupushi akeutoiye ithumlake, ghuthu lakhi khristomi akusami lakhino ilau telephone shipuuke, tiye Russiami officermi lakhino palau ighino aki pimikhuno paye Alhou avehupushi anipi, ikemu Timi hipauye khilemu azu-u Alhou tsachimla aphi. Bible ghikiutoi keno-mutha aphi, eno akukuhokiye paghenguno kiupi anikeno mutha tishimu paye Alhou ithinishiake.

Ike ino Timi hipaulau wuno Alhou shepeshino Mt 5:1o Jisuno naghuto lono kutsukeu ghili pikelo paye alokivilauno ngomlaveno ilhewuve, ikemu ino lakhi shipimivekeuye kughono ino Jisu ghimeghili pino paye kishi cross lono thiveke ghili pikelo paye ighono amlo kusashi qa-auve,

pano kumusukeuye xakulu-uye thivapi, hiye pavilo pithu-miphilono, ikemu ino kughono pavilo Jisuye akuthuni akumolono xuthughive keughili pikeno paye ighono akic-hiqhiveno ighono ighaithughi alokivilauno! Paye xu aphia? Eno akiniu alokivi launo itaghi ilheauve. Tithiu ino pavilo nikujo akighini shini ipikelo paye akighiniye kiupianikeno muthakemu ighono qhoqhunhepeno hitoi akighinishi, ino imulo kumutsu pesuno okimiyeani ipi inikhu. Ino pulu akeu Alhou ye kijemi hipau kighini chilutsuputsa. Tithiu paye khristomiqo imeakemi kuphunikeushi kughakuthashino wuve.

Itaghi ino kijemi akinanipu alhikishi kilono sholu, ike pamaye Russia tsa muthakehu ino pamatsa pekidetsua eno athiu akivishi ithikilevekehu ino pama ikilo kusu aghulhutsu-niyeno, eno pama vilo khristomi kilo keke chunikelo akighini shini ipikelo pamaye chumono ngovenno Alhou ghili, Jisu eno Bible ghili inju auve, hiye Alhou no adokivi tsukeuke. Atughushi pamavilo Timi lakhino Bheri aqhegholo lakhi puhavekeu ghili pikemu vethamlave, tighenguno ino Jisu ye akukau ipikelo pamano pikeuno kukami khunomu akivi kuhake Jisughi tihutoi kenia; kughono ino atsailu kichiu hole pesuno pikeno pamano pikeuno: lyei, tiye atsailu kichiu mpeu sasu kupunanani. Thokha kumutsu pama ghenguno akithe, ikelo itaghi ino Jisu punukeu ghili pesuno pikelo pamano khochilekeuno kushiye shipixikeutsa pianikea? Mary ye Alhou nipu keshea? Ino hileno vethalu keuno kughono Alhou tsapesuno Russiami vilo pinikeno atsa akithe khilemu muthakeu pesu pikepu.

Azu-u Missionarmi Central Africa lo wukemighi Isaiiah kakulo atsa hipau pekidenikeu shoveke, " oxineno huchui, yetamughui aghi pinamu murasu kimiyetoi shivetsu nani." Africamiye khunomu murasu ithumla aphi tighenguno pano tsauye atsa hipau kuhake. Hipau zuqhulo miyeikeu kutau peithacheni.

Tihenguno Alhou tsakiviu Marxistmi tsau pekidenikelo pano gholawuno pekide chenike, ikemu hiye nighono kumono Alhou Ghunguno muzusutsukeu kuka vechenonoke. Tishimu; Alhouno officer pama putsaveno tipau tsala lono amulo pekideluve, eno athiu pama vecheo alaghi kumuzapu lono nikuphuno Russialo Alhou kumla kutomo mlaluke. Aqhouno atsa kiviu thousand kutolo mlano. Russiami supahemi eno kutami Alhou phuluvekeqotsu eno tithiu ninguye Bible kutomo pusuno tuqhouno Russialo iloluke.

Ninguno amuqu lakhishino Russiami wulono Bible puwulukeuye, tiye Russiamiye itimi ighono kimiye eno itimi ghenguno adokushowa aghushi ighivea; tihenguno ipu Mihai, eno itimi kutami amipe 10 qhou pulono Bible panongu pocket lo pususu wupe, ike panonguno ighi kelo Russiami suphahemiqoye kimiyekelauno panongu kutsulo kunhutsuno panongu phepuwukhave. Itimiqono Bible eno atsa kiviu kaku tachupusu ighino panongutsukelo suphahemiqo tsukelo panonguye ado kushowalo itimi ithumlavekehu panongu tianulitoi kumusuvono Bible eno kakujeli luveno chukepu akungo jeli panongutsuno puwo, hiye ighono kumusapushi akeusuche dolono Alhou no alaghi qhaqhitsu itimi kititi vecheono akumuzapu lono missionary kumlashiluke.

Russiami Suphahemi Lau Alhou Shepeshilukeu.

Alhou kumla Russialo shikeuye luthulau likhi kumono aqhalau ghishiluke. Russiamiye ighono khuri (watch) kimiye tihenguno alaghi kumutsulo Timi lakhano khuri luvetsucheni, ninguno panongu wulo khuri kutomo peaghikeu ithulu nani. Itaghi ninguno Totimi officer kuwolo ghopeqhi chekeu akijeughi xini aghikeu ithulu nani, kughengu hiye azu-ukhilemu khuri ithumlakeu ghenguno, eno khuri qhunikemi kumtsu

suphahemi barracklo wuno amekumla lono Qhulucheni.

Ike nghi Russiami orthodox miqono St. Paul ngo St. Peter pama ikhilu akeutsalalo watch qhunipino suphamino ngo akeugholo ilo, watch injukijeghino suphami kutomoxujulu, ikemu ino watch qhumoke ghenguno kutomono ighino isuholuve, ike ino panongu vilo nonguye atsala hipau ithian-ima? Paul ngo Peter pama ikhilu akeutsalake; eno panongu vilo pama ghili piakelo panongu dolo muchomi lakhino pama ghili ithiaghino ivilo noye watch qhuniye ighikeo akupulu ghili nivilo piniye ighikea? Ikemu isuhupe ngo akeqoye Timi kivimilikhi ike panonguno Alhou tsa ininishi keghenguno amuqu lakhi itu, nino khu-umsakepu keno ithianike kughono nino au pesu okhonzelo benikeno Alhou tsanivilopilo; ikemu kughono au ikhiluvenikeno watch ghili pithuvelo, adokivi hipaqo ghengulono Paul eno Peter nguno alau Jisu ghilighi pesuno panongu vilo pino xakulu laghi kichepanongu piyekelo suphahemi kutomono amulo pekidelukha. Hitoi keu ghuthu kutomo wuluno Alhou shepe ngunoalau athiuye Atsakiviu qhetonhe shoupesuno suphahemi amlo pekideluvekeqo tsulo.

Tuqhou kukuhoulo athikuzumi eno achelimi kutomono hitoi kumla lono kughaluvono aghimetsukemu panonguye niu kuqhakuye pipisamoe. Hipau ghulokilo alokivishi Russialo tuqhou kukuhou sasu kusholuno mlalupe, panonguye amipe kutomo Communist gholo xukutsuno college eno School loghi phiighi kemu panonguye ashi khulholo amiti kuqhutoi panongu ghungu mithe mithei eno Khristo lau akimithe shike.

Russailo khristomi qono tipi: amlo ghime kijelono nipulo Atsakiviu suphahemi kutamilau vekupha lupeke ghen-guno.

Ino pinikeuye panonguye khristomi kuchomike, kughengu ino akichiqhi akeuye kughono ino baptistmi vilo noye

kishino alokivi ithikea? Pikelo, pano khochile: Kishino alokivi ithinikea, pastor launo itsuwuvelono, niye akighinilo ino saphe acheni, eno pukaputsano puhavekeu ghungu zulunike phuacheni.

Khristo hipauye zugha lakhitoike, kughono khristomi lakhi phevenikeno Khristo lau puhapua keughungu sughitsu ani. Ikemu kughono timi axine lono saighini keno, paye akughulo wuvemo ayesave cheni, eno pati nuliqoye mighimi shivecheni. Khristo lau timi lakhi saighikeu lokiviye kukhakungo ani, tighenguno amepesuno qhumo ayesake.

Nino khristomi aghola pakutakeu akithe kutomo ithuluke, tiye tughou kukuhoulo khristomiqo. Ninguye alaghi kutomo lono akichiqhi kepu kutomo sholuke!

Timi kutomono khristomi kemu kuchouye pano lolo kuha, tighenguno nino ithulukeuye Russia dolo kupulumu piakeqoye Alhou pulumokeqo, kuchouye kuhakemi, Ike ino akinanipulakhi sholu, pama kinikujo Alhou kuha ipichekemi, ike ino kugho-no Alhou ghili pikeno pamano khochile: "ALHOUYE ACHEMOE." ipikemike, ikemu nino kuana akivi lakhi ovilo pini, nilaukiu shivekeno.

Ghuthulakhilo ninguno stalin julho mla akelo, inipuno ivilo inju: ikimi, a-u loquye kiutoikea? auloqu kuhano eno auloti kutamino apukhu lotitoive aye ninguye thokha tsuqup-eno akumla shimlani cheke. Timi kuxuye auloqu kitila hipau sumo keloye kiurno shimla. Tishi aye khu-uno auloqu hipau pulho kea? Nikujono akiphikilono Marxist ghili akivishi philuva ike tiye atsutsu eno ayeghiye pakutoshino acheghi. Panonguye khilemu Alhouno lhomoe, atsutsu eno ayeghighi Alhouye khilemu lhomeo, tsutsala pano auloqu likhi lhotsuaye paye sheqhe kuzu-u kumoe. Hipaqoye nino ithi eno pulu achekeuke.

Nino Edison, Bell eno Stephenson sheqhe acheni: khunoqomino electric bulb, telephone, train laghi eno tinguno

iqiphekeno. Tishi aye ninguye kushiye khu-u auloqu lhotsu-keno tipau sheqhe monikea? Tsutsala Edison no auloqu kuhake aye paye kiumo iqiphemula, Tishi aye Alhou likhino achipiu eno palikhi huthukepu kughengu pano auloqo lhotsuke ghenguno.

Atsa hipau chilukelo ikimiye ighono amulo ideve eno ivilo atsalhokusa titoikeuye pikelopi. Kughengu nono ithi-ani: Alhou ye kuhapi. Alhou kuhapi omlo suchileluvelo, eno atsutsulo kumo kuha "No body."

Inoli no itaghi khochile: tiuno itaghi ighono akichiqhi pu. Atsutsulo Akughushu Lhou nipu nisuno akumutha lono pulu ighikeu wuno, auloqu aghikeuye alho ayelonoke, ikemu akughushu Lhouye thokha shikulupu ani. Tighenguno paye auloqu ghi lhotsuke. Ikemu atsutsulo khumo kuha aye niye imulo kumutsu pesuno "KHUMO KUHA" ipikeu mlauvenia, khuno auloqo lhotsukeno. Tighenguno panonguye khumo kuha ipikeu mla ighiveke. Hiye wovekeulo Athen phughilotoi, Paul no veche wuchekelo achini kutsuqolo "muthakeu Lhou" ipi yepuaghikeutoi. Hipama akinanipuye ighono alokivishi ilauno chilukeu atsutsulo 'khumokuha' ipikeu kupuiu ghenguno. Alhou ye Aghungu, eno aghunguye kimiyekeu ani, alokutsu, kuchou eno akuka kuau, kimiye keuno panu puwutsu eno timiqo ghenguno cross lono akuxutsuve.

Kughengu panongughi panono pulu akeu Lhou muthake ghenguno. Niye adokivi ithuluno pama sasu kuputsano itaghi xakulu eno xapheluve keughili.

Ino itaghi Russiami totimi officer lakhi alaghilono ithulu. Ike ino li phivilo iphigino qhi-iniju: Ino ithiakeuye totimi khunokela mutha eno alaghila lono putsakeuye, ikemu niye Pastor, tighenguno ino Li vilo noye Khristo ithianima? ipikelo, Lino: ivilo noye Khristo kimiye chenikea? Ino: "iyei! imulo kumutsu pesuno! Tile Lino iumlo sunhepeno anguno anguno

imuma auve, hiye ighono muzakeu Pastor ghenguno, ikemu nighi Li mumachile. Timino kumusunikeuye nikujoye asholokumi kughashi akenia. Tishino, Lino ivilo nighi khristo kimiye chekemike! Tishino ino Li sasu nikilo ighi akivishi injukelo Liye kiumo mtha Jisu je nguno alauye. Tishimu Lino Jisu kimiyeke. Liye Jisuye xakulu-u ipikeughi mutha momu xakulu laghi anipikeumo mutha. Tinguno alau khilemu Jisu ghili chimlamithe ajelikhi kumoaye, tishiaye timi lakhiye kishino aje chikulu likhino pululunikea?

Ino itaghi alau injukide: Lino itimi shichekelo, ajulho phipenike nishikache, a) Mujoithi julho. b) ayihechekeu julho, eno c) Akhosa julho, ino kughono high School lo ikughivekeno akimithe kumla tiye niza yeghi Communist susho anike ghenguno. Niye Communist kukhuayeghi shika ikemu kiuno akimithe kumla (holy duty) keno mutha. Ikemu ino ithikeuye nipu nisuye thokha kumutsu julho jukiviu ache, eno isughi tipau itsaqino mlachekeu ithi, ino ivilo ajulho tipaujeye 'Cristos' (Khristo). Niye pakutoshino ajetipau kimiye eno aje tipauno ighenguno kuchou shive eno alokivi itsuke.

Li sutsa injughi ino Philippian lo yepuakeu kumusulu, tiye Pajelo timi kumutsu itsaqi nani. Jisuje likhi vecheono akuka ani. Pajelono ayeghiqha pulono Alhou lau ighipe-nani.

Liye ikilono ajekimiye akeu Lilolo xulupeke eno ithitoi lupeke. Russiami gholo ngolukeuye ighono azukinipu eno atsa akithe ahole eno Leshele ithipeke.

Ike Lino athiu atsa kivi train station lo piakelono suphami kijemilakhi iu address luno ilau puwu. Kijemi tipauye Russiami Lieutenant ke. Ino pavilo niye kiu shitsulopikea? Ike pano khochile: 'Niye akuvulo ighivea.'

Ike ino kucho yesulo akhoto pesuno pavilo pikelo, pano ivilo ino imulo kumutsu pesuno oqhuiniju anike. Isabidetsu-kevilo. Niye akuzulo kuamike tiye kuchouno Alhou tsakema?

Ino kuchoupi khochile. Paye ayikihedo bidi kutolo itsa iniano Jisu Khristo ikhiluve.

Russianmiye khilemu akupulu ilaleikeu shichemo. Panono akupulu mujochile aye momu Khristo phuluve aye panongu ghungu kumutsutsuno phucheni. Tighenguno Russiami kumutsu puhapuakeu saghini keu missionary ke. Russiami likhino ayeghiqhalo alhoaye kupuluke, eno Russialo atsa kiviukumutsuno puloveaye ayeghiqaye pekilive naniputsa.

Hiye ighono amulo kusatsa! ayeghiqha kutau nguno Russialo no Alhoutsa minemigheike. Ino Trainlo chekelo Russiami officer lakhi nikujo kumutsa iqache, eno ino Khristo ghili pavilo kusajeche. Ike paye (atheist) pulumokemi shiaghino isasu kutsala thuve. Paye Marx, Stalin, Voltaire, Darwin, eno kutami kutomono Bible pulumokeu ghilipi, ado itsumomitheno ayi kihedo lakhitoi keukutolo 'Alhou kuhaipikeulo izuniye. Pano pitakemutsa ino pavilo inju. Tishi aye kushiye Alhou kuha ipino shilukusalo akighinishi chenikea? Akic-hiqhi kupukamino puka akelotoi, pano khochile, noye kishino ino akighini shiakeu ithulukea?

Ino kijemi hipaupulo popenike adotsumo. Ino atughu-u injukeu noye kushiye akighinishi chenikea? Kimiyeno khochileve paghilo: Tile akutsu pishiqhono iyepi ikhiluve: Ningu kumutsu akighinishi cheni.

Russialo Alhou shepe shiukelo kumusumamo keulakhi Piotr (Peter) Khu-unomu mutha paye Russia kughu kilo khileno thivekeno. Ighono lhothemi ampe 20 shiakenia. Paye Romanialo Russiami suphahemi gholono ighikemi. Paye tuqhou hoholono amulo pekidelukemi eno ino baptist shitsu.

Baptist shiveke thikhau ino pavilo Biblelo kiukihelono omulo putsaluno Jisu pululukea? Pano pikeuno tamomitheno tuqhou kukuholo Alhoutsa inikeu lono. Jisu no paukupukini

lono ixaluke. Atsa hipauno Communistmi lakhipulono Khristo lau ighilupeke.

Russiami hipau likhino Jisu tsakiviu ghenguno pululuke kumoe, ikemu niye Pastor shiaghimu khilemu hipau ghola lono kumusumlano ake.

Athiu Piotr no pakuxu kumutsuveno tamono tuqhou kukuhou kuphuno Bible eno Khristomi kaku kutomo pususuno Romania lono Russialo tsuke. Tithiu ashekhalo paye kughaluve. Ino ithi akeuye 1959 mpe, kutolo paye akughukilo ake, paye thivea ikemu ino pulu ani paye kungughalo ani.

Lhothemi hipautoi ninguye Khristo lau xaideighilupe keukumo ikemu kutami ghungu puhapuakeu saighitsu penike qokiphetsuke. akumla hipaqoghi ninguye tuxa likhi mulalu aph. Ninguye Russiami khije Alhouno kulukeno (Underground church) kukuhouno pesuno missionary ghenguno puwu anike. Tighenguno Russiami khritsomi qono alho-kuthu ishi picheni; ighono aghulo likhi mulatsu aph khu-u Khristo panongu ghenguno thivekeno.

Tuqhou Kukuhouno Enslave Ghakhulo Mlakeu.

Tuqhou kukuhou missionary kumla akiniuye Romani-ami pano dolono. Payi khavilono Communist miqoye panojulho ikhive, atughuloye panongu akukuholo sakiphemi zuluveniye pukaputsa, ikemu aghime luthuveno timi qhethonhe kughaluve. Puha puakeu ghungu saighinike ghenguno hukuthuloye azukutunupughi kutomo shive kughengu ado kushowa Russialo ngovekehu.

Athiuye nighi akughukilo ino Khristo lau sughitsukeni hami ghola akughulo ngove, tiye khakuthabo lakhilo timi khu-u anuli 6 akeno paye panulimiyo kupulu kumuto ghenguno akughushi ake. Ike ino timi hipauvilo hitoi inju. Noye ino no Khristo lau saighino opulo akughulo imeakeu ilau

kiuana amulo kishikumo kuhama? Pano hitoi ikochileve; Niye nono akiqheu Lhou lau nisaighike ghenguno, oshikimithi keughi pikhamlano ani! Niye alaghi hinguno akivi kutauye ithulumae."

Akukutsu aghola kutauno pinikeuye ighonosho ani. Nino kakutachu hami mla, ashouye Karl Marx julho shisu, Communismi huthutsukeu. Kakujeje "Achineye timi ghen-guno shokumuzu lakhi." Hiye communusmi kaku toishino atughu-u paqoloye Karl Marx julholikhi, tinguno alau Lenin, eno Stalin julhoghi ake. Timiqomi zuniyeno eno kaku hipau ikhilutsuno aqhalo peithaniyeno. Ikemu kaku hipauye Khristo Jisu shepeshitsu keuke.

Kughono nino kaku hipaupesuno Communist miqo tsukeno Karl Marx julho anike kumutsuno lukhave, Panonguno phisusu apa chighi thi u ighikelo Alhou eno Jisu khristo ghili likhi ithulu, hipau ghuloloye ninguye alakushowalo chevea.

Athiu Communuistqono aghime kutomo nishou ipuku, anhemugha kiu akeno kumutsuluvetsu, alukichimi launo aki alu eno apighijeli kumutsu luvetsu. Alhikishimi goye alhikishiki kititiqoghi luvetsu. Ighono kuakinimi likhi ghimemo ikemu kumlhomi kumutsu kumzapu lono imeve. Akibolo lakhi-nomu akughukilo ilomokeuye kuha. Aghime hipaqo ghen-guno timi kutomono kishino Alhou kimiyeku kibolau kishino alhokusa satan ighikea?

Apostle miqoghi atughu-u Good Friday tsalalo, kutsuni-keu ighono shoveke. Ilhou, Ilhou, Noye kushiye iqhive anikea? Ikemu thakha kumlashive, tiye Alhou launo kethono timlauno ighikeu kumo. Khristomi kumutsu hipau kupulutoi khochilelu kepu.

Jisuno amighiu Lazarus ghilipi, paye aghime tsalalo-shia, muzuthia, eno papiyi zakulo atsuno minea. Ikemu

kughono ashekha tsala tovekeno paye kungumino sasu Abraham mulalo qhive.

Kishino Tuqhou Kukuhou Pulo alaghilalo Kutsulu Pekenó.

Ni kukuhouye tuqhou kilono, aghasa lono eno akuzulono. Kutolu thaqulo tuqhouno, alaghila loghi tuqhouno itheno Communismi Police ighimiphi dolono, tishimo hitoikeu dologhi Alhou no timi kutomo putsatsu. Tsavipe kumla hipaulo inipuno ighono shitsashi, Ligholo ale kiphemighiake alekiphe ininiye ighikelono Lino Alhou shepeshi. Hipaqo kumutsu inaqhe Police ighimiphi zulonoke.

Puchou ghuthu lakhilo ino A-a kutau Alhou shepeshia eno inipuno akumlami qhethonhe gholo Alhou shepeshia, tiye 'Malaza' factory hukikhalo. Itaghi Bucharest phughilo inipuno akumlamiqo gholo xakulu ghilipia, tishiwo thoghu-uye factorylo kumlami mishika thavekeu ghenguno kutomo veqhive. Nino puluani panonguye adoachipi lono Alhoutsa chiluvea:

Ninguye tuqhou kukuhomi ikemu John baptiz toi timiqo eno ayekipemi lau kumutoshi Khristo ghili pike. Hipau mlokuloghi lono khristomi kini Prime Misnister Gheorghiu Dej lau Khristo shepe shiniye wu eno pavilo axine lono xaideighi eno aghime timi tsupemo-nikeghenguno. Ikemu pamaye kughapesuno akughukilo suve.

Ampe hamithiu Prime Minister hipauye ighnono suve, tiye amipe kushowa thiuno Alhoutsa xusukeu (ghime ghen-guno) lhoipeghike. Prime Ministrye akusu zualono Biblelo kiu pavilo pikeno kumusuluake,alhoutsaye thai ani, niye putoputo zuta kikihitoike. Atsa hipauno pamulo kumuka buvetsuno Pakuxu pesuno Khristo lau ighive. Tishino paxine pipheno xakulu-u ikhiluveno akusu zualono paqeni-

keushi kughatha, tishino adokushowa kumothiuye akuxuwove. Khristomi lhothemi pamano akuxu tsuvekeu vecheono ishiye Communismi yeghilo khristomi kutomo ipeghiluke.

Amulo kuloghishi Communismi yeghilo alaghila, akuzulo eno sakiphemi kumutsulau Alhou shepeshikeuye 'AME' anike, Underground kukuhouye ishikutolo tipaume tsunike kutope ani. Kughengu Communismino ithiakeuno kughono timi lakhino Khristo puluvenikeno amlo kumutsu pesutsuve nani, tihenguno panonguno kupulumiqo pesuno akughulo khatha akemu Alhou kupulu tipaue khathamlake. Hipaqo ghenguno itaghi aghoshi khristomi hasu qhasu. Ike athiu ningughi khristomi hamipulono tuqhou kupulupuno Secret Police lo ajesuno mlapeno panonguno mishika tuqhou ghili kumutsu Underground kukuhou vilo pipeno Alhou kumla itaghi tuqhouno kumuzapushi mlawoke.

Nighi kughono ikughape kusuvekeno, niye khile achenikeno tuqhou ghili ithinike ghenguno pukaputsa, tishino tuqhou Policemi ghulo mulakuqha chekemi Doctor lakhino iphususu inokhile akeno ighino imusuluvenike pukaputsaju. Akughumi phimini wunikeuye Khristo ghenguno imeakeu phimini wukeuno kijeke.

Amipe 81/2 akughulo akelo niye xuanipi phulukeye Doctor hipaunoke eno pavecheono niye xuakeu kutamighi ithike. Paghenguno kumokenopi aye niye ishiye akumo kilivelo momu akughulo aghiluvike. Atsala hamithiu, 1956 mepelo, Eisenhower-Khruschev 'Thaw' tsalalo akughumi khaqhiphea eno nighi adokitila ghenguno qhaqhiphe.

Itehighi Secret Policelo khristomi tuqhou kupulu akemi mla aphi eno panonguno Tuqhou kukuhou adolhokusa kumutsulo kuphu acheni, Ghulo lakhiloye timhipaqono atsutsulono Nino tuqhouno qhechekeu Jisu Khristo ipi aqhaghulo shuphenani.

Tuqhou kukuhoulo kihikusumi kutomo phuluveno akughulo akhani. Ishi niye Niu'Judas ani! Pano tamono nighili pesuno communismi lautsuveno heqhi, tiqhi eno aloqhino Niqodaqhi achenipeke. Tishimo Alhou nigholo akeu kupulu phemoke.

Niye Feb. 28th, 1948 kutolo ashou kukuho eno tuqhou kukuhoulo mla aphike. Hiye jukivi Pine tsalashia (Sunday) ike inoakukuho kilo wuchekelono Secret police miqono isunheluve. Timi bidino ighino ikughapesuno gari alou ikhisuve. Tishino niye adokushowa ampe 8 kutolo akughulo sauve, hiye timi khunomu mutha khileani xu anikeo thiveakeno.

Tipau ghulokilo inipughi akughuki kutaua eno police miqono Livilo niye thivea piveke ghenguno Liye amulo kughutashi auve. Hipau ghulokilo kupulumi qhetonhe shouno akughushi ake. Pastor miqo likhikumo ikemu aluchemi eno apumi ilimi Alhou shepeshiuikeu ghenguno kupulumi likhino Romania kughuki chitoiae. communismi kughukilo wukeuye aghime tsuniyenoke.

Aghime khaniloye kumusapu. Hipaqo ghimeye akiniu pikeghi pinishimo, aghime ghenguno khilemu zuhupemo. kaku kutau "God's Underground" ipi keulono Alhou ghen-guno akughu ghili akivishi yepuani.

Piphe Khamulakeu Ghime

Pastor Flrescu, ghimeqhi keuye ayi kipiti eno chakuno chuxuqhike. Paye aloqhino heqhivekeghenguno zuhumla ikemu zuhucheghi aye aji pipe kilono ipeghino pamikipe. Tithiughi paye putho pucho puthughope ngope. communist miqono papulono pakusami kutamijeghi shuphetsu

peniyeno, ikemu paye akumutoshi kutu-uve. Ashekhalo, panonguno panu amipe 14 shiakeu saighino apugizulono heqhipiye, tishino Pastor vilo nonopimo aye hingunoalau tamono onu heqhiani. Timi hipauye akukumusu achipi shi-move eno igha ithughino pi, Inu Alexander, niye oheqhikeu kutu-umlave. Panonguno kiu injunikeno pivenia! apuno khochile: Ipu, ighenguno amikucho kumo puaza shikevilo. Kutu-u velo! Ino thivepinamu, niye Jisutsa ghenguno thive-nani. Communistqono axuide apu tipau heqhipithive. Ajino akikumutsu nhachighi, ikemu apu hipauy Alhou sheqheghith-iuve. Pastor ye hipau ithuluke thikhauye akukumusu alo-move.

Niulo ayikiche kighino tsupua, tipau alou ayisahu ani, eno ithake-kumutsulo ashilo qhusutsu. Hiye susutsala ighono mukoakemu au ithamlakughengu ithake kumutsulo qhutsu anike ghenguno.

Khrisotmi qoye akutsuno aqhoshi tsuqhi no heqhikeuno aphi kumutsu ingukha, tishino avuzu bolo ikhisupeqhino avu muqotoi ilhope. Ikemu niye aphikitila wulukeu - aloqhipua, tishino Doctor pulono miqejuru apeno thiveni cheghiaye ikhipheno akulutsu, kughono itaghi akulushivenikeno ikhisuchileve hitoishi ghuthu kutomoshi ideke. Hitoike-u ashekha kuhano ghimeqhike. Niye itehighi refrigerator qhaqhi musa.

Itaghi khristomi qoye bakoslosu tiye ninguno peith-achekeu nguno kije ikemu ithakepu shimla. Eno bakos hokumuxa ayisahu yesupuani, ike ashekha tilengope kehu ithamokeloye shimlano aghime kushuqhu kiu shilepimo.

Niye Communismino khristomi ghimekeuhi ithulughi panonguno igha hitoi ghime, "Ninguye saitan ke." Ninguye ayeghilo ayekipemiyo sasu aghushi amoe ikemu ithumlakeu alhokusau ghungu kuka sasu aghushi ani. Nino ithulukeuye Communismiye timi launo ighikeu kumoe ikemu

alhokusau ghungu kukavecheonoke, ikemu hipau ghungu kukano Alhou ghungu sasu kiushikulupu anikea?

Ino alhokuthu ghimeqhi kemivilo: Nonguye amulolo khilemu kimiye keu ighichemokesha? 'Lenin nopike! alho ayelono khochile chekeutoi, awukhu hephomo keloyme omelet mulaulu chemoe, momu asu ghithano pesuno mulalu chenikesha? Ino itaghi khochile: Nono asughithakelo tiye kiumokumoe. Ikemu noye timi phiashilo hepuku anike, khijehi hepuku keno tijehi suanike eno azano kumzapushi qa-anike. Hiye kiumo amekuhae. Communismiye tinhemighano akhoto kethono timiye kiumokihimo, tighenguno asulo eno awukhu hepho aketoike. Hipau tsavitho kupulu ghenguno pulumlakepu akuthoulo eno aloghu kighideshipeke.

Timi lakhino akivi saxu eno alhokusa saxu anipikeu kupulu ithimokeloyme timi hipauye kiumo akiqhi kuhae. Communismi ghimechekemino alhokuthu hitoipi cheni. Alhou khilemu kuha, hipau thiukiumo kuha, alhokusa kumla ghenguno aghime kuha. Nino kiushinishi keno nighoshi shinani. Ino timi lakhino pikeuchilu, "Ino Alhou shikimithi ani, ipulo papulu miapeke ghenguno. Itehi xuaghino tughamino ilolo akeu kumutsu pilupeke ghenguno." Tishi pino akughumi kumuza ghimeqhi ake.

Ino panongu launo shikalukeuye, panonguno kitilamu panongu lolo Jisu khristo A-a tsumoke ghenguno, ino xakutha shilukeuye A-a aghulo kitilamu Saitan tsumoe.

Ino USA. Senate of committee vilo hipaqa kumtsu pivea, kiutoi khristomi crosslo putho pucho atsala bidi kutolo ayeghilo (floor) qhino akughumi kutamino ghodaqhi, tithiu ghope qhino communsmino: "Julo nou Khristo! Kiutoi jukivikeno! Pano kiu kungugha lono sughinipi anikeno! "Tithiu achinetou pulono angukalono timi pujo tsuno khristomi puono, Akimithe ghulhushi tipaushopeke, hiye Pitesti

kughu kilonoke. Ike ino athiu achinetou vilo noye kiushiye tishikea? Thivekeu pavimokessa. Achinetouno hitoi ikhochile: Ishou kughathatsu kevalo kimiyeno! Niye Khristo nguno aghimeushi imevea! Ino pinikeuye Biblelo, amiyizu kutho eno hades ghimeye Communismi kughukilo imekeu sasu kimighimla.

Pitestilo, Sunday tsalaqolo kiushive keno hiye aghulo likhi, kutauqoye mulaei pikeghi pinishimo eno ino tipaqo pi-ideaye imulo ighono imeuveke. Ghimekitiqhi qoye yepuku khamula. Hitoishi nokusami khristomi qoye imeighi eno itaghi imeani.

Kumutsu gholo akupulu kumugho jepikeuye Pastor Milan Haimovici ke. akughu kilo timino kutomo eno ninguje ithikhamo keghenguno akughumi khunoqono ghuthu 25 akughuyezah hepideveke ghenguno aghime tsukeu kigh-ino heveakeno kuphe. Ikemu Pastor M. Haimovici likhino timi kutami zuqhushi ipeno aghime kighi kitihechuke, akughumi launo tokulu-u shi eno Khristo zuqhushi tokulu-ushike.

Communismi ghime ghili eno Khristomino akuxu tsuvekeu heamu hekhamla kepu kutomo ani. Aghime ghili ithikeu kumo ikemu akupulu kughushughi ithike. Akughukilo kichekipiye hipaqo vecheono ishi khristomi lau muzusutsuke.

Tuqhou kukuhoulo mulakuqha chekeuye liothelimike. Lino tuqhouno itimiqolau atsakiviu vekupha chekeu police-mino ithiveke. Liye kulakupu tsalalo kulaliu phimini pepu akelono kughaluve. Lino pikeu tsa, "Ino kungughalo kulaliu shikimithi ani. Ipulo pa ghengulono amekuapushi imelupeke ghenguno. Liye heqhike ghenguno qasusu kula kupua qhiveno akughulo sauve. Tithiu amipe pungu thiu Liye pheve, ikemu heqhikeuno amipe 30 nguno akichiutoive. Tishimu akipitiuye kutami sasu kulakupu shimono khea. Itaghi Lino pikeuno hiye kitila likhi mulalu aphike Jisu ghen-guno. Hitoikemi Jukive khristomi tuqhou-kukuhoulo ani.

Aqholo Pisuvetsu Keu

Ninguno azu-u Korean eno Vietnam ghushilono aqholo pisuvetsu momu aqho ghuvetsukeu. Nighi ghuthu kutomo aqholo pisuvetsukeu chilu ighivea, hiye ighono kumusapuke.

Amipe kupujulo atsalalo ayikihedo 17 iqani hipau pi-idenike.

Communismye aloe!

Communismye aloe!

Communismye aloe!

Communismye aloe!

Khristomiye lhokusa!

Khristomiye lhokusa!

Khristomiye lhokusa!

Qhivelo!

Qhivelo!

Qhivelo!

Khristomi kutomono ivilo kishino aqholo hipau hipaulo tsughulu nanikeapi inju. Ino khochile, tiye alaghi lakhiani. Tiapu zuqhulo ishipitlo: "Amulolo pisutsu." Tsutsala nimulono Jisu khristo ghenguno mithe aghiaye, eno Pa kimiye aghiaye ninguye thokha ghimelono tsughulunani.

Alhouno ningu lau kughatha benikeuyekhijehi kutu-ulu keno tipau kumoe ikemu khipahi pakimiye lukeno. Ino Communismi kughukilo khristomi kutomo ithuluvea, panonguye Alhou eno timi kimiye kinimi. Tishimo aghime tsukeuye tamomitheke. Ino khanilo kutu-ulho kelauno akithi kumulhoshivekehu pipheveni ipikumusu ikemu ikumuto kitila ithulukutheno kutu-uluke.

Akughuki A-a kutomolo panonguno imuqa lono aghutsughi sughino hepho eno aghi kutau kutomo, tishino ayi kipitino iphilo a-a chighi tachelo pititsu. Oslo lo Doctor

ghi niye aphelo tuberculosis shiveno ishi xuakeuye akichiqhi kepulono. Doctorno pikeukiqilo niye amipe kushowa lono thive aghikepu shivea ikemu hiye Alhou-u akichiqhipu kumlake.

Ino, akichiqhipu Lhou puluani. Ipulono xuaghipeno tuqhou kukuhou zuqhushi khristomiqo lau xu-akeu Lhou shepe shilupeke ghenguno.

Adokitila Alokughuno-Eno Kughaluve.

1956 mpelo niye ipeghive, amipe 81/2 thiuye. Niye iphimipi kuha mitheve, ajukulupu kuhave, ayikoqoghi ilhamuive heqhi, tiqhikeuno. Tishino ighono nishikighichi veno akulho shivekethiuno nipheke. Panonguno kumusukeuno niye akupulu kuhavea eno kiumo shilumo nanipi ithino.

Tithiu niye haputado lakhi toikeu akulho qhiveno sermon kini kutsuke, ike panonguno ithiveno ivilo khilemu kutsukevi eno akupulu ghenguno mlakevilo pive. Niye hile kiupikea? Ino ikukuhouqo vilo "kutu-u, kutu-ulo eno kutu-ulo." Tishi pikemutsa police huno ighono igha ivilo adoghi kilive cheni, noye itaghi panongu vilo Communismiye ayeh pewolumopi anikea? Hihi akimiki shepetsuno ipulo hileno Alhou shepe tavepe.

Ayekipemiqono kumusu keuno niye musaveno underground kukuhou lo tsavipe kumla lono ideove kughashi. Ikemu niye aqhouno azu-u mlachekeu kukuhoulo mulathuve eno ikiboghi igholo ighive.

Akiniu niye tuqhouno akupulumi muqo sasu Ampeu shepeshia. Ninguye kiuana ghungu hutoi kumuqo ano paikhavilono itsu-u khave. Hilehi ikukutsuye Alhou kuha ipikeu tughami kumla ghilipino kupulumiqo ghungu shikumutotsu eno Alhou lau amulo kuloghi shilupeke. tishino tuqhou tsavipe kumla huthuno atsa kivi alau Communist anethi kighichemitoi akeqo ghakhulo piukithe, tishimo

kenapi aye Alhou kumlashi akeu ithini cheke eno Tsavipeuno kiu mlaanikeno tighi ithivekepu shia.

Ashehashi, Police miqono ikumla phuluveno akiniughi kughape akughulo suve. Kiqhi hami ghenguno ishiuloye iki-bolomi- qoyesumo. Niye amipe 5.50 kughulo sauve.

Akiniu kughuye alaghi ajeli lono imekepushi. Hiye azu- u nguno aghimeu, nighi - kiushive nanikeno ithia, tishimo ta- mono tuqhou kumula tuqhou kukuhou ghenguno tuqhou Communist kughu kilono mla ake.

Nino Kutsu Panonguno Niheqhi.

Akughu kilono kutami kutsu keuye ighono lakha ake. Ino ithia khu-ukhumo kughaluve keuye aghime kithikhi tsua. Ikemu akusami hami sasuno akughukilo kutsunikeushi kughakuthashi.

Tishino nino akughumilau Alhou shepe, panonguno nihe alokivishi. Hitoi ghuthu kutomo shike. Ino kumusuluke khristomi lakhino akughumi vilo Alhou shepeshi akelono akughu khemino ithiveno ashekha kuha heqhi eno aphiku- mutsu aji ipeghi akithi kumlhoshi akughumi gholoqhi, pano asheshino ipuisusu ithughino puthugho eno paphikuzu suchoveno akughumi vilo ishitipi. Akusamiqo : niye khile piakelono ikughaluve kea? Pino itaghi Alhou shepe pithuve.

Ino akivi lakhi itaghi ithulu! Khanilo akukutsumiye kighithimikumo ikemu aghungu kimitheuno muzusutsu keu lono akukutsu kivi kutsuke. Panongu mulo kumutsu Alhou tsalikhi. Adoghuloki hitoi keulo kutsuni keuye akumlakumo, kughengu paye akithi kumlhoshi aghimitsunikeu ithianike. Ike kuchono akhemino ithuluveno paye akithi kumlhoshi heqhive.

Gherla kughukilo khristomi lakhi paje Grecu, paye ash- eshino heqhipithive. Paheqhi keuye haputado hamiluke. Eno asheshino, ado adoshi heqhike. Atughushi apukhu

mutusulo hetsuno qhive. Tishino ado kitila thiu ighino heqhi, itaghingano heqhi, hesusu ajibo qhalo ighi. Tishino ashi ajitomo wocheghi aye Doctor pulono ayipu vuvetsupe. Itaghi ashi aji mutoveaye heqhi thuvono asheshino thi-huvepe.

Heqhikeu shou sakipheuye Central committee lo ampemi.pajeye Reck. Communismino khristomi vilo picheketo, Reck no hitoitipi, niye Alhouke,. Niye akuxu eno akithi kuka oshou ani. Khu-u atsutsulo anikeno okuxu ghen-guno kughatha tsumla. Thokha ishouni. Ino opuxu nimo eno opithinimo. Niye Alhou tishino khristomi ghushoa.

Athikuzu-u Grecu ye aghime kithikhi hipaulo, ighono pulo-niqhi-i keulo Reck khochileve? Noye nono thonheikeutsa kiupi anikeno muthake. Noye kuchouno Alhouke. Katsulanga ghi amimi ilho vekepu kuchou anike, achipilono ilhoaye. Opulonoghi timi ghimeqhi apenike ghenguno lhomoke ikemu Alhou toipenike ghenguno lhope. Jisu ghi Judamiqo vilo, nonguye Alhouke. Alhou kuxu huye nongu lolo ani. Otoi timi ghime chekeu Paul ghi pano phuluve keuye ghime chekeuye akukujopu eno Alhou lau angusuke. Timi hitoi kemino Alhou ghenguno akumla kije shilunani. Tighenguno ipululo Mr. Reck, kuchouno oku akeuye Alhou toishipeniyeno kethono ghikiqhimi shipeniyeno kumo.

Reck ye atughuloye kiupi akeno initsumo, Paul ghi Tarsus lo Stephen noashepe shi akeu kiupi akeno muthake, pakualono atuno veqhivekemu. Ikemu akughu-uno pavilo pikeutsano pamulolo auye eno kuchouno paku akeu suche-dopi ithive.

Communismi, timi heqhikemi eno ghimeqhi kemi kumutsuno atsa kije lakhi shikaluke. Tiye aghunguye aphi mipi mpeuke. Kughono ghimekeno ghimekeu kumusulu ikemu kiukena putou lakhi aghungu jukuvu akeu ithi tiye Nimpeu Jisu khristo nilolo eno nigholo akeuke.

Ninguye apinedolo ghuthu lakhi asho apa lakhi eno atsalalo azu qunikeu ajukhu lakhi ithuluche ikemu ninguno amikucholono chighisaje tsunipi ashoqhi shike ghenguno alhokuthu apinedo achighiu loye chumono akughumi miqemilei kemi chighi saje shighi Nimpeu jelono tsuveche.

Khristomi lakhi heqhi pithive. Pano thimiphilo atsa ashekhau panipu vilo pikeu: "Nono ithilo niye khunoqono iheqhi vekenno kimiyeghi thivapi ithilo. Panonguye panonguno olokeu kiumla keno ghenguno. Ningyu atsutsulono kushoni."

Atsa hipauno akughu khemi akijeu mulo buvetsuno pano athiu akughu ghili ivilopi khile pano khristo lau ighive keno tipau A-a lono.

Tirgu-Ocna, kughu kilo lhothemi amipe 18 shiakeu paje Matchevici. Ikemu paye itehi heqhikeu ghimeno ashiaji vimoveno tuberculosis nosu ani. Paye akumo kilive lono saighikeu paphike. Pabolomino Streptomycin abo aqhe tsupu-uno xuani kemu akuxu ngo akithi pama doloke. Ike kughono daoi hipau parcel shino sughikeno akughu kheu akijeuno agho tipau papiyeno pavilo hilehi oshipivive kepu daoi lakhi ani, ikemu opulono vejoino nobolomino tsukeu lupemoe. Ikemu Niuno okuphunike noye lhothemi aphi eno opulono akughu kilono thipeni shiamoe. Ikuphulo, ipelono okuphulu pekepushi. tighenguno okusami kutami akughulo akemi sutsa itsulo; eno tishino hino okuphuno ou agho ighi akeulukepushi. Lhothemi huno tipi: Niye xuanikeu pulo amoe, niye agho tipaqo mine amoe ikemu thive ke-u pavi ani. Ike akughu kheu akijeuno pau kuzuvono, ino oshikimithi ani tinguno alau khokichile tsukevilo. Ikemu ino akukumusukutau lakhi otsuni. Akhughumi khamiye asutsa nitsukemi, panonguye Communismi eno opipusa anike, panonguye alakinilo mla anike ninguye panongu pulumlalae. Panonguye oshipusa anike, nono pikeutsa eno mulakeu

kumutsu asutsa nitsuveno oghime anike. Tihenguno khunoqomino omujokeno asutsa nitsuve aye nino okuxu pukhatsuni. Pano itaghi azu-utoi khochileve, Niye Jisu Khristo khopemike, eno pano nishika keuye nighumighi kimiyelo pike. Panonguye ishipusa anikemu niye alhokusa pesuno alhokusa lochileve mulae. Niye panongu ghilimu pitsu mlae. Ino panongu kimiye no akighini shitsu ani. Niye Communismi sasuno kiumo kutsu kime keukuha. Matchevici ye akheu sasu kuputsa ipeghino akughukilono thive, ike nighi thiakeu ithulua. Pano Alhou sheqheghi, Kikimiyeno alho-aye kuxu kumutsu shou tokulushike.

Tsutsalatsa kumlhomi lakhino ale ighono kimiye aye, pano ashekhau poisa akeughi ale ininike tsuveno kumusa wove cheni, ikemu paye panhu ichove chemoe, paye ale chilu keuno pamuloqo cheni.

Niye amipe kushowa akughukilono ado puwove keuno imulo kusa shiamoe, ikemu niye akivi kutomo ithuluke. Nighi miqe milei kemi eno amekuha kemi gholo akughulo ake, ikemu akughuki kumutsalo akumughashi akimithemi kije gholo eno akupulu akumughomi, tiqheli atughu-ulo khristomi sasu kimighi kulumi sasughi ngoluke. Panongu-ye alokivishi Jisu ghenguno thive. Kupulumu tipaqo ghungu kuxu kiviye pikhave mulae.

Hile ino kiupi anikeno tiye aghulo likhi. Alhoaye lono shimokeu tipauno tuqhou kukuhoulo khristomi qoye alho-aye shiveke. Ishi tuqhou kukuhouye atughulo kikimiye ighivekeu kukuhouke.

Niye akughukilo ilomiphi zu-u, ighono Jisu Khristo kimiye. Ikemu itehi, Jisu ithuluveke thikhau, tiye aghungulo phimpi akughu kilono. Ino pinikeuye, niye Khristo kimiye akeu nguno alau tuqhou kukuhou kimiyeke. Ino Liu jukive eno akuxu tsuvekeu ghungu ithulukeu ghenguno.

Inipu Ngo Ipu Pama Kiushive Keno.

Niye inipu zukusu-uno sauveke inipuye athiu kishivekeno muthave. Athiu ampe kushuwa thiuno Li ghi akughulo sauvekeu chilu. Khristomi totimino kipitimi nguno alau imeke, ilimi qono akhemi qono shipusave, topumiqoye anguka lono akumuka kumla mulape, eno susu tsala lono ayeghi pupe. shipusave keqo pulono amikuchomi shou ampeu eno ghimeqhipe.

Inipuyexuanike ghenguno awotsangheghu (grass) chu amishi toi. Kutami akughumino aji ngo apighi chu akhuno ngomlake ghenguno. Akughu khemi ghenguno alokivi tsalaye tughakhani tsalake, tiye totimi azukhibolo vesuno khaphe-nikeu, tishino thaqhi-cheqhi eno junuqhinike ghenguno. Linoqomi phiputsakeu juno. Inipughi hipau gholalono azulo vesucheke.

Ipu Mihai ye apu ngo aza pamano akughukilo ilovekeke palikhi aphughi laghilo qhive. Ipuye tishi aghimu itilono akupulu eno ighono amulokutsuke. Athiu, pano amipe 9 (toku) shiakelo nikujo kinikujō akughukilo akeke paye ighono akuxu kughujushive eno Khristomi kuxu tipau kutomo injuthuve, achineye loghi ighono kukhu kimijishive. Kughengu itimi ye hipaqo sholuthu miphilono kehu. Paye kishino xuamo-aye sakeno tipau ghenguno.

Khunoqono khristomi kibo kuphukeno panoghenguye akithipu ghime, kughengu ilimi kinino ipu kuphuakeu Likumaghi kughaluvono aloqhino heqikeu ghenguno apukhu icheveno itehi kutolo tishixu aphi. Itaghi ampe 15 thiu, ilimi khu-u ipu sasuno Likilo wokeno akughulo kuami kibo kuphu anipi Lighi amipe 8, ghengunoa kughulo suve. Li-hu kumutsu hela khavetsu, Li-ghi thaqhuye heche khavetsu. Li kuxulo khilemu mulalumoe eno Lighi apukhu icheveno xuani.

Ipu Mahia No Jisu Pulukeyu.

Amipe 11 shivekelo, Mihai ye atsalalo kumla mulano papo qhechu che. Ghiche ghimeno pakupulu kughucho vetsu. Tishino amipe kini thiuno papulono paza khileakeno putsalupe, ikemu putouno paza ayikhadu dolono ajulhokusashi, aphhimini kughuta pepu (akughu phimini), atikitila eno qeinai keuphi aushino ithulu, ike apuye akushu kulushi paza ipi michiluke. Pazatsa atughu-uye, "Mahai, Jisu pululo! "Tishi piakelono akhemino Mahai tupevepu-u veno paza sunhepe A-a kutau qhive, ike apuye ado hamitile ngono qa-a ikemu asuchedo hipaulono pakulukeu shike.

Pano kumusu, Jisuno adohitoi keulono xakulupushi aye, Paye kuchouno Nixakulu-uke.

Akiphikilo paye itimi kivigho tie lakhi ithuluke, tiye (Young Communist Pioners) lo kihikusu michishi. Ikemu ipuno tipi: Niye khilemu akuwo kukha hipau pumoe, khunoqomino ipu ngo za pama pesuno akughulo suvekeno. Atsa hipau ghen-guno Paye School lono hapeve. Amipe akiniulo paye kutamitoi shiveno itaghi School tipaulo ajesuve. Khristomi akughulo akeunonupi ithipemonike ghenguno.

Athiu classlo Bible ghili henikeushi, Ipuno hitoishi yeke: Bible sasu khukeuye miqe-mileike, eno Bible lo akeutsa mujokile keuye timi kuchomi kumoke. Kuchouno shikukauye Khilemu Bible phiju miphimu atsa hipau ghen-guno itaghi hapeve. Paye adou lono amipe kini pukave.

Tishino ashekalo paye Seminary lophipenike azatsu, ikemu tileye "Marx theology" shikacheke. Thokha kumutsu Marx gholalono eno pau theology likhi shikake. Tighenguno Mahai no itimi hami pagholo kuqhano pekipheshi Marxsism mujochile keghenguno tileghi hapeveno Theology ghi ashekha shimulave.

Ghuthu lakhi akiphi kilo shikukauno patsapito 'atheist' Alhou kuhakeu ghili pikelo ipuno puthughono mujochile,

tile kiphimi kumutsu pagholo suno kuchou kighithi ghen-guno milakhiye achipiu pilunani ipino. Paye akighithi ithulunike ghenguno Khristomi akughu shiakeu nopupi tithipemonike pukaputsa akemu athiuye ithive.

Hiye ashekhaushi, paye School lo director no office bolo kusuno akivishi injuno school lono have.

Khristomino Communismi yeghilo akughushi keuye akhu-amuzu-no thiveekeu pavi. Ike ipughi ado akichiu lono chumo shomokeu pachi nino akughulo akehu.

Ino akibo lakhi akughukilono suvekeu kiqu lakhipini. Khristomi lakhi tuqhou kukuhoulo mlake ghenguno akughukilo suve, paye akilo panipu gholo atianuli pano tsugho qhiveno ighi.

Kimiyeno khisa hipaushou kughatha pukutsu kevalo, ikemu kuchou kiukeno tipau likhi ithitsulo; Anga akichiuno amipe 17 shia, eno ampe 19 ghi akumla tsuchemo Communist yeghilo. akhotono khristonmi qoye akumla tsuchemoke. Ilimi akichiu Limaye aza akusu-u eno pama pelimiyo tuchonike ghenguno alhokusa kumla mulano aqeqe suono akibolomi tuchoche. Apu akichiuye amipe 14 shia ikemu akuxu tipaqo ghenguno akukumusu alomove.

Ike amipe hamithiu, Apughi akughukilono pheve eno pano akilo ighino pakibo ithulukelo pakighini atughu-uye, Ipulo akiniu akughulo ilovepelo? Alhou! Niye amulo ghime hipaqo puluamoe. Ike pano akighini shikeutoi paye patinulilau Alhou shepe shikeu ghenguno akipimi tsuno ishiye akughu kiloani.

Ilimi Limaghi akumla lhokusa shino akibo tucho chekeu akumla ithuluvea, tiye Secret police avehupu shikeulono. Itehiye timi kumutsuno ikhilu eno agigihu panongutsu ani. Panonguno kiu chilukeno tipau pesuno police tsuani. "Itaghi kimiyeno hiye jusake pikevalo? Iye tiye kuchou; Ikemu hipauno oxine shimoaye eno akibo hipauno kusakusho shiakeulo akukuphu tsumlaveno kughuchove akeuye alokughunoshi akeu kukuhou qonoke.

AKIYEDO 3

Amipe 14, mutsuqhi akughukilo ngove. Tipau ghulokilo niye Bible ithumla eno kutau kakumo. Niye yepukunikeughi kumusumave, ighono akhu amuzuno eno heqhi kughujukeuno. Niye kucho yesulo akiyeqoghi kumusumlave, tishimo ampe 14, dolo imulolo atsa hipauye kumusumamoke: "Jacob no rachel ghenguno amipe 14, mlake" Ikemu paghenguno hiye adokitila likhitoi Li kimiyeku ghenuno.

Ishio adokushowa kumolo, nighakhulo aqhano ikuphukeu vecheono niye qhaqhipheve. Akhotono Americanlo lhoxu kumutsuno pisutsukeu ghenguno. Tishino ipulo ideo inipu ithulupe, Liye amipe 14, kutolo amikuchoshi ikhe aghike.

Ningu akuxu kithe ighono akhuavashi huthu, kughengu timi lakhi akughulo sauveaye thokha kumutsu palauno luvetsucheni. akughu lono ipeghi kelo Pastor lakhiye akukuho aghulo ithulucheni, tighenguno nighi Orsova kukuhoulo Pastor kumla itsu. Communist Department lakhino ivilo pikeuno timi kikihi 35, ani eno khilemu 36, nguno alauye ikomonikeushi kutughupua! tishino iviloghi noye adokumutsulo kihikusumi lakhikhi sutsa pesuno Secret policelo ighialopi, hipau gholalono communismo ghasughi peitha chekeu kukuhouke.

Ino ithiani, Ino kutsuaye timi kutomono ighino ininani tighenguno niye pekiphe kukuholoye mlamono tuqhou kukuhoulo mlauveke. Niye Tuqhou kukuhou hipau qhive

eno kumusumamo keghenguno, akhotono ino kimiyeke ghenguno . Athiu Americanlo khristonmi eno kutami kuto-mono nikuphu eno nighenguno inikhutsu.

Ghulolakhi ino aphughi lakhilo akusau kilo adokitila akulhoqhi-a, ike akusauno ikudano timi lakhi A-a kutauno ighiani. Akhotono kulolau kuamiqono niqhive momu kumusumamono ake. Ike kuchono khristomi aqo-aho hamino tuqhouno kuputsano akukuphu pesuno khristomi kiboghimevekeqotsu tinguno alaughitughouno kakujeli kutomo sughitsu.

Itaghi ino A-a lakhiulo ighikelo khristomi timi tsugho sholu, panongughi akukuphu kumlaghenguno. Panonguno adokushowa iputsa-ano panonguye timi lakhi ampe 14, akughukilo ano ipeghikeu kusho niye cheni ipi. Tileno ino panonguvilo tiye nike. Ikemu panonguno ipulumono tipi: Nino kumusu keuno timi tipauye ighono amulo ghimeshi aghi nani, ikemu noye ighono agivugai alokivishi ani, noye kumoe. Ino mutsuqhi-i panonguvilopi eno ilokiviye ino ithi-ani, niye aghimeqo kumusuma khavea. Asheshino eno tamomitheno tuqhou kukuhou ghenguno akukuphu ighiauve. Tuqhou kutsukime lono Bible kutomo ithulu, akupulu kaku eno imevekemiqo kibo ghenguno akukuphu kutomo ighi. Akukuphu hipaqo ghengulono Tuqhou kukuhouye azu-unguno alaushi mlalu anike.

Tilikhi kumono timiqono ningu kimiyepu Alhoutsu amulo lokughunotsu keukutomo sughitsu.

Imeakedolo niqholo pisutsukeu; "khunomu nongu kimiye moae, khunomu nongu kimiye moae, khunomu nongu kimiye moae. "Ikemu itehi ninguno American Khristo miqono pano kuxu tsuveghi ningu kimiyekeu piyeke. Ningu launo akukumusu luno tuqhou ghola kutomolono akukuphu kivit-suke. Panonguno secret policeno aki homuxape akeuloghi milisusuighino Bible sughitsukeuye pikhamlake.

Ikibolomiye khalauno akukuphu hipaqa ighimokeye xuaghimoni cheke, titoi kutami Pastor eno Khristo kibolomi kutomo susholuke. Ino pujushiju vekeu shepetsulu ani, tiye anhemugha nikuphukeu eno tinguno khije akukumusu kiv-ilonono nikuphukeuye, Europmi "Christian Mission of Great Britian". Nighenguno, pano timiye Alhouno kungumi puutsu-ketoi.

tuqhou kukuhou alau akiviulo idaithughi keghenguno, niye itaghi kumusakimishipu akiniu kughaluve kepushive. Ikemu hipau suche doloye khristomi aqo-aho akhoto kinino ighenguno ame Rs. 50,000 tsuveke.

Tiye. a) Norwegian Mission

b) Hebrew Christian Alliance.

Niye Kushiye communismi Yeghi Rumania qhivekeno.

Niye Rumania qhimokepu shia, kumusakimishipu shiaghimu-tsutsala tuqhou kukuhoulo sakiphemi qono adokivi itsuno aghakhu hipau qhive pemokepushiaye. Ikemu Tuqhou kukuhou sutsa alokughuno shiakeu yeghiqha laupiu peniye, panongu zuqhushi panongu ghime eno avehupushi akeu, tinguno alau; kulolau yeghiqhano ipulono panongu zuqhushi piutsupenike niye itehiye kulolau ani. Ikemu imuloye Tuqhou kukuhouqo gholoani. Ino Tuqhou kukuhouno imevekeu, panongu kupulu kumuto eno panonguno avehupu shiakeu muthakenapi aye niye Rumania qhimoni cheke.

Rumania qhimiphi zu-u, police miqono ghuthu kini ikunopi: iu poisa ighianipi. Ike Rumaniamino pano timiqo jekhave kughengu akuxu kijikusa vekusa ghenguno Communismino nighakhu hitoishi peithake. Panonguno highi ivilopi. Nino oghenguno kiupughu anikeno. Nono tipi aye oshou Rs. 500 luni momu ninguno nopekusu luveni. Nighi akughulo thonhei pulukemi lakhi paje Vasile Leul, Bishop. sasungo ake paye Austria lono pekusu luveno sasu Ruma-

nialo saighi.

Paumutsu kumutsu hejokhavetsu Niye itaghi Berlin lono pekusu luvekemi sasu ngoake. Itodologhi Rumaniami Italy lo ngo Paris lono pekusuve kemigholo ngoake. Itaghi panonguno alau ivilo pikeuye, nino oje shipusavetsuni noye ilimi sasu alhokusa kumla shiva ipino momu kupukami ipini. Kulolaumi akhotono American miye mulalei timi lakhi pulupusa venanike.

Hitoi ishikughuthuno ipulono kulolau ighipeke. Ikemu inguno alau kulolau kuamiqo ino sholuketoi pujushijuve kemi kutomo akhanikemu panonguye inaqhoi ngo akhani. Khamiye Communismino ghimeve pulaghino Communismi huthu acheni. tihenguno panonguno pulube keuno nighi inaqhoi ngovenanipi kumusuke.

Tishino ikiboye 1965 mpe lono Rumania qhiveno wuveke. Ino Rumania qhimiphilo ikumla ashekhauye akumo kilivelo wuno timi khu-u ikughalopi azahtsu keno axamunu pesuno pa kumolo bevetsu. Tishino ino Khristo lokivi kusajetsunike ghenguno ikuxupe tsunikeu kughatha. Niye Communismi kukhu ayehye mithi, ikemu timiqoye kimiye. Niye axineye mithi, ikemu axinemiye kimiye. Ino imulo kumutsu pesuno Communismi kimiye, kughengu Communismino khristomi heqhi, ikemu panongu lolo kikimiye ye heqhimlake. Niye imulolo kitilamu Communismi mithikeu eno thaigha keukuhake.

Judami apu asulo kughakichetsa lakhi ani. Tiye Judami Egyptmi wulo akuhu zughi lono susholuvono Egyptmi qoye azulono putsuqhive. Tile Kungumino ighino tokulule phe panongu gholosuke. Tile Alhouno Kungumi vilo Israelmi qoye lu Timi eno panonguye poka luvekeu lokivi shimonikesha? niye olauno itaghi lakhi ithinishi ani. Egyptmiye I-u miye kumokesha? Niye panonguye kimiye mokesha? Noye kushiye panongu ghimelono kughucho-ve anikea?

Kughono Joshuano Jeriko phu lekono, pano panhethi suqhepe kungu-u jukelo julo tile Timi lakhi phuthugho aghino pazuta kikihi peqhepesuno aghi, tile Joshuano timi tipauvilo wuno noye nilaumi keo? Nighumi kea? (Josh 5:13) Tsutsala tipauno Timi kepiaye "Niye olaumike ipiniche" momu "niye oghumike." timiye hitoi khochileve cheni. Ikemu khu-u Joshuano sholukeno Kungumi keghneguno khochiletsu nikeu khelho akeulo khilemu muthakeutsa "Nay" hipau kiquye, paye kungu-uno ighi, khile timi khumu achemo eno khuno laumimu kumokeno. Ikemu timi kumutsu pulonc ithipenike ghenguno.

Tile Timi kukumsu qhemilono piniaye, tiye Communismo sasuno mujochile chekeuke. Hipau kiquloye ninguye Communismi mujochile kepuke, panonguye, kukhu kimiji ghime sakuphumike. Ikemu khristomiye timi aqhokighemike, panonguye Alhou timi. Akimithe jukuvu sasu kusaje acheke-mike.

Tighenguno akughu ghime ashekha shilu eno kutuluke, hipaqo ghengunomu niye communismiye mithi ani-

kekumoe. Panongughi Alhou timike niye kishino Panongu mithinikea? Tipau zuqhulo niye panongu kusaukuchouke. Akusami kiqiye aghungu lakhi, Apu Alhou lakhike. Ikemu niye communismi ghunguye kumoe, kughengu panonguno Alhou-u Timi mithi eno niye Alhou kimiye kemike.

Tsutsala khualano ni injukelo, noye Communismi ghenguno keo? pano mujochile kemikea? Niye phephui khochile nani. Communismino Timi kumutsu mithike niye pano mujochile eno tokulu shimoke kutolo sasu aghushi anani. Ikemu aghungu lono "Niye" kungughalo Jisu gholo avea, A-a lakhi "Nay: ipikeualo, tiye Communismino ghime mlakeu alo. Panongughi ithi eno kimiyeani, A-a lakhilo kungumino ani tiye timi kumutsuno kimiji chekeu eno kuphunike puka-putsa ani, khu-u Khristo kimihikeno. Tighenguno ikimijiye Communismi yeghilo atsa kivi vekupha tsunikeu tishi anguno panongu pulono xakulu laghilo ighilupenyenoke.

Khristo khu-u lhou keno paye Communismi kimiyeani. Pano itaghi tipi Niye timi kumutsu kimiyeani, tiye Bheri aqhe gholo 99 amikuchomi qoye qhiveno lakhi puhavekeu phuke, apostolmi eno Khristomi sakiphe kivimi kumutsu aqhalo kikimiye hipau shikalukepu. St. Macary no pike, timi lakhino timi kumutsu kimiye qhi-i aye paye timi lakhi ghili likhiye kimiyemlake. Tsutsala timi kumutsuno amikuchomi shiveno milakhi likhino axinemi shiaghi aye, Jisu ye ighino timi tipau ghengulikhino agha shive aghini cheke, ikemu paye ayeghilomi ghenguno eno Timi kumtsu ghengunoke.

Khristomi qono shika eno kutsukeuye mutsumisheike, communismi ghi timi eno Khristoye panongughi kimiyeke. Tighenguno ningughi axinemiye kimiye axineye mithikemu. Communismino nighimekeu lono Khristo kikimiye alau ithike eno panongu alau kimiyelupeke. Ino Communismi kughukilo khristomi panongu phi-aulo ayikiche kighi akimishi kg 50, qhemino tsupeqhikeu ithuluke, ayikipitino ghimekeu, pan-

ongu kugho-kilo amiti yesutsuno adokushowa ngopeke azu kitilamutumono, kukhumuzukeu likhi, tsalakipetsu heqhi eno akumukono pichiqhi tishino Communismi ghenguno aghimeshi inikhutsu achenike. Hiye Timino shimplakeu-! Khristo kikimiye mlolonoke.

Athiu Communismi khunoqono nighimekeno panongughi hamiye akughukilo nigholo ighino ngoke. Panongu dologhi aghu-mi akhanikehu.

Itehiye ghimechekemino ghimekemiyo gholongove eno Khristo kumomino panongu heqhi thaighakelo Khristo miqono panongu shusho, momu Communismi dolo mutokile keughikuphu. Ino Khristomi kutomono panonguno api-nedolo asho apa lakhi ithuluchekeughi timi kutami tsuchekeu ithulu eno kusughuqo pesunoghi kumutsa akughukilo akemi Communismi tsuke.

Khristomi Prime Minister, Paje Inliu Maniu Rumania lo, panou akughu kilo thikelo pikeutsa ashekhau; "Communismi shou theqhikulu shinikeuye Khristo miyo kumtsuno alaghi-lalo ipeno pututa kuxusushomo ayesake".

Ino Alhou lau xaide ighike tsalalo kumsukeuye niye ado kushuwa xumo nanipi kumusu. Niye iphimpilo ighono ashuno qhutsu akeshi alaghilalo timi khijehi vechekeno, hitoi ilikhi iputsa, panonguye xaluveakemono? Tsutsala akukuhouqono axine shiveaye niye ayikihedo hami qanani. Kughengu Imulono timi kumutsu ghungu xakulu ghenguno alokumusu anike, tile Communismi qoghi sukuqha anike.

Akughu kuthoulo akelo niye azu-utoi akivishi inikhum-lake. Kughengu akhu-amuzu ghenguno atuthughi akivishi shemla eno niphi kumutsu ayikono aghi kuzupeno akeu nguno alauye. Tighenguno Ampeu kighinighi nighenguno ighono kushowatoi amulo tsumlake. Ikemu ikighini lakhi likhipi idechekeuye hike, Jisu Ino okimiye ani. Ike ighono akughushu tsala lakhilo Jisu launo khokichile ighike tiye,

“Noye ikimiye ania?” tighenguno ino kishi okimiye anikeno opiyeni. “Pai khavilo, imlolo amikuluno pititsu aketoi ighi. tiye akhopemi kinino Emmaus laghilo cheche kelo Jisu no pama phivilo ipeghino pama putsaketoi. Tihu nighike, eno ino palikimiye ithiani tiye khu-u ningu kumtsu ghenguno Cross lono thivekeno. Kikimiye hipaqoye Communismi qo launo kusuvemulae, panonguxineno akumokilivetoi aghipi-namu.

Communismi qoye Alhou zulo angusu kumlashi eno itaghishi aphi, ikemu azughi atughu tipau ghaqhivemla. Kughengu kikimiye akumuto akithitoyi, eno anhekushuye aloghu kighide kumokilivetoyi. Akumokilive tipauye timi kumutsu ghenguno, kinimi eno kumlho-mi, kichimi eno itimi, kivimi eno ghikiqhimi-tihutoi Jisu Khristo kikimiye kumutsu ghengunoke. Tighenguno xuchile luvekeu kikimiye tipauye khilemu ashekha shivemoke Communismi Alhou tsano tokulu shimoke thaqhulo.

Ghulo lakhi ninongo akeu kughuki, bokuthalo Minister lakhi vesuke, paye akithi kumlhoshi. Ajino agikumutsu nhachi aloqhi heqhiveke ghenguno. tighenguno ninguno time tipaugi qhutsu akelo akughumi hamiye Communismi ghusho-a, ikemu timi tipauno aghime kusashi ighaghi kimiyeno panongu ghusho kevalo! tipau zuqhulo panongu gheguno akighini shitsulo? Niye panongu ghenguno akighini shinishi ani. Hiye kiutoi puluthomi kela.

Ninguye Kiutoi Alokivi Kijeshikea? Akughukilo akeloghi.

Ino kughono pishipuwo ampe 14, akughu shikeu mpe jukeno, tiye ighenguno alokivi tsalatoyi. Khaniloye kumtsa akughushi akemi eno akughu khemi qoye ighono panongu kichiqhi khristomi qono aghime kutholo akeloghi alokivishi keulono. Aghime kije shiapimu ninguye ale kiphelono tavemla. Khristomi qoye tinguno alau alokivilauno ilhe keghi ilhe, kishi aghime kithikhi suchedologhi tishilukea?

Ino akughukilo akelo Jisu no pakhopemiqo vilo pikeutsa lakhi imlolo qhike, "Khunoqo nhethilono ithulukeno panonqo kumughatsulo." Itehi akhopemi qoye Palestine yeghilo panongu ghuzulalo aghime sholukeu lono ideghi. Kughengu Palestine yeghiloghi aghime tsuchekeu ghakhuke. Tile Timi kutomo ghime kithikhi sholukemi akhani. Hitoi pakhopemi qoghi kusukini sholu, aghimejeli, akhumuzu eno amlo ghime shike. Panonguno aki kumtsulo ilono timi kupulumi kivimi kughapesuno akughukilo sauveno aniputatinuli pulo amulo ghimeshi qapeke. Hiye jukivi yeghiqha kumokena.

Itaghi Jisuno pi, "Timi khunoqo nhethino ithuluvea kenno panongu kumugha tsulo. "hipauye panonguno kusukini ghime likhi ithulukeu kumoe. Ikemu panonguye xakulu-ghi ithuluveake, tiye tokulu ashekhau Timi Ikhino pulo kimiji chekeu. Ninguno atughulo apithe lhokusa lakhino atsunibolo mugho ikukeu ithulu kelo ninguno ithikeuye payiko eno patsuni kumtsu chuvetsukethiu ghimelo atsuni akiviu ishe ipeghivecheni, tiye hesakhamla kepu tsuni xamunu ipeghive cheni. tipau lokiviye Khristomi lokivighike.

Ningu gholo Job ghime nguno alau imekemighi ake ikemu ino Job kuxughili ithikeuye ashekhalo paye azu-unguno kikije kinishou ithuluveke. Ningu gholo amighiu Lazarus toi akhu-amuzumi eno kughuchove kemiake. Ikemu Kungumino pano thivekethiu Abraham mlalo qhiveke. Ike ino timi hipaqo itamughujui eno ighono shilukusashi akemiqoghi thoghu-uye tokulu kutsukuqho saxu ithulunanipi ithike.

Ikemu timi hipaqo ithulughi ino highi phuluke, tiye aghimekutsumiqo kuxu Saul no Tarsus lalochekeu sasuno kimighiluke, athiu Paul kuluvekeu. Kuchono hamiye xaide ighiluve tiye Secret Police lo kijemi lakhi nino Alhou shepe shikelono pululuvekemi lakhighi athiuye Khristo ghenguno akuxutsunikeushi kughatha ikemu paghi akughukilo suve.

Itaghi akughu khemilakhi akighi kipilino nihe akemi Paul ngo Sila pamano Philippi kughu kilo akeughili kumusulu, nino pumolukelo paghi keyino” Niye kishino xakulu ithulu nanikea? ike kuchono paghi tishive Alhou ghunguno putsano.

Ino akughukilo akelo Communismi ghenguno lajupu lakhi ithulu ike tiye, panongughi xakulu ithulunani eno avehupushi ani. tiye nino akughukilo akelono mlawu kepu eno amakho ithi eno aghimetsukeu qhemi panongu kimiye lupeke. Tighenguno ino kumsumamo keuye Communismi kughukilono Communismi lau puwukeu kumla (Mission) iqhiphe momu punulu ipi inoithoiluke.

Timi kuxu kiqilono pinikeuye ampe 14, akughukilo avekeuye adokushowake. Kucho Yesuno tipi “adokitila mlakeuye” Ampeu jukuvulo pekimighi nani ipi. Hipaqono achipiu kukumsulo Communismo piphekumla ngusu kumlashiaghipinamu kutu-ukulu shilupeke, ninguno imekeulono Alhou makho muthulupeke. Ighime lono tiqheli tuxaye puwove ikemu Alhou lau amipe 1000, lakhiye atsala lakhi-toike.

Kungugha Jerusalemye aza lakhiu kikimiyetoike. Communismi ghenguno xakulu hukikhaye khave akekumoe, panonguye Aghungulo muzutughu ani eno kutaminoxaide ighiaketoi penike ghenguno ninguno panongu kutughukepu. Tipau kumtsu kikimiye lono shilunainikemu kikimiye tipaue Communismi eno akukuholo sakiphemi kutomono peithachekeu lono. Mithi keuye anhethi icheke. Hitler ye Communismi mujhochilekemi ikemu mithikemiyo ghengulono panongu sasu aghushinikeu zuqhulo panongu kuphuno ayeghiqhalo kikije kuthushou tokulushike.

Ninguye akughukilono Communismi lau missionary kumla shinikeu kupughu huthuke. Atughu-u ningu kuku-

musuye Communismi ayeh kipemiqolau paghi. Mission director hamiyeh akukuhou xughili aghulo likhipi puaghinani. Tishi aye Norway ghakhuye kishino Khristo lau ighilukea? Atughu-uye akukau Olaf, Alhou lau saighikeulono. Russia lo Alhoutsa ilove keuye atughushi akukau Vladimir, kuluvekeu lono. Hungry loghi atughushi akukau St. Stephen kuluvekeu lono. Tihutoi Poland loghike. Ikemu Africa yeghiloye atughushi ashiaye dolo akhotou kulukeu lonoashiayeh kutami kumutsu Alhou lau xaide ighi akhanike.

Ninguno atughushi ayehkipemi, politicslo atomi, akighithimi eno kinimi kulukeulono, panongu vecheo mission kumla alautupuwulu cheni. Panonguno akiviushi timiqo ghungu tukumuzu, zulu eno putsalu cheni. Missionary tsalono pinikeuye Communismi qo-aho wuno akiviushi mlawolu eno atughishi ani.

Tsutsala ninguno U.S.A. President Mormonism chineyelo zuluve pinamu timi qoye momu America ye Mormon lo ighivenike kumoe. Ikemu Mao-tsetung no Khristomi chiney lo saighiluve aye momu Breshnev momu Ceausescu panongu ghakhu kumtsuno Alhou lau ighivenani. Kughengu thokha sakiphemiyo vecheono shiluchenike. Ikemu Communismi sakiphemiyo ye xaide ighilunanima? kuchouno shilunani. Kuchouno Russia yeghilo Communismi ayekipemi akichiuno akughukilono panongu kuxu puhave momu panongu dolo kijemi kutomo veqhi kileve. Tiye Chinalo toiveke. Kumusuju kelo Minsitermi kutomo thokha kuka panongu wulo akemu ashekhalo panongu kumutsu alikano veqhikhaveke. Itodologhi soviet Union lo Minister, Shepelin eno Rankovic, tinguno alau Yugoslavia Minister panongu kumutsu axinhe lakhitoyi pevechekeu alono thiveke.

Aghungu Lono Ninguye Kishino Communismi Leluni-kea?

Communismi yehkipeloye timi khu-u pulonomu alovi pemoke, pano timishi aghipinamu. Pano yeh kipeye kilivekehu putholoshi aghipinamu Secret Police miqo gari lono sasuwuveni keza. Ni-ampeuno Communismi kijemi kutomo ithuluveake panongu makho ighonosho ani Jisu Khristo likhino panongu kulhoqhitsu nani.

- a) Communismi ayehkipemi Alhoulau saighini pikeu kiqiye ayeghiqha hipau Nuclear ghushi lono susholu anike.
- b) Communismi ayekipemi Alhoulau saighiluni pikeukiqiye ayeqhalo ashekha kupughuke
- c) Communismi yehkipemi Alhou lau saighiluni keukiqiye Khristo eno Kungumi lokivi kuputsu anike. Hiye akukuhouno tokulu shilu akeuke.

Khilekhilemu missionary miqono mlakeu aloye ighono shoke, kuchouno New Guinea momu Madagascar lo aye khristomiyo ghenguno thokha akitheu shinanike. Inhethi ampino Communismi xaideghikeu ithiani, eno nighi ilhothelo Alhou pulumokemi tuqhouno alhokusa kumla kutomoshi cheke, Ike Communismi Alhou kuha ipichekemino xaideighive aye aloqhino Khristo kimiyeve cheni kughengu panonguye kutami nguno alau axine shikeghenguno.

Missionary kumlaloye kusakusho muloghime pukepu. Xakulu tsalo pinikeloye timi kumtsu ahiphi, ikemu missionary tsalo pinikelo aghimeye kumtsu ahiphi kumoke. Timi akhotomi athiu aghungu saighini keukumlalo avehupu shinikemi, tiye timi qhethonhe saighikulumi. Tighenguno Jisuno pakumla apu aghulolono ashekha shivemoikemu Jarusalem lono. Hiye ayeghiqhalo Aghungu kumlahukuthu kutsuke. (Head Quarters) Tihutoi Paul ghi Rome lo ighivenikeu pukaputsake.

Ninguye Alhou kumla (routine) adokihikutha lono shichekeu qhivekepu. Khunono Alhou kumla amikucholono shichemokeno paghenguno angusu kije ano. "Ninguno aghu shikelo mujochile keulono tokulushi cheni. Ikemu itehi kutolo akukuhou qoye Communismi qolau sushokeu likhi shiaphi. Tishino aghakhu kutomo Alhoutsa ilomokeu aphi.

Hipau kukhuayeh akukuhou qoye keyishi kilikepuani. Leshele lo, Alhouno pikeuno. Pano ayighutu ghathavetsuke, ayi ghutuye Paghenguno kitila likhi. Atughulo kukuhou qoye tuqhouno eno ayekumolono (illegally) mlakeu vecheono tokulushike. NIngughi tipau tholono mlanikeu shikalumoaye sake.

Communismi ghuloki kutolo niye kiushiye Kucho Yesu akitheulo timi kutomono aje atughu-u qhikeno: kumsujukelo; Simon ghi Niger ipi kucheke, John ghi Mark ipikucheke eno tinguno alau kutomo ani. Ningughi Communismi gholoye tuqhouje peithake. Niye khilemu Jisuno aghulhu ashekhau kutono pakhopemiyo vilo tipau alo wulopimono "wulo aphughi lakhilo wuno timi lakhino ayeghili pechehikeu ithulunikeneno, "Hipaço ino vethalukeuye ningughi tuqhou kukuhoulo akumla ghenguno tuqhou jemichi lakhi qhike eno tishino Communismiqo laumlake.

Tsutsala ningughi hipau kumlatoi pulo aghiaye-atughulo khristomiyo ghola papekepu, tishi anguno Communismi yeghilo tokulushi mlawolu nani. Ikemu ino khritomi sakiphe kivimi hami kulolau thu-uakemi sasu kusholuke panonguye communismi kimiyeni kuaulono panongu mithike. Hitoi keulono Communismi yeghilo Missionary kumla pekipe shimlano itehikutolo ani. Niye Karl Marx kilono Samaritanmi akiviu kikimiye phumlake. Timi lakhiye pano kiuphianikeno kuchou mthamu pulubecheni, eno tipau ghenguno thivenike kutocheni. Ikemu tughou kukuhoulo khristomi qoye panongu kupulu ghenguno thivenikeu ithitoiani.

Ino itaghi Communist kughukilo akiniu ilovekelo ikumla ghilipini. Aghime kutsu akitheu akithi kumlhoshive kugh-engu ino tuqhou mission kumlalo akuxu kumutsusuno mlathuveke ghenguno. Niye achipiu inju kuzupu ani: Americalo akukuhou sakiphemi Communsmiqo sasuno akusami shichekeqo, nonguye panongu ghenguno thivenike kutope anima? Panonguye alakhu ghengunolikhino kipelau miqo sasunoghi kutubo kuqhape ani, hipaqo kupulu toikeye akukuholo sakiphemi shikepukumo.

Noye kiutsa piphelunanike? Nazis, ghulokilo khristomi pesuno amilo vesumiphi zu-u, momu Onu pesuno amilo vesuakeu ithulukelo? Tihutoi Khristomino Communismi kughulo imeghi eno imeakeuye pipheno adouke. Niye akughukilo kumtsa Lucretiu Patrascanu, sasuaque. Timi hipauno Romania yeghilo Communist kukasughitsuke. Ike pa kughapesuno akughulo suvekeu kijemi lakhiye agho ithuluke. Paye aqho achipishi akemu papesuno aqho alo-mokemi kughuzumi kughukilo qhike tiye pano kughuzumi ilhomiphi kutolo. Panonguno tihutoi ano Pauker, laughimla. Paye azu-u Secretary aghakhū laka. Khristomighi aghime hitoikeu ithuluke, ado akichiulono electricno pitiqhikeu pachi.

Ayeghiqhaye Chinami phughilo eno alaghilalo kiushi anikeno akumusapu tipauye khristomiqo China kughukilo kiutoi imeanikeno ithumla kemikutomi ani. Kiyephi ashekhaushi Tsavipemi China yeghilo akhotomi lakhi paye akini ghovetsu, amili ghovetsu eno apukhughi ghichevetsu. Ikemu Communist yeghilono alhokusau panonguno timi phimipi pithivetsu keunguno alau tiqhelimi qolau akukumusulo tughusuvetsu anike. Panonguno anguka lono pano timi pesuno akukuhoulo akhotou shipeno akukuhou shipuhave anipeke. Panonguno lhothemiqo kutsukeuye Alhou eno Khristo pulukeu likhikumono ajeghi mithivepe anike.

Kiutsalonomu Khristomi qono imevekeu kithi ghime pitsumlae. Khunoqomi amipe hamithiu akughukilono akilo ideighikeno panongu ti-anuli launo atsa Ihokusachiluke, tiye Communismino Alhou kuhapikeu aqholo pisuvetsu kemiqo.

"Ino kaku hipau yetsu akeuye yeiji eno yekusutano kumoe! ikemu amulolo aji ijiqikeu ghimelono." Hipau pukhukibe lonoke; Daniel tsalalo lhothemi kuthu amilo vesuno ikhipekelo amixo munamoe: Tihutoi khristomi khunoqo Communismi kughukilo akeno kukhukimijixo Communismi mujochilenikeu munamoe. Axamunu nono Oulono hebhokelo agho tipauye axokutsungu ighicheni. tiye khristomiqoke, Communismino panongu ghimekelo Cmomunismi lau kikimiye alau piyecheni. Ninguno akughu khemi kutomo Khristo lausaighike eno ninguno kumusuchekeu pulouye hike, nino kiuanike no akiviu pesuno panongutsuke. tiye xakulu khikhi Nimpeu Jisu khristo launo ighikeno.

Niye akusami khristomi kutamino shikeutoi shimla, kughengu panonguye akupulu ghenguno panongu kuxutsuveke akughu kilono. Ikemu niye ipeghiveno Rumania lono chesusu kulolau ighiveke. Ino ighikelo kulolau akukuholo sakiphemi kutomono Communismi kimiyemoke. Tilikhi kumono panongu ghenguno Communismi yeghilo puhapuakeu ghunguye alokumusulu kuhake. Panonguno Mission pu-ukeu kumla Judami yeghilo, Muslem yeghilo, Buddhist eno Khristomi amuqo lakhilo kutamiyeh kululono panobocholo saighinikeu pukaputsake. Tishimu khu-unomu Communismi yeghilo puwukeu kumla (Mission) ghenguno akhoto shimoke. Tiye panonguno kuchou kikimiye muthakeulono. Tishimonapi aye Careyno Indiami kimiyeketoi eno Hudson Taylor no Chinami kimiyeketoi mission kumla alau ikowonicheke.

Ikemu tighi lukumukha kumoe kughengu panongughi Communismi lauye Khristo ghenguno mlatsumoe. Kulolau kukuhoulo sakiphemi kutomono amikucho kumolono akukuhoulo mlano Communismi saphukemighi ani. tishino Communismi pulono akukuhou shou eno ayeghiqha shou sakiphe shiluve peniyeno.

Communismi kimiyemona eno Khristo kikimiye pesuno panongulau piyemokeuye, tsutsala ninguno Khristo tsakiviu pesuno Communismi shoutokulu shimoaye panonguno kulolaughi tokulushive nani eno Khristo chineye nhuvetsu nanike.

Akiphi Xughili Kughucho Vekeu

Tiqheli atughu-u lono Khristo chineye North Africa lo ava-ake. Tishino ti'eno St. Aigistine, St. Cyrian, St. Athanasius eno Tortullian noqomi ipeghike. Ikemu Khristomi North Africalo lakhi kughuchove keuye Mohammedanmi pulono Khristo lau xaideghi pemoveke. Tipau mukhulono Mohammedanno North Africa leve eno tiqheli lakhi kutolo Khristomi nhuveke. Tighenguno ishikutolo North Africaye Moselim; qono qhasupe acheni.

Tighenguno ninguno kiuana hami xughili lono ithikepu ani. Kiu mishika kukanomu Communismi qhasuvemla. communismiye nuclear kuka ani, itehinomu aghushi akuthu-u huthuluve kepukuka ani. Tinguno alau kulolaumi Communismino aqholo pisuvetsuno pano sakuphumi kutomo ani momu Communist yekepe aghoshive penishimo. Tishino tamono apumi, ilimi dolo lhokusa kumla, drugs jeli, aids kusu, cancer eno tuberculosis hipaqo ghenguno aghushi eno aghakhu lono shipuhaveni ipiacheni. Ikemu Communismiye shipuhavenishimo.

Kruschevno tiqheli amuko-ulo (congress committee party) vilopike; Stalin no timi amikuchomi qhethonhe

shoupithive eno communismi pimivekeu ghilipi. Ikemu itehi kumusujulo? Itehi pano khristomilau kiumlakeno! Kruschevno Stalin shelokalu ikemu paye Stalinno khristomi laukiumlak-eno titoishi. 1956, mpe kutolo Soviet Russialo akukuhou tuxaye khavetsu eno azahtsumove. China yeghilo Stalin nguno alhokusado ighi, tiye akukuho qhaqhikeuye thokha kumutsu hekutsu luvetsu. Russialo eno Rumanialo Khristomi tsuluvekeu akitheuighi. (Russia loye itehighi titoi shia-phi)

Kulolau ghakhulo akhotono, kumusapu eno pishikiqhi lhothemi billion pulono thokha mithikeu eno akhotono Khristo mithivepe anie. Hiye Russia yeghilo khilemu shichemokeu kijemi lakhino akukuho hukikhalo ngono itimi khuno akukuholo ilocheghini keno ghaveno hapeve ani. Hipaqoye ighini-keulo Khristomi tiqheli pughatsu akeuke.

Khristo miqono alhokusa eno Communismi qhasuluveni-keuye akuka lakhiani tiye Khristo tsakiviu likhinoke, tighenguno tuqhou kukuhouye Khristomi kumtsu zuqhushi Communismi yeghiqha laumla anike. Akukuho hipau puxu anikeu eno kuphu anikeuye athikuzumi Khristomi imevekemi dololikhino kuqhakulu shianike kumo, ikemu akithimu akuxumu okukuhou eno oghakhu ghenguno tsuvekeulono. Akukuho hipau puxuanikeuye alokughunoshi akeu kukuhouqo lou likhino kumo ikemu mishika yekipe ililai kuqhopheve keulonoghike.

(UNDERGROUND) tuqhou kukuhouye kuchouno communismi ayehkipemi Khristo lausaighi vetsuake. Tiye Minister Gheorghiu Dej, paye akuxu xaideghivethiuno paxine kumtsu pipheveno thiveke. Communismi ghakhulo communismi Khristomi tuqhouno mishika sasu kihikusushikemi. Panoqo vecheono kuchou kikili saghitsu nanipi akupulu ani. Tiye kikili Tito eno Gomulka ghulokilo toimono, azu-umi yekipetoi akukakughushu eno Alhou

thakeulo. Khristomi kuqhopenikeu zuqhulo.

Communismiye itehimu pano sakiphemi shou pukhubeku ani. Panongu kiyephilo Stalin ye aqokitikhi ghikiqhiu eno Kruschev no inamouke. Tihutoi panongu sakiphemiyo akughushumi hipaqa ani. Rakosi, Gero, Anna, Pauker, Rankovici eno tinguno alau kutomoani. Ikemu communismi kutomono panongu sakiphemi mikucho sh-upukhube mlakeu ani. Panonguye Catholic miqono panongu sakipheu Pope kuhano aketoi. Panongu mulolo inaqhoivekeudo ani tiye Khristono iloghino ngolukepu ani. Timi mulolo alho-ayelono Alhou phukeuani, tiye aghungu kumsa akeulo Jisu Khristo likhino shepichilu nani. Atsa kiviulo likhino akuka ani eno hiye kuchouke communismiyo laughi. Ino ithuluvea, eno tishini putsake.

Khristomi ye Communismi no thogha, ghimeqhi, ikemu tipau kumtsu kumsumave eno akipimiqhivetsu panongu luthu laulikhi kumono akibolomi kumtsulau, panonguno shilukusa dolono kiuno akivikeno pesu communismi kuphuni-keu pukaputsa, tishino Khristo lau saighike. Akumla hipaqa ghenguno panonguye ningu kukuphu avehupushi ani. Tilikhi kumono, tinguno alau khristomi kikimiye ye aqhakumtsu lauke, panongu ghenguye khilemu agikujukuha.

Jisu no tipi Alhou-u khetsunheye akivi eno alhokusa kumtsu lau aphihihike. Tihutoi Khristomi kikimiyeghike. Tishiaye kulolaumi Khristomi sakiphemi communismi sasu kusa-paushi akeuye Jisu no shikaketoi nighumighi kimiyel opikeuke, ikemu khilemu Jisu ye nighumi kimiyeno nithikuzumiye kumsumavelo pimoe.

Panonguno kikimiye piyeno pukaputsa panongu Khristo lausaighike, panongu wulo Khristomi heqhikeuji apulaghino. Atsakiviu panongu tsukeu likhi kumono ghimeqhikeu ghi kumsumavetsuke.

West German lo Catholic kukuhouno ampe 7, dolo 125

million dollars shilukusamiqo tsuveake. American miye tinguno akichiumu tsuvea, Khrostomi ayeghilo shilukusami kutomo anikemu niye Khrostomi communimino ghiqhi heqhikemi nguno alau kumsukhamlae. German kukuhou, British, Americanmi eno Scandinavianmi qono akukuphu tsukeu timi kumtsu lau kusajetsu kepushi anikemu atughu-ushi Khrostomi kibo puhavetsu kemiqo lau paghi kuphuke.

Nighi Khrostomi kuqhakulu muqo hamino ighenguno ametsuveke, tihutoi khrostomiqoye ametsulu nanike. Atughulo Khristomi qono panolikhi pano vilo ishi injuke, akukuho akitheu shilukeuye judami ghengu likhino keo? Juda kumomi ghenguno ghikea? Hipau inju akeuye achipiu lono khochilevetsuani, tiye aghola kutau lono. Ishi, tiqheli amukuulo akukuhoulo akupuna ideipeghi akeuye, Khrostoye Americanmi ghengulikhino kumo, England eno thu-uakeu yeghi qha ghengu likhino kumo, ikemu kumtsu ghengunoke. Tighenguno Jisuno pike: "Ayeghiqha kumtsulo wulo eno atsakiviu pesuno timi kumtsu lau kutsulo", pano paji pesuno kumtsu ghenguno tsuvea, tighenguno timi kumtsuno chiluno atsakiviu shou pulukepu.

Ninguno amlo kumtoshi communismi lau atsakiviu kutsulu keuye kikimiye eno ighono puloniqhi-i keu vecheonoke, niye khilemu Russia lo lupunhakeu Khrostomiye ithumlae. Azu-u lhothemi communismi hamighi Jisu Khristo khopemishiluke, Khristono communis miqo kimiye no panongu pulono communismi yezah lono alokughuno shipenishike. Pano axinemi kimiyeno panongu pulono axinelono ighivepenishi ketoi, ikemu khami kulolau akukuholo sakiphemiqono shichekeuye hipau zuqhulo achipiu hami laulikhi shi cheni, tiye Communismi kuphuno pano pulono tokulu-u shikeu vecheono eno adokivi tsuvekeulono xakulu-u laghiye hakhave anipeke.

Iphevekethiu Niye Kiu Alaf Ithulukea?

Niye akughukilono ipeghiveke thiu, akiniu inipu gholo ngoluke, atughushi nikujo sholukelo lino ivilo ighinikeulo kiu kupughu anikeapi iniju? Ike ino li-vi lo aghungu kumla ghenguno kimikhi anani pikelo; Lighi titoi kumusupu aghi.

Niye ilhothe loye ighono phuithai luceke, ikemu akughukilono ipulono akukumusu iquighai keulono Alhou sasu kuposhu lupeke. Tishino pasapugha mulo iqunhei lupeke. Niye communismi ghenguye kiumo kumsu pusakeuye kuha, kughengu niye kungughalo kulapu-u gholo ngoluveake. Ino imulo kumtsu pesuno timi khuno nikutsa kungo keno pano ghenguno inikhutsu ani, eno imulo lono panongu kimiye ani.

Niye akughuki lono ipeghiluve nanipi khilemu akupulu shimoke. Ikemu ado adoshi ikukumsulo hitoi ighiche, tsutsalatsa ino akughuki lono ipeghive aye kiushi nanikea? Ino kumsu keuye akulhoqhiveno alokughunoshi Ampeu Alhou gholo auve nanipi khelho kumsu cheke. Ikemu Alhou ye "kuchou." Theology ye "Kuchou," "Bible ye Kuchou," "Kuchoulo." Ike Khristomino hipau kuchoulo xucheni. Tighenguno communismo kuchou kuhake ghenguno nighimeke, eno nipulo "kuchou" Bible eno theology kumsumave peno "kuchou" shoulukhi xupeke. Kuchou Yesulo hitoishi pipuani." Alhou Nuye nonguno huqhe mono akelono ighinani. "Nino aghime kuzu suchedolo akeloghi Ampeuno pakuvu nilau akughuputu toi yepuvutsuke. Nighime tsalaqoye ado kushuwatoivea, ikemu nighunguye ampeu launo alokive kijeani. Ino ithiani niye khilemu Ampeu launo aghungulo lokivi hipau phemonani.

Niye itehiye kiughushimo shinikeu pulomovea, tipau zuqhulo Jisu khristo kukuhou xaqheputhu ania. Hiye ino akughukilo akelono kimiji pulo chekeuke. Ike ino kughono akughukilono ipeghivekeno asheshino akukutsu kivimi eno

Pastor kivimikutomo akukuhou kututa lono sholuke, tinguno alaughu Bishop miqo kutomomo sasuno kusholu. Panongu kumtsu panongu kukuhou ghenguno akuxutsughi Secret Police lau asutsa tsucheke-mi. Ike ino panongu vilo aghimetsunami nonguye tipau qhiluvenanima pikelo; panongu kumtsuno "Moe" ipi khochile, tiye akukuhomi ghenguno panongu kuxutsu-akeu kupulu ino panongu launo alaf shiluke.

Aphughi eno A-a kumtsulo Secret Police mishikano thechushi qhipuani, eno police hipaqono kughokughomu Pastor miqo kuno aghimetsu eno injulu penike akuka tsupuani. Ikemu Pastor lakhino amikucho lono asutsa tsumoaye paye akumlalono ikhiveno kutami pathelilo suveno tuqhou ghili alau panongu vilo pipeke. Hitoishi Pastormi kutomono communismi yezah qholono akukuhou lakhilo akumla shianipe. Panongu dolo hamiye tuqhouye pitsuchemo ikemu hamiye panonguno injumokeu kutolo pivetsu cheni akuxu pukhanike ghenguno momu akumla ghenguno.

Ino chiluke Khristomi itimiqo pulono pano pu-aza thivekeu kibo ghili eno khilauno akukuphu ithuluchenikeno pipe eno tishimo napiaye panongu kiphi kihe lakhavetsu.

Niye ghuthu lakhi Congress Baptist hoholo suke, tiye "Red Flag" Communist qholono eno pano pulou lono shukiphe shino akukuhoulo sakipheu shipecheni. Hiye kiutoi akimithe-a shipixi keukea? Akukuholo alho ayelono Pastormi akivimi eno alhokusami acheni. Ikemu hino atughushi (Committee of Communist Party) no xathatsuno sakipheu shipe akeuye Khristo chineye eg nhuvetsu akeuke.

Lenin no yekeu; "Achiney kumtsu kukumsu, Alhou kukumsu, tinguno alau Alhou no pakukumsu iqh-evechekeu, kumtsu gholo axine alhokusauye aghungulo Alhou kukumsuke." Soviet Union eno Communismi yeghi kumtsulo Leninmike. Tighenguno panongu ghenguno achiney

ye cancer kusunguno alhokusauke. Highenguno panono achineylo khu-u pulono sakipheu shipemoaye sakeno kishecheni. Tishi keulono panongu sasuno kutubo kuqhano mulalu chenipe.

Niye itimi eno lhothemi kutomono Alhou kuhaipi keu kupululo tughu sutsukeu ithuluvea, ikemu akukuhouqoye tipaulo kiumo shitsumlae eno pitsumlae. Ino ithikeu nighakhu Bucharest lo khu-unomu itimi ghenguno kuputsa eno Sunday school shiaghikeu ithumla. Kughengu itimiyo kumtsu junishi pemokeu school lono qhuluveakehu. Hipaqo kumtsu ghenguno ino Communismi junishimoke ighimekeu lono kumono panonguno akumou shikeulono. Kughengu hiye Khristo jukuvu eno aghungu puhapuakeu "billion lakhishou" puhavetsu anike ghenguno.

Alu kichimi kutomo ayeghiqha lono ighino ino kiutoi akukuphu pekutsuanikeno iputsaighi, panongu kumtsuno shilukusa eno kumlhomi shivekeuye ayekipemi eno kinimi qono qhasuluvono ahu lono xumovekeu lono kumlhomi shivepe. Hamino ivilo pikeuno communismo panongu pesuno kupukami shitsuno akhu-amuzu launo pututa kialuloghi pukachupe. Factory lo kumlami lakhino ivilopike kishi kinimiqono mlakiphea kijeqolo kishi kinimino panongu chipiu-u luvetsucheni keno.

Communismi aloqhino ithisheve kemino panongu mulo kumtsu pesuno Alhou kuha ipi shikano akupulu kuxulo panongu khuti. Hitoishi ayeghi qhalo ishikutolo saje kuthuye achipiukumo kupululo panongu kuxukumtsu shipusavetsuani. Ilimi lhothe lakhino ighino ivilopike Lino Khristomi kimiyeke launo mumake ghenguno (Communist Youth Organisation) no Lishou atsa kughano Lino kutami khunoqo mumakeno ajepitsupe. Communismi yeghiloye thokha kumutsu lhokusa eno jukusake. tithiughi ino communist kukuhoulo akuxu kutsushi mla chekemi lakhi sholuke,

hamiye ishikutolo kughalumono akumla kishimighi aphi, ikemu akughu lono ipeghive kemiqono ivilo kumutsa tuqhou kukuhou ghenguno mlakuqha anipi panongu sasu ghi tuqhouno kuputsalupeke. Ike ino hileno pai imulolo ighikeu, St. Anthoni, Khu-u amipe 30 aghasulo kimikhi wuvekeno kumsulu. Paye ayeghilo kuxu kumtsu qhiveno akighini eno kukhu muzuache, ikemu kughono St. Athanisius ngo Arius pamadolo "Jisu Khristo ye akimithe ipikeutsalono kupunave keuchilukeno pakupulu kumtsu qhiveno Alexandria lo ighi, tipau kuphuno kuchou shou tokulu shilupenike ghen-guno.

Ino St. Bernard de Clairvaux ghi kumsulu, paghi kimikhi wuvekemi naghuto lakhilo, ikemu kughono paghi Arab lo Khristomi ghiqhikeu eno akumoki kumusa akeughenguno tipau pukhaniye kupunavekeu sutsa chiluno tipau chipiu sushonike ighive. Ino kughakuthashikeuye khristomino kiushichenikeno kumutsu shinikeushi eno Khristo launo shikalukeu gholalono. Hiye kiutoikeu ghushikea? Khristomi akughukilo akemiye alhokuthu lono pano ngu ghenguno inikhutsu acheni eno panongu lau Jukuvu shepe shitsuke kisino.xakulu ithuluvemo ayesakeno. Ikemu niye Communismi ghola tiye tughami kukhu-aye tipau mithi eno junishimoke. Tihenguno tuqhou kukuhou alau shikumuto lupeke.

I-u mission ye Rumanialo likhi kumusumono communismi yeghiqha kumtsulo ilokumsu kije anike. Ikemu ino kulolaumi sakiphe kivimi hami alokumusulu kuhakemi sholuke, azu-u kaku kihemi kini Siniavski ngo Daniel pamo akughukilo suvekelo ayeghiqhalo kaku kihemi kumtsuno mishika mujochileke. Ikemu kughono Khristomiqono akupulu ghenguno akughu shive keno akukuhou khu-unomu mujochilekeu tsapitsumoe.

Khuno athikuzu-u Kuzyek, ithitsukea; paye atsakiviu eno Khristomi kaku hami kutami jetsukeu ghenguno

heqhiveke. Khuno Prokofiev, ithikea! Pa-u sermon kutami tsukeu ghenguno heqhiveke. Khuno lbrimi Khristomi Crunvald, ithikea? Paye akupulu sushokeu ghengulono heqhive eno papughi communismo anguka lono saluvetsu. Ike ino ithiakeuye kughono Communismino ipu Mahai launo isasu wuvekeno niye ighono amuloghi me kijeshive.

Tinguno niye athikuzumi hipaço gholo aghimelo ake. Crunvald, Ivanenko, Georgi, Shecvhk, Tsaisya Thachenko, Ekaterno Vekazina, Granny, Pilat eno akinanipu kini, tinguno alau kutomoani kemu akupululo akughushumi hami-u ayikiche kighi panongu tughashi gholo vesumiphi zu-u ino mumatsukemi ani. Tishimu kulolau akukuholo sakiphemiqoye panongu kughuchoke eno akighini kikihiloghi panongujeye sutsumoke. Russia loghi akhotomi sakiphemiqo panongu zhechu keghenguno New Delhi eno Geneve eno ahoho kije hamilo panonguye agigihu kije ithulukhake.

Tishino Russia loye Timi kumtsu pulono pututa kupululo achipiu apenike lakukha shitsumopi kulha. Hipau ghenguno World Council churches lo sakipheuno archibishiop Nikodim mumake (Hipau tsaqui shitsukeu ghenguno.) Tishimu akughukilo kupulumi sakiphemi Kutomono aghane qhomonotsu, ino Jisu jelono asho kimughoikeu apa lakhi chuketoi.

Athiu tuqhou kukuhouno xakutha shinoipulo nighakhu qhiveno (Communist), communismi yeghilo Khristomiqo imeakeu eno Khristo tsakiviu kutami yeghilo vekuphatsu penike kulolau ighilupeke. Niye communismi ye pipusanipi xakutha shike Communist Secret Police ghi ivilo Khristo ghili kutsulo pike. Niye mutsumisheikeu tsakiviuye muthanoa; Johan baptiz no kutsukeukeo? Kughengu paye hipau likhi pimoe" Nongu xine lono xaideghilo, kughengu kungugha yekipeye kupunuvea." Ikemu akukau Herod vilo noye alomoe, "hipau pikeughenguno paye akutsu michevetsu. Jisu Khristo ghi mutsumishei keu sermon ku-

tsulo pimoe, ikemu khami akukuhoulo sakiphemino kutsukeu ghilighi pitsuke. "Ahakusapue, nongu Sadukimi eno Farisumi azubo kughunami ghenguno .. nonguye pighizu thiqhelike! "Hiye Jisu no mutsu mishei mokeu kukutsu kutsuke ghenguno Paye kross lo yedaveke. Farisumiqo ghenguno Jisu no naghuto lono kutsukeu Sermon ye kumo ithitsumo.

Axineye palikhi paje kucheni. Ishi ayeghiqhalo communismo kumtsu gholo axine akumusapu shi ani. Atsakiviu khikhino mujochilekeu kuhakeno atsakiviu kumoe. Tuqhou kukuhouye hipau ghenguno puthugho ani. Itaghi niye communismi mujochilenikeu xakutha shiani. Tiye khunoqono communismi kumokeno tipaqo piamoe. Hitler ye Communistye kumo eno panongu sasu aghumi ikemu paye timi ghimekeu shouye puthugho mlaveke. Ninguye axine ye mithi eno axinemiye kimiyeke.

Niye Kushiye kulolauno Imeanikea?

Niye Communist yeghilo nguno alauno kulolauno imeani. Akhotono ikukuhou Tuqhou kukuhouqo kumusukeuno. Akukuhou khikhi Latinmi no pikeu holetsa shikuputsukeno, "Nudis nudum christi sequi) kiquye, apho kumusa Jisu pa-peke.

Communist yeghiloye Alhou nu eno Pau timi qoye akutsu kibepumu ithulupemoke. Khristomi qoye kinimi shipemo eno akighi khilemu shipenichemoke. Akeughi hekutsu luvetsu nani eno aki kivi aniaye noye akughukilo wuvenia. Tishino communismo aki tilengoveno hitoi injucheni; opu kumo tileqhokesho? moaye nobolomi khuala tile kinipuanu kesho? Opu aza khunokea? Hitoikeu suchedolo Jisu no paza ngo pathikuzu-u noqovilo khuno ipupulou shitsukeno panono ipu-izake. Communismi yeghiloghi Khristomiye kulapu-u no kulaliu qhiveno wuveani, apu azano ati nuli qhiveno wuveani, akimino anipu qhiveno wuvepe

ani. Ikemu aghungu lono panongu pulo kuputsa kilelupeke.

Tuqhou kukuhouye kumlhomi eno imeakeu kuhouke ikemu akukuho hipaulo lupunha keu kupulumiyeye kuha. Kupulumi tuqhou kukuhoulo mlanikemiye amipe 1900, shou wovekeu kukuhoutoi, akukutsumiqoye theology phimo, homelitic mu mtha eno Sermon ghi mlamo. Theology alo shikukami kutomono Peter no Pentecost tsalalo Sermon tsupusavekeu picheni. Tihutoi communist yeghilo mla ake-mighi Bible akihedoghi akivishi mutha, kughengu Bible kumutsu wulo kuhakehu. Tinguno alau Pastor eno khristomi kutomono adokushowa Bible kuhano akughukilo ngoveke ghenguno.

Akughukilo panonguye tsala kipetsu Ampeu kighini "Ishino Ishi tsalalo chukepu nitsulo," hipau zuqhulo panonguye aghane aniba gholono sughino tsumu panonguye Alhou shikimithike, eno tinguno alau kimiyekeu Papu ipi pulu. Panongughi Job toi Pano niheqhivemu Papuluni. Panonguye Jisu toi, Pano krosslo akelo "Ipulo, Ipulo, noye kushiye niqhive anikea?" Khunono tuqhou kukuhoulo ighungu ithivea keno kulolau kukuhoulo sakiphe kevimino mla akeuye jupe aghaqimonanike

Niye communist kughukilo nguno alau imeveakeuye kulolau thu-u akeu kukuhouno thiakeu ithuluno ighono imlo kusashiani. Oswald Spengler nopikeu: 'ikiqive akeu kulolau. Noye thivea, ino noye mavekeu zungu ithulu ani, ino okini eno o-u puqumiye ithulu ani, ino noqo-aho hephovekeu ithuluani, nono Alhou kuha eno Alhou lakhilikhi ani pikeu, owu kulakupu hephovekeu eno ati anuli kimikhekeu, hipaqoji kuqono opithive anipeke. Hipaqo michiye azu-u ghakhu qono thiveakeu-Alexandria ghakhu, Greece eno Rome yeghiqha'

1926, mpelo yetsukeu timi yehkiye thu-uakeu yeghiqha Europe tuxaye thive eno tishisusu Cuba ghakhu kutolo ighi.

Tinguno alau kulolau aghakhu khamino zuaphi. Ikemu tile zupemokeu kuka lakhi akeuye Communist ke. Akhotono kulolau communist miqoye asutsa lhokusa kiusughi anikeno eno aghimekitikhi kiutoi tsuanikeno pulutsumono panongu kupulu amulo kutsushi aqhakumutsulau vekuphatsuke. Khristomiyo likhino kuchoukudau puthughonani eno panoguno tsuakeuye akimiki shepeke.

Tipau mtsalono kulolau Theology kighithimiqono amekuhakeu tsa hamikuputsa, tishino imulolo hipaughu kumusulu. 1493 mpelo Mahomet supahemino Constantinople suhuluve, eno tiqheli kutomo hipau kughakutha shia, Balkanmiye khristomi qholo ngovenikeo? momu Mohammedan qholo ngonikeno. Ike akukuhou qodolono kupunavekeutsa hamikuputsa: Akimithe mikucho Liu nhethi julhoye kiutoikea? Kungumiqoye kipitimikeo totimikea? Amiyi lakhi azu thakutsughu vekeulo ilovekelo amiyino thakimithevea keo? azuno shipusavea kea? Wovekeulo hipaqoye kughakiche likhi ikemu ishi kukuhoulo hamisholuno kupunave cheni. Ikemu communismo kiutoi khristomi peitha ghimekeno akushukulu eno hamilikhi pipuani.

Tinguno alau theology tsalo kupunavekeu ashekha aghile kuhakuputsa. Tishi akelo aqohamino hitoishi inju: "Tsalatsala nono ashukalo chekelo ashuka azulo iloveno akushukulu kaku gholo lakhi pesuno pokalukelo noye kiu kaku kishaiunikea?" Milakhino ishi khochile, "Bible thono", kutamino "Shakespeare," Ikemu akiyeuno hitoi khochile, Niye kaku khikhino kishino ashuka mlano, kishino pokaiunikeno, tishiangu no phinishikeu thaqhu philunanikeno tipauluni.

Kakujeli achineye kututa eno theology jeliqhino communismo ghimekelono shipusakhave tsukeu ghenguno amulo kusashi anikeuye, nikupululo theology lakhi likhi akeuno akhotoke. Tiye Jisu nopi; Kuchouno opelo ililailu

penani, eno alokughuno tipauno "Kuchou" tsucheni.

Wovekeu June qhilo Soviet kiyephilo Russia Baptist no axine piashé lovetsu keushi ati anuli heqhivelepi shikakeu pipusake. Hiye aqau ghulokilo Judamino ghiqhi mlachekeu gholalono ngukubeke. Ikemu hipau kiquye kiukeno ino Cluj kughukilo Rumania lo 1856 mpelono ithiani. Kumutsa akughushiche kemi lakhi Lazarovici, panga heqhivepi akipimi tsukeu ithiani. Paye amipe 30 likhi shiakemu aghimelono asa ghi mbakhave, awumutsu lakhimu kuhave kumutsu lejokhavetsu, papulono pano heqhimokemu pipheve peniyeno. Adokushowa imevekethiu pamikucho ghenguno paye pheve ikemu alokughuno ashiloye kuhave, kughengu aghikumutsu hechevetsu keughenguno.

Itaghi kiyephi Soviet Press no akipimi akukuhouqo tsukeujuno ighono junuqhi, tiye kiughenguno akipimitsu keno ino ithiani. Ningu nhethilo ighono kumusa kimishipu kulolau miqogholo. U.S.S.R lo archbishop Yermogvn, Kalugami lono ighikemi eno kutami Bishop panotsuniye khilauveakea? Panonguye Soveit suphami eno mishika sasu kumujoke, kughono alexi ngo Nikodim pamano communismi wulo akelo. Tsutsalatsa ino Bishop tipaqo akughukilono igholono thiakeu ithimokenapi aye Alhou-u timi hipaqo ghenguno ilokumsu aghinichemoke. Ino imulo kutholono l-u jukivi kupulu qhipuanike ghenguno akumla lhokusa ghukishi tipaqolo xukutsumae. Niye khilekela iqunhei keualo akulhoqhi anipi kumusu kemu tishikulupu shimula, kughengu communismo qohi akeloye.

Kughono Communismino Tibet levekeno thokha kumutsu hakhavetsu khunoqono akupululo amulotsu akeno. Ikemu nighakhuloye thokha kumutsu hekutsu luvetsu eno mlawopemove. Hipau iqunhei eno inaqhoi vekeudolo ino ighungu pulono hipau kumusapulono pojolu penike kumusuke. Hipauye kumusapushi aghinamu niye aghushi

hipau saphemo ayesake. Tsutsala ino inaqhoi veaye tiye communismo nikusuluveake. Kughengu niye 1948 mpelo, alaghila lono isunhe luveno akumou kipimi itsuno akughukilo suveke. Hipau ghulokilo Ni-u Secretary ye Anna Pauker, ikepano Swedish Ambassader Sir Patrik Von Reuterswaerds sasu kuputsakeu, Oh! Wurmbrand ye itehighi alaghilalo alachecheni Copenhagen lo. Swedish minister ye niye akughukilo anipi ithipulaghi ashepe hipautsua, hitoikeu akiniu ningu lau ighilu nasake.

Piniaye niye communismo iheqhive kepushiake ikemu khunomu iheqhivekepu kukashimla. Nono ighili lhokusa hipaqo akupuka, ashalha, kipitimi dolo lhokusa, akupuka eno mishikalau amikucho shimokeu, hipaqoye Secret Police no ghimekeu shikuputsu keulikhike.

Asutsa tsaquikeu lakhi ighikeuye kughono ino U.S.A Senate lo ikuxushepe tsukeno Rumania lo communismo niheqhi venikeushi xathave. Ikemu panonguno iphimipi heqhivena izhe puhavetsunike pukaputsa anamu niye khilemu iqunhei ngovemlake, ino kishi ghiche ghimeshivekeno nono olikhi ovilo iniku kiutoi Communismi kuka kughushuye kijekeno, kiukukalono panou timiqo ghimelu, kiukukalono East German miqo pulono bulldozer no itimiqo shouwulupe pano kibo puhatsu pemonike ghenguno? Kulolau miqoye zuanike panongu haputhulo!

* * *

Timi khami kutami ghenguno imekeu mutsuqheikeu phuphevenike ghenguno, ikemu aghimethiuno ighonosho eno niye tipauye shimla. Hitoi niye Kulolau hami kukuhou ghenguno Communismi sasuye kulashive malake. Ghukujuye panongu launo ighichenike kumo, hiye ighono aqashivea. Sakiphemi hipaqoye panolikhilano panopesuno khechishi shipeke. Ino kughono kulolau ikumla huthukeno Theology kiphia

kutomolo wuluke. Ike ino chilu eno sasu-no kuputsalukelo shikukami kutomono hipaqoye peithamovea momu akukuholo kuhavea. Akukuho lekulo phechekeu, Bible lo yezah, eno akukuholo akukhuaye hipaqo. Itaghi ino theology kiphimi lakhilauno chiluke, Bible lo atsutsu ayeghi lhotsukeuye kuchou kumoeipi, itaghi Adam, Noah tsalalo azu ighikeu, Museno akumuzapu kumlashikeu hipaqokumutsu shikupuve kethiuno tungukuputsa pitsu ipi, itaghi Jisu aghungu lono punukeu eno xuithughive keuye kuchoukoumomo kughakiche likhi. Paul no yekeu yesuye achipikumo eno Piyekusuye kughuzumi kaku ikemu Kuchou yesuye akimithe kakui. Hipaqoye Communist kiyephilo akimikiuke.

Iji isunalo sakiphemiqono hipaqo Theology kiphikilono shikaluani. Kishino Apu Alhou lau amikucho shilunikea, kishino akukuhou lau amikuchoshinikea, kughengu Alhou ye thivea ipi shikavekelo? Panonguye akukuhoulo akhotomike, ikemu Khristo ghenguno kumo.panonguye akukuholo sakiphemi khu-u adokusholono pa mpeu jechuvea keno. Kughono panonguno tuqhou kukuhomi momu shilukusa kukuhomi sholunikeno kutamitoi shino vecheuve cheni.

Tinguno alau timi shikipimi hami ghengu likhino pashou kughathabe keuye achipikumoe. Tihutoi Farisumi ghi panongu ghenguno Jisu ye achipikumou shiveke. Kughengu Jisu no panongu-u (Sabbath) ikhilutsu moke. Hitoi keu ghengulono Jisu kimiyekpushi akeu lakhavetsuke.

Kuchouloye akukuholo sakiphemighi communismo shipimiakeu ithulu akeuye achipiloke. Niye ghuthu lakhi Rumania lo Communismi Orthodox lakhi sholuke, ike paye pau bheri qoghi thoghaketsa piake ino pavilo anu kauve keughili pike, eno pavilo Julo: Alhou ye kiutoi kimiyekini keno axinemino xaideighikeughi ikhiluke, tinguno alau Bishop shiaghi pinamu xaideghi aye akipimi qhivetsuno saluvenani. Tishino alokivile lakhi phekelo paye Alhou lau xaide ighive.

Itaghi akughulo achinetomi Orthodox lakhi igholo-a, paye adokushowa kumolo khaqhi phevenikeu shia. achinetou hipauye Alhou kuha ipikeu kukutsulo akemi ikemu ino Alhou tsa pavilo pikeu ghengulono paghi pakukumusu kilive eno akughukilo kighithe ipeghimove.

Ino imulo imevekeu lakhi ani. Tiye ighono tuqhou kusamighi ipulupusaveke, tiye ighenguno aghime ithulu-pikeu ghengunoke, ikemu ino ithitoi ani lakhi, Claude ontefiore nopikeu, "Jisu no Sadukimi ngo Farisumi lau nongu musuinikemi kumughatsulo pikeutsa ghenguno."

Itaghi Dr. W.R.Matthews, paye London lo St.Paul School lo Dean ke. Pano pikeuno Jisu tsapilo pekuqha mlakeu eno pekithi mlakeu jukelo Jisu ye alokutsumi kumopi pakipimi qhitsuke. Montefiore, ghi Jisu kipimi shitsuke, kughengu Jisu ye Farisumi qono akipimi patsu anamu panongu kimi-yepi. Nighi communismi kimiye ani panonguno akukuhou ghimeqhikeu zuqhulono eno nighi panongu pipusa aghipinamu.

Khristomi kutomono ivilo atsa hipaupike, Communi-miqo kumusuma velo. Tishino aghungu kumla ghengu likhino shilo. Ino hinguno alau khristomi Nazis, yekipe ghulokilonono imevekemi sholuke. Paghi ikudausu anani ino Khristo shepe shiake thaqhulo, ikemu pano atsa lakhi ivilo pikeuye Communismiye mujochilekevelo pike. Ino pavilo inju. Khristomino Germany yeghilo Hitler miqo sasu kumujo keuye achipikumove kesha? Timi huno hitoi khochile, Hitler ye Judami million 6, pithive, tighenguno milakhiye pamujo kepuani. Ino itaghi khochile, Ikemu Communismiye Russiami million 30 heqhive, million shou Chinami heqhive eno Judami ghi kutomo heqhivetsuke, ninguye Judami ghengu likhino kumujoni kesha? Russiamiye kushiveno. Pano hitoi khochile, tipaqoye kutauke hinguno alau paye kiumo piwomlave.

Niye Hitler ghuloki loghi aloqhino imeve eno Communismi wuloghi imeke, pama dolo kiumo kututa kuhae. Kinikujolo kushukuqha ghimepu. Tihenguno ningu Khristomiye akupuna lakhi ghengu likhino kumo, axine ghengu eno Communismi sasu kumujo akeu likhino kumo ikemu alaghi ajelilono alhokusaqo sasuno kumujo kepu ani. Ikemu ishi khristomi ghenguno aghumi akijeuye eno kumusakimishipuye Communist ke, hipau muzochile anike ghenguno khristomi qono kuqhakulu lakhishi akepu.

Itaghi inopi ideani, Khristomino Khristo toi xuanikeuye eno susho anikeu kimijiye Communist launoke. Mutsuqheino panonguye kichile chiney ke. Panongu kupuluye timi lakhino thivekeaye amiti eno ayeghi kutau ilhovenani kethono kiumokumoe eno timi kuxu hipaughu tinhemugha lakhi kiqilono kethono kiumo amekuapuye kumoe. Panongu ghengun Panonguye aqo lakhishi xuanikeu likhi ithiani. Ninguno Kucho Yesu akitheulo tughakusa ghungu vilo oje khu-ukea? ipi injukelo, ninguye kutomo ani, ipiketoi panonguye aqoshi xuanikeuno panongu pulouke. Panonguno pikeu Alhou no aghotsukeu gholo akijeuye timi lakhi musuiniveni keuke. Panonguno timi lakhi akughukilo suve, ike timi hipau wulo Alfred Adler, noyekeu, "Luthu kukumusu," ipikeu ithuluke ghenguno kijemi Secret lo policeno hitoi igha oh! Luthu - alhokuthu luthu! kushiye aqoshivemokea? Hipau kipimi ghengu likhino akughushike.

Ikemu Jisu ye ningu vilo alikhi amipi (luthu hipau) akivishi peitha alo pike. Tishi anguno Communist ngo ningu dolo akupulu kututashishi anike ghenguno. Communismo ithiani (achiney ngo phuiko) kumadolo, tihenguno panongu kiyephi eno Magazine qolo hitoi yepuani. "achiney ye khilemu Communist sasuno kimi ghimlae."

Hikuma doloye tiqhelilo kuqhaluke kumono kupuna chenani, timi lakhino phulho sutsukeu yeghiqha hipaulo Alhou

phumla keu eno kuhae ipikeulo xuake thaqhulo paye akupulu eno achiney loye khakutha kughu ghimelo alhokuthu anike.

Khristomiye Communismi sasuno kumtsa xukuqhalu nani keshu? Hiye Communismino khochile. "Communismiyi akithi chiney qhou anike."

Niye akiniu tuqhou kukuhou ghili pi idenia. Akukuhou hipauye ighono ado aghuloki lhokusa dolono mlaighikeu. Kughengu Communist ghakhu thaqhuye Alhou kuha ipichekeu yeghiqhake. Panonguye aqaulo wovekeu timiqo kupuluye aghulo likhi akhoto shitsucheni tishimu itimi eno lhothemis qoye khilemu tipaqoye puluchemo. Aghakhulo alebo, T/V, putoju, aghilia, kaku mlakiphea, hipaqo kumtsulo Alhou puluchekeu ghapinhe vetsunike ghenguno puka-putsa acheni. Tighenguno tuqhou kukuhouno pukaputsano hipaqo sushonikemla acheni.

Tishimu tuqhou kukuhoulo sakiphemiye Theology kiphimi kuha eno Pastormi hamiye Bible ghi phikhamla kemino akheu kumlashi ani. Timi khijeno angu agha tsuveakeno inopini. Ninguno Russiami lakhi Alhou shepemi sholu ike pavilo khuno oshou angu agha betsukea ipi nino inju, ike pano khochile. Niye tsaquyi anguagha nitsuni kemikuhae. Kughengu Bishop khu-umu Communist partyno akukatsumokeloye tipau peithalu chemoe. Tighenguno nichighi akumokilivelo khile azu-u Bishop qhopuakeno tile wuno mikinino akumo inape eno kutamino tipau suhopeno Alhou lau akuka khuno ninguye aghungu kimitheu lono anguagha ithulu no, nikupulu alaushilukeuye ninguyey Jisu wulo azaku akeukuka vecheono nishou betsuno akuka ithuluke.

Ighengu loye hi lhothemiqoye Alhou zuloye akukhu ayehlo kuhakeu ipiluvike, eno angu agha betsunike ghen-

guno theology phimokemi eno Bible akivishi mthakemiye Jisu khristo kumla shimplake. Ikemu hiye wovekeu tiqheli atughu-u kukuholo mlaighikemiyo toi, panonguye khu-unomu theology collegelo wumonamu Jisu tsakiviu pesuno ayeghiqha pepide pukhu vetsuke. Panongu kumtsu phikulumi kesha? Panonguye Bible khilauno ithulu eno khu-u launo chilukea? Ikemu Alhou no panongu vilopike.

Ningu tuqhou kukuhoulo mla akeqoye akukuhoki jukivi shipuamo, ikemu akukuhoki nguno nino aghasalono kuhono pishipuku atsutsu ithulu keuwuno jukivi kumokeshea? Aghau lejo kivino ningu leboqo shicheni, axamu-nu jukivino niu tunatunu shicheni, itamughujui keu phiminino (akughu phimini) achinetomi qono tsuqhipu akeu phimini shicheni, aqhi khetsunheni niu akuluqo eno akuvutsu cheni. Tishino kungumi qono ningu suhope acheni. Tighenguno niye khilemu akukuho jukivi ghiliye pitsu khamulae. Hitoishi tuqhouno akukuhoshi akeloghi Khristomi kughaluve kemiye akughulo sauve cheni. Tishino akughulo akelo alokivishi ayikiche kighi khapu kulapuno kulaliu launo shunano shikeu wukukha ithulu aketoi. tuqhou kukuhouye aghime tsuaghipimu kimi-yekemi kusami kutomo anike. Secret police eno mishika kumlami dologhi tuqhou kupulumi kutomono ningu kuphuacheni.

Itedolo, Russiami kiyephilo pulumokemi ashoumi timi ala ikuwovekeu akipimitsu, tiye kipitimi eno totimi hesakhakumlano Communist mishika qholomla ani. Alaphachekeu officelo eno kutauqo kumtsulo, timi hipaqoye ashouye Communismi eno tuqhoye kupulumi eno tuqhou kukuhoulo kuami.

Itaghi Communist press, lono totimi lakhi alaphakeu officelo mla akemi ghilipi, panonguno tipi, Liye akumla thiu A-a lakhilono Li kimisholuno athiu lhothem amuqo lakhi sasuno aqhouno Bible phi eno akighinishi. Hilikhi kumono

Communist phughi kumtsulo hitoi kupulumi ipeghi ani. Thousand 10 (chighi) shouno ashouye momu pekipheshi pulumokemi khristomi kutomo ani. Panonguno kumsukeuye hiuno akiviu akukuhoki akeuye, tishi anguno qouakeu tsakiviu likhi chilukepushi. Akukuhokilo eno officelo akukau toi iqano eno kutami-a vekhapesu Alhou tsakiviu agholano shianikeu zuqhulo.

Hitoy tuqhou kukuhoulo kihikusumi qhetonheno qhetonhe shouani, ikemu kumtsu tuqhouno A-a kututalono kuhono akukhu kighinido luacheni. Russia loye itimi eno kichimi baptiz tsukeu, Pope no shipimimokeu hipao sasuno kighe akepukuha. Panonguye ampe qhetonhe lakhi ighiniye akeu eno tungkuputsamu puluchemo. Ikemu ino ikichiqhi akeuye panonguye Alhou kuha ipino Alhou acheghikeuye kishino phulukeno.

Panonguno Alhou kuha ipi khochileni keuye ighono mulalei. Tsutsala aghulhulo okusauno ashakha jelikumtsu lhono otsukelo tiye khuno mlakea?

Itaghi alhoaye lono aghikeu, beghuna, alu, axajeli, mujothi, akichizu, akhikichizu kungo eno tinguno alau timino peitha chekeuye khu-uno kutope qhitsukea? Alhoaye ye anhethi iche, eno nono Alhou pulumo tishi aye anhethi kighicheye kishino tipao lhotsu eno kutope qhitsulunikea? Alhou nguno alauye khiumo kuhae.

Panongughi ashekha kuhakeu kuxu achenipikeu phulu ani. Ino chiluke timi lakhino Alhou kuhaipi chekemivilo: Tsutsala ninguno aza polo azugho akeuvilo noye hiye adokitila ghenguno tishini ado kushowa kumolo noye ashekha kuhakeu kuxulo avenani ipi pikelo kishi khochile nanikea? Noye hitoi khochilenani, Alhou kuha ipichekemino khochileketoi. Ninguno kughono atsutsukukaphu ngo amiyizu ghili ovilo pinikeno. Pano pinikeuye aza polo akeuye akuxu lakhilikhi eno tinguno tilauye akupulu ghuzuke. Ikemu azapolo

akeuno kumusulu cheghikeaye hitoishi kumusuni cheke, I-u eno ipukhuye thu-u ani. Niye panongu avehupushi amoe, kughengu akivishi aghuchokulupu shimokeghenguno. Ikemu hiye ighinikeulo kuxu ghenguno kenia, tishino ino panongu pesuno akumla shinani. Inhethi ghi ikoipeghi ani niye alou akuzulo ngoanino hipau avehupu kuha, Ikemu ayeghiqhaloye akuvu ani eno avehupu shinani.

Tihutoi aza polo azugho akelo paphilo thu-u akeu eno pano ithumlamu akuxu ananipi ithiaketo ni ngu timi kuxughi titoiani. Kughono nino itimi shiakeno thokha kumsu acheni tishimo achipilono peithalu cheno. Kughono kichimi shikeno akighithi eno alokutsulo thu-uve cheni. Tithiu akithino nikhe auvecheni. tishi aye kushiyeno akighithi eno alokutsu akhotoshi cheni kea? Ninguye alhokuthu peithaluni chemomu. Ikemu ninguye akiqheulo qenikeu kutope eno akithi kutau hasusu wucheni.

Pekipheshi, Communist ye Jisu Khristo acheghi momu ani pikeu khilemu puluchemo, ikemu ninguno hipau mlalei khochileve nikeuye: Ou jolabolo kiu puchenikea? Timi kumtsu wulo amipe hekusa (calender) pucheghinani. Aha! tipau ithulukelo January-Dec, 1964. Hiye khileno kibi ighikea? Communismiye khilemo Jisu Khristo ye kuhaipino kishino papunu mipelono kihisusu ighikeu mpe pepimhe chenikea? Pano ighikeuye timi kumtsu ghenguno aqauye kumtsu wova eno thokha akitheulo ani. Nongu Communist kiyephi loghi Jisu Khristo ye kugha kiche likhikumopi phuluvea.

Ashou kukuhou qolo Pastormi kutomono Communismi sasuno ghokuna kuqhape eno kumtsa mlawochekeu ithulu ani. Pekiphe kukuhou ado kushuwa lono Communist xughulilo ani. Hiye Russiamino socialist ghushi huthuvekeu mtsa, "Xu-akeu kukuhou ipi" achinetou Sergius no huthuvea. Xuakeu kukuhou hipauno Moscow lo shuphekeuye, ninguye akukuhou alau thu-u anikeu ghenguno kumo, ikemu

kishino achiney pughave eno nhuvemo ayesakeno. Hiye kiutoi jukivi kupughu akukuhoulo!

Hitoi Sergius papemi apughi kumtsulo ani. Hungary lo Cathilic mi Father Balogh, eno Protestant kukuhoulo sakiphemi ishi kuqhano Communist sasuno aghakhulo hipaço lakha acheni. Rumania loye Communismino akuka ithulukeye achinetou Orthodox Burducea, kukuphulonoke. Axine azu-u shipuakeu nguno axine alokusau! Hiye pano Communist Party lo Secretary Vishinski, gizulono ashoqi shi tishino Communist mishika akitheu huthulu: "Mishika hipauno ayeghi kuka Lokughuno huthuni (paradise) tishi aye atsutsu kukaphu avehupu shimove nani.

Russia lo Archbishop Nikodim, akiyeloje aghimokemu Secret Policelo kijemi lakhi Major Deriabin no pikeuye paghi tuqhouno Communist gholo mlache ipi. Rumania lo Baptsit kukuhou qoye kumtsu atuqhudo hitoi angukalono peitha acheni. Russia loghi Baptsit kukuhou qoghi hitoi ani eno hitoikeu lono kuchou thave acheni. Rumania lo Adventists kupulumu Tachci, paghi Communismino akuka ithulukelono ishi kutolo Secret Police tuqhouno kuphususu ighianipi. Hiye akukuho khavetsu pemonikeu zuqhulono, kughengu akukuho qhethonhe shou khavetsua eno hami akhotomi panonguno peithano tipau lashelono pishipipe juno Khristomi qono tuqhou kumlashikeu juno khristomi ghasu hasu acheni. Hami vilo pikeuye nonguno ikuwoluaye tishialo eno athiuye nigholo ighivekepushi eno nino peithano khristomi pishiqli anike. Ike nighi atuqhudo hitoikeu lono ipulono Pastor kumla shipenike itsu eno atsalalo asutsa tsuani-keushi. Ikemu tuqhou kukuhouye azah kutsuqholo ngono amekuapushi tsavipe kumla zu-kuamilau, akhotono Lhothemilau mlamulake.

Tishimu pekipe kukuhoulo sakiphemi qoye akupulu kuxulo akumutoke, aghime hipaço kumutsuvecheono.

Panongu kukuhou qoghi ighono akupululo akumuto, tiye panongu sakiphemiqo ghenguno. Akupulu eno akukhuyehqo kilimono momu ithamono ngokeu ghenguno akukuholo kihikusumiyo mulolo Alhou tsa akivishi pisutsuke. Tishikeu lono timi kutomo sasu Alhou laughi aghime dolomu eno tuqhou police miqono ithiapulaghino, Alhou lau xaideghikemi qoghi panongu kupulu tuqhoushike. Hiye Alhou wu akic-hiqhipu kumlakethono timino kumoe. *Leviticus* 2, lo hitoi aholetsauno yepuani. "Khikhi shipixi vekeuthi xusunikeno akimithe shivenani." Hitipi akeuye pekipe kukuhou eno sakiphemi kumutsuno Communismi tuqhouno kuphu akhamoe.

Tuqhou kukuhoulo kupulumi qoghi ashoumiyo sasuno lakhishi acheni, ikemu hamiye tuqhoushi kemighi kupulumi ani, akupulu ghushi ghenguno. Rumania lo Police miqono Vladimireshi chineki khavetsu nike ighikelo panongughi ighono lhokusa shive tiye Communismi hamino panongu kuxu pe ajumetsuve akupulu chiney pulono xuapenike ghenguno, eno lakukha ghenguno. Tithiu akhoto kukuhouye aghuloshikitheve. Ino akichiqhi akeuye Soviet Union lo akukuhoki qhetonhe pungu ngo tsugho likhi ani itehikutolo. (Ikemu United State of America loye qhetonhe aqhe kuthushou ani.) Akukuho hipaqoghi akikije kumo ikemu bokutha aghulolikhi nino ajulhoghi qhopepuanike. Ashoumi xukujumino ighino Moscow lo timi kutomo kuhoaghikeu ithulu kemu aphughilo Protestant kukuhou likhi. Tishi aye tilehiye kiu khaqhiphevekeu anikea? Tuqhouno alokivishi asutsa mishika tsu achenikeno ku-u. Panonguye akukuho lakhilo aghungu million tsuni shou puhapuakeu vekusa ithimoe. Aqokithikhi hizhejehi kumusumave keulono tuqhou kukuhouno tsavipe kumla hipaqolau shiacheni.

Aghakhulo Communist kupughu alau thu-uaye tipau mutsalono, tuqhou kukuhoughi thu-ulu eno alau ikuwolupe

cheni. A-a kutomo lono akukuhoki khavekeu lono panonguno kichileu chiney ghasuvenikeu (anti-religions) kukuputsa-a shi acheni.

Tuqhou Kukuhouno Kishi Alhou Pulumo Keu Kakujel-iqo Loji Anikeno

Tuqhou kukuhouye kishino Alhou kuha ipikeu kaku jeli lojimoaye sakeno ithiani. Aghano Elijah achuqupu peono lojiketoi. Kughengu Communismi kakulo Bible tsajo kutomo pipusakeu ani eno ighono shitsashi yepuani.

Panonguno kaku lakhimla tipaujeye "Bible pulukemi eno pulumo kemi ghenguno" Panonguno tipau kakulo Biblelo atsajo kutomo ikhipheno pipusaghi thano julo! kishino hipaulono alovi chenikeno! Kaku hipauye panongu dolomu akhotoshi ikhilu chemomu kaku hipau million shoumlano kulha, kaku hipaulo akichiuye Biblelo tsajo pachike. Communismino Bible tsajo tipaqo thave aghi pinamu ighono juvike eno Alhou tsaye kuchoushi anani, tsutsala tughamino tipau lo ikhipheno piaghipinamu.

Hitoishi Communist presslo yesu qhethonhe ithuluno alau kaku hipau mlaphe penike qhuiniju tishi anguno Bible eno khristomi thaigha anike ghenguno. Ikemu yesu hipaqoye tuqhou kukuhou lono ighianipikeu mtha, suchouloye Bible lo tsajo eno akiyeqo alu tishikeulono kulhaluani.

Itaghi kishino Alhou kuha ipikeu kukuputsaghi peithanikeno ithiani. Communismi collegelo shikukami lakhino aqokitikhi kukuputsa lono pikeuno Jisu-u zadu kishimi nguno alauye kumoeipi. Pano atsapi akelo ali lakhilo azu supuani eno pano amukhu sughino azu tipaulo sukelo azuno huchui ajalho kilive. Tile panopi, hiye akichiqhikepu! Ike Jisu ghi amukhuye kusupe puano azulo suno atsaizu kughulhoke, eno hipau kiqilono akumuzapu kumla mlake. Ikemu niye itaghi Jisu nguno alau mlalunani. Tiye atsaizu pesuno azu

kughulhove nani. Tishino pano itaghi amukhu kutaupesuno tipaulo suidekelo miyetsughoive. Itaghi amukhu kutau sukelo huchui kitheve. Tile khristomi lakhino puthughono, nono ningu kumuzavea, akijeu noye kishino tishishilu anikea? Ninguno lakhilikhi ovilo injuni: Ozu tipau kitila shojulo. Shikukauno tipi, niye khilemu shimulae, "Kughengu azuye tughuke." Khristomi huno khochile, Mutsugheino hiye thokha kumutsu noye Jisu sasuno kutuquani. Kughengu Jisu tsaizu vecheono alokivi nitsukeu ampe qhethonhe shoushivea ikemu nono nitsukeu tsaizuye nighenguno tughu shiveani. Tishino khristomi hipauye akughulo wuvekemu asutsa hipauye aqhalo wuve eno akupulu alaushikumutolupe.

Ninguye miqemilei ani, aghulou David toikemu ninguye Communist ghenguno Goliath nguno akumutouke, kughengu, Alhou no nikudau ani eno kuchouye ningu wuke.

Itaghi Collegelo shikukami lakhino akukutsu tsua, eno hipaulo akumlami kumutsu ighino supenikeushi, kemu akumlami dolo akichiuye khristomi, panonguye tsaqui Alhou pipusakeu eno Jisu khristo pulukeu thakeu inia. Tishino shikukauno alau ayeghi hipaulo aghungu kuha ipikeu piwo, tishino Alhou kuha, Jisu khristo kuha, hipau kuxu thiuye kiumokuha, timiye aghungu kuhakeuke. Pano hipau pi-ide eno tinhe mugha qolikhino akuxu kuau momu akhotoke. Tile khristomi lakhino puthughono pano iqā akeu tukulovetsu eno pagilo ghavetsu. Tile akukutsu-uye ighono pamulo ideve, tishino Communismi kutami qono Khristomi hipau kughaluve.

Tile pano hitoi tipi, noye kishino ighalu nanikea? Kiu kiqilono; Khristomi huno khochile, nono okutoshino olikihi noye akimikiuipi phuluvea. Nono tipikeuno kumutsu tinhemugha likhieno kiumo kuha, ipikeu ghenguno niye olukha pesuno oveanike eno tiye kiumokumoe ikemu tinhemugha likhike. Alukhaye amulo idemoe, paye tinhemugha

likhi. Ikemu ino alukha pesuno ovekelo noye alukhatoimoe. Noye okutashi ani. Khilemu tinhe mughaye izuve momu amulo idechemoe, ikemu noye tihutoi shi anino. Tighenguno shikukau noye pimi ani. timiye anhemugha nguno akhotouke. Ninguye aghungu akeu phimipike! Hitoikeu kutomo tuqhou kukuhoulo khristomi kighithimi kumomu Communismi sasu akupulu ghenguno mujochile acheni, akumutoshi.

Ino akughu kilo akelo lashikami kijemi lakhino akumutoshi ivilo noye khitohi kutolo ou lhokusa chineylo anikea ipi inju? Ino hitoi kho-chileve, "Ino hesakhakumla Communismi akithi zualono Alhou kuha ipichekeulo akemino kumusu chile amulo ghimeshikeu ithuluvea." Panonguye tileno khristomi kuchen. Nono kumusu keuye khristomiye khileno kumusu chilekea? Kughono akithino kupunu ighiv-erkeno, khristomiye Marx momu Lenin kuno xalupe chenikeshea? Paye nu-uve ino lotsuloghushi khochile keughenguno. Ikemu ino itaghi alaupi, Engineer lakhino akupu shikelo akhosano tipaulo wulukeye ghenguno akupuye aloanike kumoe, ikemu ayikulu kijeno tile wulu anguno akumuto ithicheni. tighenguno noye thokha kumutsu achipishivemu pulumokeuke, (atheist) kiuno kuchou pulumo keukeno noye phuluamoe. Ikemu niye Lenin kaku lono paghili phulu keuye paye Prime Minister, Soviet Union lo Shivekethiu paghi akighini shike kughono shilusavenikeno.

Ninguye iqunhei eno iqunheikeu lono ado ghuloki thuu akeucheju acheni. Ikemu Communismi qoye iqunhei mlakeulono achiney junu eno pipusa thaigha acheni. St. Augustine no pikeutoi: "Iqunheikeu mlo shou pemula aphikutolo."

Kishino Communismi Shoughi Tolupe Kea?

Tuqhou kukuhou, nongu ililai akeu kukuhouqono kuphulu

aghiaye kushiye communismi mulo putsaluno ayeghiqhalo kikili sughimonikea? Atsughi palikhi pashoghi minhe chenike, Communismino akumou lono thogha aghipinemu panongu shou tokulushinani, kughengu pano ghenguno alho-aye lono acheghimokeu kehu.

Communismi kumutsuno tinhe-mughano kumutsu gholo akhotou, ninguye kiuana mukhu awu kiyelakhi peakeutoi eno itaghi thiveaye amiti momu kiuana ghuma ilhouveni. Hino kughokhamoke panongu vilopinikeu. Kishino ayeghiqha kutomolono Communismiye amekuhakeulono pano kuxu tsuveakea? Awu kiyelakhi mukhuye ame anikeshea? Tishi aye kishino aghuma lakhiye kutami kivipu ghenguno akuxu tsunanikea? Hipauye panongu ghenguno khilemu khochile mlae. Tishino kimiye keukhamu, timi ye akughushu yikusalono lhono akughushu tipau adokushowa kutu-u mlanikesha? Nino ithulu keuye Nazi kuka ikiqivekelo, timi kutomo alikhi amipi tsuqhipithive, eno hamino palikhi pangusu xine pipheke kumokesha.

Tilehi Communist kuzu yeghiqhalo shikulupu eno suchou lakhi ani. Panonguye Communismino tsumlakeu kuxu tinguno alau anishi cheni. Russiami kuxu gholaye amulo thonhei, kikimiye mlo eno kuphukinike thonheikeu mulo phucheni eno tipau khilaunomu ithuluchemo kehu ajijeliqo phucheni eno shocheni. Tishino ajino pano loghu tipau ghasuno xucheni. Tishino adokitila dolo ajino panongu lokughunotsu chenipe. Panonguno kuchou ithiaghike aye kuchouno panongu lokughuno tsunicheke.

Bucharest lo, kughono Russiamino qhasupe ngoakeno niye ighono suphami lakhi officelo ilonike ichia, tile ino alou iloghikelo Russiami captian lakhi paulo alikapeani, tishino ayikusashi timikumutsuvilo alaushi sholopi kichiqhi aghi. Ikemu paye aloqhino shomuzuve eno timiqo kumutsu izuvulai khave. Paye shomuzuvekemu pamuloye tsukhutsuvai

akeghenguno ino pavilo iqano Khristo ghili pikelo paye ighono pakichiqhi auve. Tishino Captain no pavilo, nono noye khu-ukeno ivilo piveake nighi itehiye niye khu-ukeno ovilo pini. Niye (Orthodox) ighono akupulu kuthomi chinetomi atughumi akupulu phevekemike.

Tiye Stalin, no aghime tsukeu ghulokilonoke. Tishino niye aphu lakhi lono lakhilo wuno Alhou kuhaipi aqhakumutsulo kutsuveno niye pishiqhive kemi chinetomike, tihutoi kutami achinetomi kutomo ani. Hipau ghengulono niye Secret Policelo akumla kije officer itsuke.

Alhou launo aghime itsukeuye I-u hipau pesuno khris-tomi heqhi anikeu panongu aghimetsuve kethiuno. Ike ino tipaqo mlavekeqo kumusumavenike ghenguno anguno-anguno aji sho acheni ikemu hipaunomu kiumo shive-luamoe. Hitoishi Communismi kutomono alikhi papithivecheni. Tighenguno Communismi-u ahole lakhi Fadeev, no yekeu "Alokughuno". hipau ithulunike ghenguno tamono Communismi ghenguno akumla shimosae, eno paghi hipaulo alokivishi kakuhipau heqhiveno palikhipa alikano veqhive. Hiye paghungu ghenguno ighono kushokutsu akimiki ghime hipaupunikeu.

Joffe Tomkin, Communismi sakiphe akhotomi, paye Czarist ghuloki lono Communist ghenguno aghushi chekemi ikemu Comunismiqo mikucho ghime pumulaveno ashekhalo paghi tsuqhi pithive. Tighenguno panonguye alokughuno kuha pano yehkipe kughushulomu. Kiutoi alokughuno kuhakea? Stalin no paqholo kijemi akichiu heqhivekelo. Tishino paghi tughupe palikhi papithive. Paye pakuzua tache ani, tile aghukhemi kutsasa ani. Paye khile zucheni-keno khunomu ithini chemo. Achuqupughi pakutoshino michemokeloye chuchemo. communismiye khilemu alokughuno kuha panokijemi eno ayekipe shou nomu. Panonguye KHRISTO likhi avehupushi ani.

Tuqhou kukuhouno aghime kughulo akemi zuqhushi
mla anike Li-kuphulo!

* * *

Mutsu mushei tuqhou kukuhouno mla-akeuye pulo-
niqhei keu kupulu lonoke.

Alhou kumla kishimi lakhino paukakulo Alhou tuqou
ghili yepua. Hipau ghengulono paye Russiam! suphami
Captain no pakuno khakutabo lakhilono pavilo nikujo likhi
ani ighivelo, eno Jisu ye Alhou nu kumopi piqhivelo okipimi
qhivetsunike; Timi hipauye lhothemi eno ighono akupulu
kumugho lakhi ikepano atozu kua Jisu crosslo yedaketo
ngono numighei shino "Iye ino puluani eno tiye kuchouke."
Niye opulonoghi amuqu ajeli hipaqa shino imusu penishi
amoe. 'Tile Captain ye ighono amulo ideveno.' Ijunukevilo,
pino pau pistole ikhipepe aviilo ighino, nono itehino ti-
paqoye akimiki ipivemo keloje oveqhi veni! Tile timi huno
pikeuno niye mikive mulae, kughengu NI-Mpeuye kuchou
eno Alhou Nu keghenguno. Tile Captain ye pakutoshino
pau pistol ayeghilo pheqhive eno ighino Alhou timi tipau
khapengove. Panhethilo anhezu qoipeghi ghi tipi "Iye hiye
kuchouke" tishino qa-auve. Captain no pi; nighi tipau pulu
acheni, ikemu niye khilemu hipau kupulu lono thinanipi
kumusuo chemo, ilikhi ikutoshino tipau phumla apho thaqhuloye.
Oh! ikemu ighono oshikimithivea, ikupulu shikumutotsukeu
ghengulono. Itehiye nighi Jisu khristo ghenguno thinia.
Nono ilau pephepiyeketo.

Niye hitoikeu ghili hamighi ithiani. Ike kughono Russi-
amino Rumania leluvekeno, Russiami suphami kini akukuho
kilo iloghinopi: Ningu ye nongu kupulu tipau puluchemo,
tighenguno khunoqomino itehino tipau piluvemoni keno
veqhiveni. Tighenguno thinishimo keqono ajeu ighivelo tile

hamiye ajeukudau wuve, hamino akukuhoki qhiveno akilo wove, ikemu aghulo likhino ithaumono tilengo auvekelo pamano ighino panongu valuveno tipi ningughi khristomi ke, ikemu ninguye khunono kuchou ghenguno puthugho chenikeno panongu sasuno kuposhucheni.

Nighakhulo timi hipaqono atsa kiviug ghenguno aghushi acheni. Panonguye atsa kiviug ghengu likhino kumono aghakhu kivipu ghenguno ghi aghushi acheni.

Kulolau khristomiyo kiloye adokuha mitheno ashilo leqo ini acheni. Ningu kiloghi ale ighono kughughalu nani ikemu atsa kiviug shiaghiaye akisughumino chiluveno Secret Police vilo pivenani. Tighenguno kiuhalano kuzuveno aqhouno iniacheni. Ikemu panonguye kiutoi alokivishi chenikea? Khanilono kulolaumi khristomi sholukelo. Hipaqo yeluakeuye timi ghenguno aghulolikhini, ikemu niye asutsa kuhakemi eno akichi khavetsu kemi kulolaumi zuqhushi asutsa hipaupilu ani. Ino panongu jelono akiquhe eno akupulu kuthokuzu lono khristomiyo kukupuna ghenguno inijulu ani. Panongu jelono nongu kighini eno pujushijukeu kupulu kukuphu qhuinijulu ani. Tiye tuqhou kukuhou Communismi qholo imeakemi ghenguno.

* * *

Ninguno Communismi shou tokulu eno zuluvenikeuye:-
Atughu-u: Kughengu Alhou no nigholo eno nikudau anike ghenguno tokulu shinani.

Akiniu: Kughengu ningu shepeye timi mulo kutho alau putsalu cheni. Communismi Nazis, ghulokilono akughukilo akemighi ivilo akipimi khughi pike panonguye ado ghuloki lhokusaloghi akighinishia ipipike. Ni ampino Communismi kijemi pano kichilono thinikelo, "Jisu, Jisu", ipi panongu kichilono pikeu chiluvea.

Akuthu-u: Ninguye tokulu shinani kughengu timiqo kuxu kukhu ayehe nikudau anike ghenguno.

Russiameye kaku kumutsu khristomi ghili yekeu thaqhuye shipuhavelu nani, ikemu kaku lakhi Tolstoi ngo Dostoievschi ye shipuhave mula eno tileno Khristo kuvu ithulupe cheni. Kaku hipauye Eastern Germany lo Goethe wuloghi ani. Szienkiewicz wuloghi ani Paland lo, tinguno alau kutami kutomo wuloani. Rumaniami kaku akijeuye "Sadoveanu" ke, hile yepuakeuye "Atsakiviu akuxu akeu, Atsakiviu tughami jelono, Eno pano muzusutsu keuvecheono."

Ino Communismi vilo Khristo ghili eno pamulolo thon-heikeu ghungu avehupu shiakeu jukelo eno inijukelo, panonguye ighono kushokuzu shive cheni tipau khochilenikeu. Pau kushokuzu tipauye iqunhei keulono kumusujuno ikudau ighicheni. Ni ampino ithianike collegelo shikukami Marxismi lakhi patsapido ashehashiveno Alhou lau akighinishi panongu kuphunikeu ghenguno, Ino ithiani Communismi hamiye tuqhouno kuposhukeu ala kushowalo wuno. Kughono panongu kughalavenikeno panonguye tuqhouno kuposhumoe ipi mikive cheni, ikemu athiue amulo ghimeshi qhacheni akumutoshi akupululo puthugho mlavepi. Panongughi nitoi kemi timi ke.

Ninguno tokulu shinanipi puluani kughengu tuqhou kukuhouno ghuthu kutomolo tokulu shikeu ithuluveake. Khristo ye Communismi ghi kimiye anike eno Khristo no panongu shou tokulu shimoaye sake. Tiye tuqhou kukuhouqo vecheono shinani, eno khukhumu puhavekeu ghungu ghenguno alokumusulu aghiaye Tuqhou kukuhou sasu mlakuqhanguno tokulushi nani. Alhou lau akupulu akeu eno Pano puwukeu zahkutsu kije vecheono shoxu mlakeuyi kiche kighi kumutsulo atsa kiviuloke. Timi lakhi ghungu ghenguno timi kuthuno Communismi gholo imeveke, tishikeu vecheono Communist yeghilo Alhou tsakiviu ikuwoke.

Amuqo Kuthuno Communismi Kukuho Puputhu Keu Atughu-u: Amuqo kuthuno Communist yeghilo Tuqhou kukuhou puputhu acheni. Atughu-u muqoye Pastor qhetonhe, qhethonheno panongu kuxu tsuvea. Panongu kukuhoki eno panongu Bheri qo kilhekuluivea kughengu panonguno atsa kiviuh ghenguno akumutoshi puthugho keughenguno. Pastor mikutomo akughu kilosuno shikukujo eno ghimeqhivea. Panonguye pheveke thiughi ipeghino alaushi panongu kukuho ghenguno akuxu kutsushi mla. Tuqhouno eno ighono amekuapushi mlake tuqhou kukuhou ghen-guno.

Panonguye Communismino akukuhoki khavetsu, panongu pesuno ala ghime amu alaushi amekuapulono tuqhou kukuhoulo ale lono, alulono, aghasalono eno putholono khile khilemu kupulumi qoye kumuqono kuposhu Alhou kumlashike. Timi hipaqoye "ghikiqhi kuxumike," kiunomu panongu hakhave mulakeu aghime tsuno akughulo su ideapimu.

Akukuhomi Vecheo

Akiniu: Amuqo akiniu tuqhou kukuhoulo akuxu ikhipe tsuvekemi qoye muchomi eno topumiqo kupulu ghen-gunoke. Akukuho tipauloye adou kupulumiyeh kuha, amulo tuxa kupumi kuha, lupunhakeu kupulumiyeh kuha Russia lo momu China lo. Khristomi qono ametsuvetsu keuye ighono kijeke. Ikemu ninguno ithimoaye sakeuye aghime sholukeuye alhokuthulono khristomi akiviuh iqiphelucheni. Khristomi ashepe kishimi alau, aghungu puhapuakeu alau saighitsu cheni. Timi kumutsuno khristomi shilunani ikemu kumutsuno puhapuakeu ghungu saighilu chemoe, tiye Communist ghimelono akuxupe tsuvekemi likhino shiluani.

Red star, ipikeu Russiami suphame kiyephilono Russia lo khristomiqo leke eno hitoi tipi, Khristo mlache kemiqoye

panongu nhekushu wu pukho puaketo. Kemu vuakeu khristomi qono panongu toluvecheni tiye khristomi kutami phulo eno akisughi miqo kikimiye eno agigihu tsukeu ghen-gulono. Khristomiqono kutamilau kimiyekeu kumla kusukinilo, eno shilukusalo, tishino kughono panonguno Khristo shepe shitsunikeno timi qono pulu eno ikhiluke. kughengu panonguno panongu kuxu lono Khristo ithuluke. Akukuho kiloye Pastor Licensed akeunguno alauye puthugho chemo ikemu acheku kumtsulo akuxupe tsukemi eno puloniqhi-kemi khristomi vecheono Communist yeghilo puhapuakeu ghungu saighilu anike. Tiye A-a kumtsulo Alhou shepe shikeulono akhotono alhikishi qalo, azu kupualo, tighenguno Communist kiyephilono pikeuno khristomi qono ashikije kiloghi atsa kivi u alau ghosuno jeanipi. Itaghi Communist Press lono pikeuno khristomi qono office eno kaku kumla-lo puthologhi ado kushowa ngono khristomi tsakiviu qhetonhe shou tsughujophepe wuve cheni ipi.

Communist Press kiyephilo itaghi alaupikeu, Moscow lo itimi qo atsa kivi u kaku kutomo ithulu alaghi hamilono, hamiyeye awuno yekeu tsa kivi u. Tishino itimi qono panongu jolabo qolono sughino kutami eno shikukamiqoghi tsuke. Communist phughilo missionary kumla akumutoshi mlalu akeuye aphulomi muchomi eno topumi qovecheonoke, ikemu hiye panongu kupulu kukalonoke.

Cuba, Communist yeghilo missionary lakhino pike, hiphimokemi qo kukuhouye puthugho luke ghime eno akipimi tsuve keloghi. Kupulumi hipaqo million shouno aghimetsukeu vecheono panongu kupulu kuchoulo thakimitheluke.

Akhotu Pastor Eno Alhou Kumla Kishimi Kutamiqono Inaqhoi Ngomokeu Vecheono

Akuthu-u: Tuqhou kukuholo akuthu-u muqoye amikuchomi Pastor miqo vecheono, ikemu tiye akichi khavetsu eno

inaqhoi ngo akemi “kukuhouqo” ghengunoke. Tuqhou kukuhouye ashou pekipheshi akemiqo sasuno kututake kumoe. Communist yeghi kutomolo Yugoslavia lo, Poland lo, Hungry lo eno A-a kutomolono Pastormi ashou pekipheshi akemiqono tuqhouno ilo tuqhou kukuhoulo mlatsu keulono. Pastormi hipaqoye panongu kukuhoki eno pano bokuthaki nguno khalacheuye Alhou tsa pinikeu zahkuha, tinguno alau lhothemis eno itimiyo sasuno kuposhu nikeu zah kuha. Tinguno alau akilo kusukinimi ghenguno inikhuni-keu zah kuha, hitoike ghenguno pulumokemi kutamiye khristomi gholo wunikeu ighono musa eno shoke. Tishi Communismi yezah eno bokuthalono aghipinamu Alhou tsa ghenguno hipaqo-ye amekuhave. Alhokuthu Pastor miqoye ghasukeu eno thaighakeu sholu aghipimu akumutoshi tuqhouno Communismino mulapuakeu yezah hecheveghi achiney khaqhi kiphe ghenguno mlake. Pastormi hipapono atsa kivi pesuno tuqhouno itimi eno lhothemis tsu eno kutsuke. Panonguno aqhouno akikumutsulo tsavipe kumlashitsuke. Tishino kutami pelonoghi tuqhouno Alhou tsapesuno aghungu kuxulo muamuzu akemitsu peke. Panongu kuxukusashi aghipimu aqhouno tamono Alhou tsa alau vekuphatsuke. Timi hitoikemi kutomo idodol-oghi Russia lono kughaluvono amipe kushowa ghenguno akughu shivea.

Panonguye amuqo akuthu-u tuqhou kukuhou ghenguno atsughike. Pekipheshi akemiqo Pastormi kutomono tuqhouno Alhou kumla kumuzapushi mlatsuke, hipaqo kumtsu tuqhou kukuhou vecheono mla ani eno Communismi shou Alhou tsano tokulu shimoke kutolo mla anani.

Timi lakhi papashi Communist yeghilo izuighi chekemi paye achiney ghili ighono inijukinimi, ike pano ideighino yekeuye paye khilemu Tuqhou kukuhou ithumla momu anipikeu mutha. Hiye Central Africa, yeghilo akumuthami

gholo izu-u-no ighino pikeutoi: Ino panongu kumtsu vilo inju kutovea. Panonguye akiqi kuatsa likhi pichenikemo keno. Ikemu panonguye tishimo ipi. Kuchou ye hike panonguye akiqi kuaputsa picheni kemu panonguno muthakeu kiki tsa picheni.

Wovekeulo kupulumighi panonguye khristomi ipikeu mthano ake. Tsutsala nono panongu vilo panongu chiney injuaye panonguye Judami, Israelmi, Jisu ye Messia, Alhou Nu pulu chenipi khochile nani. Kughenugu khristómi ipi jekuphelukeuye ado kushowa thiuno atughushi Antiok lono kuluke. Tinguno alau Lutheran kupulumi qoghi panonguye Lutheranmi ipi mutha tighenguno panongu dolonoghi panoje tipau mujochile cheke.

Tihutoi TUQHOU kukuhoughi Communismino kutsuke. Tinguno alau kulolaumi achiney phukuthomi kipelau Communist yeghiqha kumutsulo akupulu huthutsu kemilauno aje kutsuke. Ike tuqhou kukuhoulo kihikusumi khu-unomu panonguye tuqhou kupulumi ipi pichemoe, ikemu panonguye khristomi, kupulumi Alhou nuliqo ipikucheni. Tishino panonguye tuqhou kukuhoulo mla eno saphe acheni. Tishikeu lono ashoumi kutamighi ighino panongu gholo kuposhuluno tuqhou kumla kivi ithulupe cheni.

Panongu jeye achipilono kupuani kughengu ashoumiqono panongu tuqhou kumuto kumla kivi ithuluno ighono akumuzaqhi-i Alhou sheqhe acheni. Ninguno apa hipau thiu Soviet Union Pressno kiutoi tuqhou kukuhouno akumtoshi eno akhotoshi thu-u anikeno phuju akey ithulu nani.

Ino Alhou shepe ghenguno pujushijukeu Soviet suphami eno Communist yeghilo Rumania qhakumutsulo.

Ino nongu lauasutsa hipau piputoani, Communismi lau Khristo shepe shitsunike eno panonguno ghime akemiqo kuphutsu penike ghenguno.

Hiye ino khuakeu "Iwu zuxo" eno mlakhamla kepushi akeu.

Hiye kuchou chipiuke:

Tuqhou kukuhouye itaghi Russia yeghilo anikeshea itehighi?

Tuqhou kukuhouye itehighi tilehi mlalu anikeshea?

Iniju akeu kumutsu ninguno alokivi sutsa lono khochilelu nani.

Communismiye tiqheli tuxa panono ayeh peighikeu ikhiluvea. Ikemu panongu tokuluye kuha. Russiami Press lono tuqhou kukuhouno kiumla anikeno tsaqui phupe puani. Atughulo tuqhou kukuhou qoye ighono akumutoshi ipeghi, tishino lhoux tuxa itaghi Communist Press laughi asutsa sughikeu ithulu.

Kumusujulo; Tuqhou kukuhouye avuzu muqo lakhi toike! Panongu-ye alhoaye lono azuqhou acheni, ikemu aghuloye azu shou chophepe anikeza. Ino apa hipau thiu akhoto sutsa hami ikhonhei keulono pipuanike juni.

Avu Muqo Kumutsu Likhi Ithulu Akeu

Nov. 7, 1966 mpelo, Suhumi phulono tuqhou kukuhouqono akuputsa kije ashouno kuho kuputsalu.

Kupulumi kutomo aghakhu kutotalono ighino sulukha. Akukutsu shekhalo kukusu qalo timi 40, ighino Jisu khristo ikhiluno Tsubuikeu zughi ipikeu lono baptiz shilu. Panongu kumtsu lhothemli likhi.

Panongu viloye azu-uno inju kutokulupu kuha, amipe 50, Communismi kukaqholo ighiveno Bible eno khristomi kupulu kaku lakhimu ithumla, tilikhi kumono Theology kiphia eno qokiphe-a lakhimu kuhake tuqhoulo sakiphemi qoye khilaunomu qokiphe jeli tipaqo luke kumono muthake. Philip deacon khu-u Eunuck sasuno adokitila kuputsano, pavilo inju; Julo? Azu hile anike, nono omulo kumtsu pesuno pululu aye noye tishilu nani. Kiunomu ihakhaamoe no baptiz shitpsunike ghenguno? Tile pamano mutazu azu akekudau iqino azu lono baptiz shiluve (Acts 8:36-38)

Tsubuikeu zughilo azuno kupukuno kehu tuqhou kukuhoughi kuchou yesulo akeuikiqi lono peithalu cheni. *Uchitelskaia Gazeta (Shikukami Magizine)* lono pikeu, August 23, 1966 mpaelonu, ike Rostov-on-Don no baptist kukuhomi pesuno ayezalo akeuikiqilono ajekihi kusulo sutsumo ipi, kughengu paye akumla ghenguno Communismino sukusushikemi.

Ike hiye May qhi atughu-ulo, Jisu no sabbath tsalani Farisumi kupulu thavetsu, ike tuqhou kukuhoughi Communismino ikhilu keu tsala tipaulono pano yezah thave eno ikhilutsumoke.

Communismi ghi May qhi atughu-uye pano tsala kijeshi ikhiluno timi kumutsuno tipau ikhilu eno pinichenipe. Ikemu atsala hipaulono Russia lo-tuqhou kukuhou qono alaghilalo mujochile keu lakukhashi ipeghi. Tilehi kupulumi timi qhethonhe 15, shou ighi, hiye kutaughenguno kumono Alhou kikimiye vecheonoke. Panonguye akuxu avesave nanipi ithiani. Panonguye akughukilo akhu muzu eno ghimeqhi keuno panongu khanipi ithiani.

Russia loye Kupulumiqo kumtsuno "Tuqhou Kimiji" khristomi tsavipe miqono mlaphekeu ithiani, tiye Barnaul lono, hilehi pipua keuno achepu kishiu Hmara, Kulunda phulono ighikemi, ike Lino asutsa chilukeu Likimiye akughukilono thiveapi chilu. Ike kughono Lino akumo ithulukeno awu eno awuloti kumutsu azaku aghi, apukhu muza loye pitipuani, akivelo chakuno jipuani, apukhu kinikujo heqhikeu zaku kutomo ani, tishino aphi kumutsulo ghimekeu zakulikhi aghi.

Ike kupulumi khijeno 'Rostov-on-Don lo, aqha zulo shukipheshi alaghilalo ipeghikeno, panonguno ithiani hiye panonguno sholuma ayesae! Hipau ithi pulaghi tamono ighike.'

Itaghi panonguno ithiani. Kupulumi lakhi pano xaideo aqhi akuthu-u loye Alhou ghenguno aghashive tsukeu, pakumoye aqokitikhi gizulo qhove eno pakumo shou hitoi yepaqhive.

"Ino xuaye Khristo ghenguno eno thiveaye kungughalo wonia."

"Musakevilo khunono aphimipi heqhive chenimu aghunguye heqhi vetsu mlakeno."

Ino achinetouno ngochekeu qhou hitoi hepuaghikeughi ithulu, "Khu-u Alhou tsakiviu ghenguno heqhive keno." Ike kiche kipiye hipauye heqhivekemiyo jikukano muzusutsuno alaghilalo akupulu ghushi shipeke. tiye wovekeu Zacchaeus tsalalo toi lhothemi lhotache Alhou lau xaideighilu. Panongu dolo muku kuthuye azu-umi Komsomolsmi, panonguye Communismi lhothemi muqolo kihikusumi. (Youth organisation of Communist)

Kupulumi qono aphughi eno alaghi kumutsu tishino Don, ghoki kutolo chive khile baptist shichenikeno.

Tishi akelono Communist Police miqono alika jelipe ighino Don ghoki hokumuxa kumutsulo panongu botha-

luve. Tishimu timi qhethonhe 15, kumutsu kugha khani-keuye shimula. Ikemu khristomi qono kumutsu iqigoqhunhe pesuno Alhou vilo akighinishi, atsala tipaulo tokulu panongu tsulopi. Alhou no Police miqo putsaveno panonguye kughamove eno tipau suchedoloye iqunheive.

Uchitelskaia Gazeta, lono akumou kumla kipimi sutsa ighikeuye, baptist qoaho Rostove, lo tuqhouno mlanikeu Press anipi akipimitsu. Tuqhou kiyephi hipaulono lhothemiqo pulono akupulu shou puthugho lupenike shikumuto. Titoi apu-aza viloghi pino panongu ti-anuli sasuno akumoqho keualo sawu tishi anguno alolo musaichikeu apemonike ghenguno. Ati-anuli khristomi kighithi akivishi Communismi qono School lo shikakeu tipau mujochile apenike ghen-guno tsupe.

Uchitelskaia Gazeta, kiyephi lono injukeu:

“Kushiye shikukami qoye ighughi akibolo ati anuliqo pulono akupulu chiney sasuno xukutsu chenipekea?”

“Shikukami Magazine” lo hipaughu pipua, aqhouno baptiz tsukeulo tuqhou kukuhoulo kumlami ghime ghili.

Hitoi tuqhou kukuhoulo kihikusumi qoye akuxu kijikusalo eno aghime kutsu kughulo apimu akupulu qhaqhi kiphe shivetsu penike (Russia lo Communist Party) sasu kumujoke.

Soviet Union, lo Baptist kukuhoulau akumou lono akipimi tsukeu kaku tuqhou jeli ningu wuloghi ani. Hiye Karev, sakiphe qholono khristomi aqo kitikhi heqhivetsuno Communist kuka alau shiluvekeu (Soviet Life Today) No. 6. 1963, lono ithulu ani. Akipimi tsukeu kaku jeliqoye tuqhou no pususuno kulolaughi kiyeve.

Hipau shelo itaghi akupulu kumugho ghushi Moscow, phughilo-no ithulu ani. Hipaulo ino pekidetsu keuye “Payi kilishe luvepenikeu,”

Athikuzumi eno achelimi, Alhou launo ighikeu kuku-

mugha eno lokughuno, NI-mpeu Jisu Khristo vecheono.

Ni Evangelistic Baptist kukuhou lono timi kishekiphe aqhe pungu Moscow, lo puwuno, May 17, 1966, mpelo. Nino qhuiniju keu eno nisutsa chilutsu penike (Committee of the Communist Party of Socialist Soviet Republic) lautsuke.

Ninguno qhuinijukeu yesu hipau suwono General Secretary, Brezhnev, wulo sutsuke. Ike hi timi pano aqhe punguye pucho puzu office kikhalalo ngokheke.

Moscow, loye hino atughushi lhoxuno mishika mujochile keushi aphi. Timi hipaqo kumutsu tuqhou kukuhou lono ighikemi likhi. Tishino itaghi avelau panonguno akiye akiniu pesuno Gen.Secretary, Brezhnev, tsu. Tiye pakusami kijemi lakhilau muchokeushi timi hipauye Stroganov, ke. Kughengu timi hipauno panongu sakiyi eno akiye tsupenikeu hakhake ghenguno.

Tishino pano aqhe punguye puthopuzu alaghilalo puthugho ngove, tile timi cari lono ho-i chekeqono panongu dhaqhi asu-atuno vaha anamu panonguye thanau inaqhe kutolo tishi Communist Party office khalalo ngove.

Tishino atsala akiniu loye panonguno kijemi hamimu sasu kushonikeushi kutokemu kupulumiye ashepe kuhakeloye eno kijemi putsanikeuye aghime sholukuzu keghenguno panongu hakhave, tighenguno panonguye itaghi Brezhnev, khemoaye save.

Tishi akelo ninguye akupuna hami sholuve.

Ayi 1.45, avelau Bus 28, lono Policemi ighino ningu suholuveno aghime ningu tsuthuve, tile ninguye kumutsa aboshi ngoluveno Alhou shikimithighi alephe akighinishi: "Ningu ghenguno atsala kiviuye kughono cross ghime pulukeno tipauke." Tithiu Secret Police miqono atsawo toi nighaqhi, hamino kugha pesuno kunguno vepu-u mugha, hami no asa lono pughopesuno Bus lono sunhe sasuwu, akithi kumo shimoke kutolo. Tishino ningu sasuno nino

muthakeu alo sasuwuve.

Hipau thiu itaghi hinguno akiviu kutau lakhishi. Ike tiye ningu aqhe pungu kughaluvono aghimetsu akethiu Khristo ghenguno akuxu kutsumi athikuzumi mikini, G.Vin eno Hover, pamano aghoshi akumutoshi (Central Committee of Communist Party) lau ninghenguno alakishitsa pitsu eno mishika mujochile. Johan baptist kughaluve kemutsa Jisu no A-a tipaulono pakumla huthuveketoi, eno ashepe lakhishi tiye, "Nongu mulo xaidelo kughengu kungugha yekipe kupunuvea,"

Athikuzu-u Vins ngo Hover pamaye ningu khaqhi kiphetsa ghenguno Lefortovskaia lo akughulo suve. Tishike ghen-guno tuqhou kukuhoulo kupulumi qoye musa ani keshea? Moe! Hipau thiughi panonguye khristomino mujochilekeu kimiji mulaphe, panongu ghili kiushive kenopi eno panongu ghenguno, "Khristo kupulumi lau kupukini likhi tsuke kumoe, ikemu Pa ghenguno imepeni keughi tsuke." (Phil 1:29).

Tishino panongu dolo shikumuto kilegghi khu-unomu hipau ghimelono pokevilo pi hakha, nonguno ithiani, ningu ye hipau ghengunoghi sukuu shike. (1 Thes 3:3)

Panonguno lbrimi kaku loghi ikhipheno shikumuto: Ibr 12:2, Jisu lau julo? Khu-u ningu kupulu hukuthu-u eno kishekhau keno. Khu-u alokivishi paghenguno cross kuto-pua keu puluke, tishino akithi shou theqhikulu shiluke.

Tighenguno tuqhou kukuhouye pekipheshi Rostov, lo Alhou kuha ipi lhothemi ghukeu eno shipusakeu mujochileke. Tinguno alau Moscow, eno Russia hokumuxa kumutsulo Communismino akukuholo sakiphemi lau tughusukeu sasu aghushino mujochileke, tishino khristomi shukiphe kimijilo hitoi tuqhouno yeke; Nitsala loye, "Saithan no pitsuno akukuhouno tipau xakutha ikhilutsu ani." Hiye Alhou no azah tsukeu kimihi lono. Hipauye, Pravda Ukraini, lo October 4, 1966 lono yekeu.

Parvda Vostoka, lono yetsuke khristomiyo ghimikeu, tiye Alexei Neverov Boris armashov eno athikuzu-u Axen Zubove. Panonguye kumuqono American lono Alhou shepe shikeu radio lono iniaghike ghenguno, hipau panonguno alebolo qhosukideno athiu timiyo tsukeu ghenguno akughu ghime tsuke.

Itaghi Panonguye kumuqono tuqhouno atsa kivi u ghenguno kuputsa aghike ghenguno akipimitsu. Hi-Tuqhou kukuhouqoye wovekeulo atughumi kupulumi Rommi kuka qholo akeutoike.

Sovietskaia Moldavia, lo Sept 15, 1966, lono yekeu. Tuqhou kupulumi qono kaku tachu timi tsu eno timi kutomo hekutsu Pesu aghike ghenguno ayezah lo akeutoi panongu akipimitsu tishimu panonguye tamono A-a kumutsulo Ampeu shepe shitsuke.

Itaghi kiyephi hipaulono akipimitsu keu; Panonguye train lo Reni lono chesu Chisinau lo wuche, panonguye train lo alepheaghi keu ghenguno hitoi akipimitsu. Kiyephi lono asutsa tsukeu, Ningu lhothemioyo pesuno Khristo lau ikhiphepe tsuveni. Itaghi panonguno alaghilalo kutsu, Cari station qolo eno akiphiki qolo Ampeu shepe shikeu ghenguno aghimetsu. Ishi tuqhou kukuhouye Russia yeghilo hitoi Alhou kumla shiani.

Kughono khristomiyo alaphe aghikeu ghenguno aghimetsuni keno Panonguye iqiqokhunhepe ngono hitoi pi: "Nino ningu kuxupe Alhou wulo qhitsu ani." Ninguno Ampeu shikimithi ani, ningu pelono akupulu ghenguno imelupeke.

May qhi atughu-u lo khristomiyo Copceag eno Zharovka, phulo akukuhoki kuhake ghenguno tuqhouno kukumgha hoho aghasu lono kuho! Itaghi panonguno apunu tsala ikhilu anipino tuqhouno Alhou kumla ghenguno kuputsa, hitoi khristomi kibo lakhilo pungu momu tsughu aghikemi jelono ghuthu kutomo kuholupe.

Akughu nomu eno ghimeqhi keunomu tuqhou kukuhoulo kupulumiqo shikumusave mula. Panonguye tiqheli atughu-ulo kupulumiqo toi khijehi aghime sholu keno tijehi akuxu alau ikhipetsu eno akupulu thokitheke.

Pravda Ukraini, lo October 4, 1966, lono athikuzu-u Prokoofiev ghili pike. Paye Russia lo tuqhou kukuhomi shou sakiphemi lakhi, ike kughono pa khaqhi phevekeno ipe paikhavino Sunday School huthuve. Tighenguno paye itaghi kughaluve. Ike pano hitoi khristomi sukiphe kimiji lakhi yetsu akughukilono: Tiye "Timi yezah qholo shive akeuye, pekiphe kukuhou qono Alhou-u kukumugha launo putosuve ani"

Nauka i Religis (Phuiko eno achiney) No.9, 1966 mpelono khristomi akipimi tsukeu. Tiye panonguno atsa kivi vekupha eno tsaiko jeli ayiko kutauno kuzuvono (Leo Tolstoy no yekeu kaku toishino) ikemu alouye Bible lo kiye pachi. Panonguye ale kutomophe ikemu ale gholasutsaye Communismo pano mishika shipilikeu, ikemu atsaye Khristo sheqhe keule. (Kazakstanskaia Pravda, June 30 1966)

Kulanda (Siberia), lo tuqhou kiyephi lono mlaphekeu. Baptist kukuhoulo khristomi sakiphemi qono ayeghi qhalo kuchou kukuhou pughave ani. Tiye akiqheu chinetomi ngo Sadukimi eno Farisumi qono Jisu Khristo pesuno thechu shivekeu toike. Ikemu achipiu mikucho tuqhou kukuhouye puthugho aphi eno mla aniaphi. Khristo zukuvu kumlaye mla ani aphi. Kughengu Communismi ghi itsaini kughengu ino tuqhou kukuhou ghenguno achipiulo puthughoke ghenguno, Communismi qoye Khristo lausaighi luvenani eno Khristo no tokulu shinani.

Bankinski Rabocii, April 27, 1966 mpelo, Tania Ciugunova no (Communist Youth League) mlachekemi Khristo lausaighivekeu lau yesu yekilikeu Communist mishikano lheluveno akipimitsu.

Ino kimiye chekeu Ikusau, Nadia.

Alhou launo ighikeu kukumgha pesuno otsupuwu ani. Nadia, Paye kiutoi ningu kupu kimiye kela! Ninguye pagizulo kiumu kumoe. Ino pulu ani noye atsa hipaqo vethalu aghinani. "Ike noye oghumiyo kimiyelo, omusu inikeyo kumugha tsulo, akumla kivi shilo khunono omithini keno panolau eno opipusa kemi ghenguno inikhu tsulo."

Yesu hipauye athikuzu-u Peter Serebrennikov no pesu wuche kelono kughaluve tishino Communismi lhothemi Khristo lau saighitsu kemi kutomo akughulo suve.

Communist kiyephi lono pano Sermon tsukeutsa yepe kulha, "Ninguye atughu-u ningu xakulu-u pulumoaye sae, khristomi qono shichekeu toi. Ninguye Bible nguno alauye kiumu pulu eno ikhilu chemo. Ninguye timi axine lono saighinikeu mighimo ayesae, akhotono lhothemi lau." Kughono pavilo Sovietmi lhothemi lau Alhou tsa pinikeu lakhapuani pikelo pano khochile keu: Ningu ghenguno ayezah ye Bible likhike. Ighono akumutsa lono akughushu yekipe qholo akemi khochileve.

Tile Communist kiyephilo 'tughashi' lakhitoy peithaghi pajulho shisu: Lhothemi apumi ilimi qono aghungulo lephe, baptiz shino tughami kumlashi cheni, tishino amikucho kumo kukutsu aghumi kimiyelopi picheni.

Bakinskii Rabocii no pikeu, Lhothe pumi eno lhothe limi kutomo Communist Youth League lo mula chekemi qoye khristomi kivimi likhike. Tishino pimheye lo akeu tsano kishekhaghi pi: Kiutoi Communist school ye akuka kuhakeu eno akuvulo pishiqhi vepeanikea? Kughengu Pastor miqono akhopemi kutomo kighithimiqo wulono lekho luvepeani.

Kazakstanskaia Prava, June 30, 1966 mpelo, akumsapu lakhi phuphelu keuye: kiphimiqo gholo akighithi kivi eno itimi akiviye ye khristomi shiaghive!

Kirgizskaia Pravda, January 17, 1966 mpelo, tuqhou

kukuhoulo azanoqomi hoho kupughulo ithulukey: Ningu amulo lakhi shino Alhou vilo inikhuni, tiye panonguno itimi aphilonono ikhiphepe Ampeu Alhou tsuveni! Tishi anguno Panonguye hipau yeghi xine sasu kitieqe pemonike ghen-guno. Akighini hipauye kuchono tokulushi, tiye Communist kiyephi lono hitoi ashepe shitsu. Khristomiye lhothemiqo launo thu-u ani.

Celiabinsk, Russia, kiyephi lono pikeuno kishino Communist Youth League lo ilimi lakhi *Nina* no khristomi shiluve kenopi. Hiye khristomi qono tuqhouno Alhou tsa suighikeu ghenguno.

Sovietskaia Justitia No.9, 1966 mpelo, tuqhou kukuhouno kuputsa keu ghilipi. Panonguye zubumuta lono kuputsa. Tiye panongu ghungughi ithulu kilemo. Panonguye timi A-a kutotalono ighi eno timino kutomoke ghenguno iqj pishekepu aghikuhano aphi kumutsu atsunhezuno chi. Tishino kupulumi lakhi pulono alaghalalono Policemi kheape. Tishi akelo aqogholono *Nina* no puthughono Alhou launo kiutoi kukumgha ighikeno kusaje eno Alhou no panongu khekutope akeu kuvu piyetsu. Tinguno alau Communismi lhothemikutomono asheka kutolo Khristo qheanikeu kughakutha shilukha.

Communist tsa kukugha alo saighikelo tuqhou kukuhoulo khristomino khochilekeu, nonguye kushiye lakha puakeu chineylo kutamilau mlacheni kea? Khristomi ilimi lakhino khochile: "Ningu kimijiye ayeghiqha lo Khristo shepe shinikeu eno tokulu shinikeuke."

Judge no pi, "Nochiney ye kichile-u phuiko," ilimi hipau alau akipimi tsunike ghenguno, tishi akelo kiphimi lakhino hitoi khochile: Noye Einstein ngo Newton pama nguno alau phuiko ghili ithi anima? Panongu kumutsu kupulumike. Nino akiphi kilono philuke hipau yeghiqhalo Einstein jekucheni: Khristomi Judami chineylo tungukupu mino pikeutoi,

Jisu Khristo ighi eno palikhino akupulu chineylo ayeghiqha xakulu-u axine lono. Tighenguno hiye akimithe chiney kumutsuno hipau pulumo ayesa eno hino tokulu shimasae.

Timi kukumusu ghili pitsukeu kaku Pavlov, no yekeu loghi paye khristomi ipike, tinguno alau Karl Marx ghi, khristomino peitha chekeu likhino kuchou chiney ipike kumokessa? Niye axineno ishipusa cheni. Tipau shou theqhi kulushivenike ghenguno khristomi shivemo ayesaepi Karl Marx no shika. Tishi aye noye Marxmi papemino kishino nishou kughakutami shinikea? Hiye mutsuqhei keuno ithive, atsa kukughauye kiutsamu pimlaveno ngove.

Kichileu phuiko chiney ghenguno akipimi tsukeu azu-u ghi khristomi lakhino hitoi khochile: "Mr. Judge, noye phuikomi Simpson nguno akijeuye kumoe, paye Chloroform eno kusughu kutau kutomo phupheluke. Ike pavilo, noye kiuno kumutsu gholo phuphelu keu akijeukea pi injukelo? Pano khochile keuno ino phuphelukeu kumutsu gholo akijeuye niye axinemi, eno tiye Alhou-u kupukini vecheo likhino xalunani."

Akuxu tsuvekeu, aghashivekeu eno akupulu ghenguno panongu ji pelenike kutope khekeuye khristomi ngukula kijeke, hiye tuqhou kukuhoulo ani. Hipau missionary kumla huthu keuye Africa Albert Schweitzer lono. Kuposhu kulu hipauye aghimelono huthuno kikimiye lono kuqhakulushi zakulu-u lakhi shiani. Ayeghiqhalo khunomu panongu theqhimulae.

Tuqhou yekili lakhi lono, tuqhou kukuhou ghili, pikeu: "Ninguye khilemu khristomi akiviu shivenike ghenguno inikhu amoe, ikemu ninguye khristomi Alhou no kiu gholalo shilopikeno: Khristo toi, tiye khristomi khu-u puloniqhi-i shino Alhou-u jukuvu cross puqhenikeu."

Tighenguno Jisu no shikakeu toi khristomiye atsa kukugha-a eno mishika lau amikucho lono tuchile cheni

nikupulu phemonike ghenguno.

Pravda Vostoka, January 15, 1966 mpelono pikeu, Communismino Inoli Martia Sevciuk, vilo noye khu-uno okughapesuno khristomi shivepekea? Lino khochile: "Alhou no eno pa kukuhouqo jukivi vecheono," Kutamino iniju: Khuno nongu sakipheukea? Ninguye ayeghilo timi sakiphe qholono kumoe,"

Khristomi itimi vilo iniju: Khuno nongu shikano azu-umi kupulumi toishino akuwolo huchuikeu tie puchenikea? Itimi qono khochile: "Hiye nilikhi nipulou lono eno khunomu ningu shikamoe."

A-a hamilo azughilo avumuqo kumutsu ithulu akemu khristomi qoye panongu sakiphemi kughaluve pemonike ghenguno panolikhi panongu kutoshino baptiz shi. Khaniloye Pastor eno baptiz tsu akemi kumutsu agikuqho puve tishianguno ajulho akivishi qholupe monike ghenguno.

Uchitelskaia Gazeta, January 30, 1964 mpelo, Alhou kuha ipi kemi lakhino akukutsu tsu keu Voronim phulo. Pano atsapi ashekha shiveke mutsa kupulumi lakhino shikukauno khochile mulakepu lakhi iniju, Pano tipi, "Khileno Communismiye akikhi kuxu ghola shikalu kea? Nonguno hitoi pikulha cheni, ikemu papemo, kumusujukelo; puka kelo, eno heqhikelo?" Khikhi Bible lono akivipikeno tino Communismino mujochile. Tile akukutsu-u ye kiupimoveno ahoho tino ashekha shive eno khristomi huno tokulushive.

Tuqhou Kukuhoulo Ghime Alau Thu-u Akeu

Tuqhou kukuhoulo khristomi qoye azu-u nguno alau aghimetsu ani. Russia loye achiney kumutsu aghimetsu ani. Khristomi qoye amulo ghimepushi Communist ghakhulo Judamiqo aghime tsu akeu sutsa chilukelo. Ikemu akimiji akhotouye Tuqhou kukuhouqo ghime anike. Soviet Press, lono asutsa tsukeu kiqilo khristomi lhotache kini kughapesuno

kughuzumi kughukilo suve, ike pano muku bidiye atsala hami thi u "akighini kushuwa shikeu ghenguno thive," kughengu akighini kushuwa shikeuye pithive cheni. Panonguno kiu shianikeno kumusujulo?

Panongu lau aghime lhokusau ighikeuye hike, kughono Communismino ati anuli Khristo ghili eno atsa kivi shikakeu phulu momu chilunikeno, panongu ti-anuliye akuxu tivilo mishikano luveno khile anikeno khunomu mutha.

Athi Soviet Union no U.S.A sasuno akighithi lakukhalo jemichi shiveno, apu aza pulono ati anuli akupulu eno kikikhi kighithi tsuluni keushi kuputsave. Pimehye hipau achipu lono Russia lo peithalu nanipi xatha kemu Soviet Union Press no kiu pianikeno julo?

Sovietskaia Russia, June 4, 1963 mpelo baptiz kupulumu lakhi Innoli Makrinkowa, Liye anu tsugho ache ike Lino panongu akighithi tsukeu ghenguno akipimi Litsu eno tie tsuqhipu pemonike lakhave. Tishino panonguye Communismino sasuwuve, athi Lino panongu ghime chilukelo Lino pikeuye, "niye akupulu ghenguno imevea."

Liye Communismino panuli sauvekeu jumetsuvea, eno itehi panonguye Alhou kupaipi tughu tsuve chekeu alo ngo akhani.

Uchitelskaia Gazeta, loghishikeu athoshi nivilo pike, tiye Ignatii eno panipu pama vilo injuke; Pamano akupulu phemokeu ghenguno atsa kukughauno hitoipi, Alhou ngo onga pama khikhiu luni keno kisheluvulo? Noye Alhou-u kishelu anikeo? Apuno hitoi khochileve: "Niye khilemu ikupulu phemoe."

Paul notipi, "akumla kumtsu akivi ghenguno mla ani." Ino hitoi khristomi ti-anuli kutomo School lo suvekeulono Alhou kuhapikeu shikanikeu zuqhulo itimiqono panonguno akilono akupulu shikalukeu itimi kutami laughi vekupha luke.

Bible no tipi timi khunono Jisu nguno alau panongu tianuli kimiyeakeno pakhopemi shikuzu kumoe. Hipauye ighono akiqi kije ayikhadu kijeqolo akemilau ani. Nonguno shiju ani ado hami oti nuli launo putosuve julo tishianguno Russia lo athikuzumi khristomiyo kumusulu nani.

Niye ighumono Tuqhou kukuhoulo Protestant kupulumiqo ghili likhi piani. Ikemu panongu nguno akiviushi Orthodox kukuhou qono kili ani. Panonguye timi million shouno akughu ghime sholu ighivea. Panongu ghenguye akukuhoki kumono peitha chekeu nhemugha kiumo kuha, panongu akughukilo akemi kumutsu kumthami eno achinetomi angu agha bevekemi khu-unomu panongu gholo kuha, tinguno alau achinetomi ghi tsuqhipu kepu phimu kuha, Ampeu 'ghulhulo peitha kepu ghenguno asho eno atsaizumu kuha, akighinilo phisu kepu Bible mu kuha, hipaqo kumutsu kuhakeu zuqhulo panonguno vejoi Alhou vilo akukhu kighini shicheni eno Alhou no vejoino panongu kighini chilutsu cheni. Tishino Aghungu kumla alau-alau panongu gholo mlalu acheni. Hiye ighono akichiqhipu eno kuchou xukithe miku qu thuulu anipe. Hitoi Russia yeghilo aghungu kumla shiani.

Russia yeghilo thu-u aketoi thu-uakeu yeghiqha kutaughi ikuwolu ani. Tuqhou kukuhoulo Orthodox miqoye panongu kuxughi pesuno tsuvea. Tihutoi panonguno archbishop Yermogen, Kaluga, lono ighikeu inju? Khu-u Communist sasuno akupulu ghenguno kumujo cheno akuxu tsuvekeno.

Communismino ayeh pekeu amipe lhopungu dolo, Russiami Press lono tuqhou kukuhou kumla ghili eno ghimekeu piphekha kumla kutomo ani. Tishimu nikupuluye khilemu ithamo, amikuchoshieno alau thu-uke.

Nino, tuqhouno Rumania yeghilo apiti xusukeu Russiami suphahemi qolau. Tipau pitilono Russia yeghilo eno ayeghiqha kutau ikuwo eno athi kivi kutomo pithiluke. Ninguno

Communismi kumutsu Alhou lau saighiveni keuye ghime akemiyo kuphu keuvecheono shilu nani.

Ino niye achipipi phulu keuye tuqhou kukuhou Soviet Union lo nguno alau. China yeghiqhalo eno Communist yeghiqha kumutsulo ipeghilupe keghenguno.

Ghiche ghime dolono, khristomi kuposhukulu Jukivi ithipeni keghenguno Russia kughu kilono yekili yesu ashekhaushi yekeu hami pithilu ani.

Atughu-u yesu kuthuye Maria launo ighikeu, Lino Communismi ilimi lakhi Varia, ipi keu Khristo lau saighi.

Yesu Atughu-u

Ino kimiye chekeu,

Niye akughukilo ngo aniaphi. Ino ikimiye ketoi kutami igholo akughulo akemighi kimiye ani. Akhotono (Communist Youth League) lo akemi ilimi lakhino ivilo tipi; Niye hipau vethalu amoe, kughengu noye kiutoi kemi totimi keno. Hile akughukilo itimi kumutsuno otha ophimo akeghi noye panongu kumutsu kimiyeke. Ino hitoi khochile; Alhou launo shikalu keuye timi kumutsu kimiyelo pike. Nikusami likhi kumono nighumighi kimiyelo pike. Azu-u ilimi hipauno kumuza kumoshi akupuna itsu akemu niye tamono Li ghenguno akighini shiake kutami nguno alaulono.

Ike athiu Lino ivilo, tsutsala ino Li kimiyelu aghiaye ipikelo niye Likhaluve, tishino Li nikujo qa-auve. Itehi Linikujoye kumutsa akighini shilu ani. Kimiyeno Li ghenguno akighini shitsulo. Lijeye Varia ke.

Nono ithiani, aghoshi Alhou thachekemi kumutsu panongu mlo loye eno tuqhouye Alhou avehupu shiani. Timi hipauye aghungulo ighono muamuzu ani eno alau ithinishi ani. Alhou kuha ipichekeu alono.

Khristo Iono Achepu
Kishiu
MARIA.

Yesu Akiniu

Ino kimiye chekeu,

Ino, atughu-u yesulo Alhou pulumo kemi ilimi lakhi ghili yetsukeu itaghi keyishi ovili piluani. Ighono alokivi kije Varia ye Khristo ikhiluvea eno timi kumutsu lau akumutoshi hipau shepeshi ani.

Liye kughono Khristo pululuveno xakulu-u lokivi ithi keno ighono amulo kusashive, kughengu Liye azu-u Alhou yekuha ipi sheshupe puanikehu. Ikemu Liye Lixine ghen-guno xakutha shiluvea.

Ghulo lakhilo Varia nikujo Communismino mlachekeu alo wuke (Hiye Alhou kuhaipikeu aloke). Panonguno aqole pheveke thikhau Varia vilo atsapilopi adotsu, Liye panongu gholoye alephemo ikemu Lino ithu puthughono aqokitikhi zulono akumutoshi Jisu shepeshi eno Likuxu shepe tsukelo timi kumutsuno iqunhei ngove. Timi khumu Liakupuna tsumo.

Tishino Lino atsapi ashekha shiveno ale kungo kivilono Khristo kimiyekeu lelakhi phe, tishino niye Khristo khu-u ighenguno thive keno pashepe shinikeu kuzo eno musaichikeu kuha. Paza kutsu eno pau cross kuka sushonike ghenguno.

Hipau thiuathiu panonguno Varia sasu wuve.

Ishiyeye May toku shiani ke ninguye Li ghili kiumo ithi eno khileani keno mutha, ikemu Alhou kukaye Ligholo ani. Akighini shilo?

Nono Kimiye chekeu

Achepu kishiu

MARIA

Yesu Akuthu-u

Ino kimiye chekeu,

Ighina August kinilo. Niye Varia sasuno akughukilono kuputsa luke imulo ighono imeve. Li ghili kumusu luno. Ike

Liye ighono itimi aphi amipe 19, likhi aphi eno akupulu kuxu loghi Liye ighono akughunushi aphi. Tishimu Liye ighono Jisu khristo kimiye eno ghiche ghime kumutsu puluke.

Liye ighono muzuthi akeu ghenguno nino akughukilo anhemugha hami Litsupuwuke. Ikemu ighono aghulo likhi ithulu eno akivi thaqhuye ithumlave.

Ino ighina ithulu keukujulo, Liye ighono kitila eno phalalai vea, ighono heqhikeu ghimekije ani, Li nhethilo Alhou jukuvu eno hipau yeghilo nguno kutau lokivi ithulu akeu kumoaye.

Iye, ikusau; khuno Jisu Khristo launo akumuzapu lokivi pujushiju miphikeno hipau ithini chemoe. Ikemu kiutoi alokivikea. Timi khunono Alhou-u lokughuno hipau anikeno. Ningu Khristo laumiye aghime jeli eno amulo shikighichi keujeli kiunomu ningu kupulu hakhavetsu mlae.

Ike ino ayikhadu dolono inju; Varia: Noye nono kiushivekeno kumusu chilelu amokeshea? "Moe," ipi Liye ikhochileve. Ikemu tsutsala panonguno iqhaqhi pheve aye niye itaghi ipeno alaushi Khristo kikimiye ghili pi-anani. Khilemu niye imeanipi kumusutsu kevalo. Niye ampeuno ikimiye akeu ghenguno ighono ilokivishi ani eno ipulono Pajelono aghime hipau pulupeke ghenguno.

Ino oqhuinjijuni ani amulo tuqhouno akighini akiviu Lighenguno shitsulo. Ino pulu akeuye Liye Siberia lo puwuve luvike. Panonguno Lilauno thokha kumutsu suwuvetsua eno Liye aphilo kitila bepu akeu kumoaye. Liye asholokumi khumu kuha eno khunomu putsakulupu kumo, nono azu-u poisa aghulo itsukeu Lighenguno peithavea. Kimiyeno akukuphu hami Lighenguno tsupu-ulo. Lino A-a kilivekepu shiaye ino Li-tsuvenike.

Ino puluani. Alhou ye Ligholo ani, eno pano akuka

tsuno aghime kumutsu pulupe nanipi akighinishi ani. Alhou pulono Ligholo apeni.

Nono kimiye chekeu
Khristo lono
Achepukishiu
MARIA.

Yesu Abidiu

Ino kimiye chekeu
Khristo lono atsunipu,

Ikusau Maria, ashehashi yesu hipau olau yelu ani. Ninguye akivishiani. Kughengu nikuxu ghiliye pikhamlae...nino ngo akeu kughukiye aphughilono mile chighi shoulo ani.

Noghi ithi anike, ikemu ipulono ighili kitila hami olau yelupeke ghenguno. Ino Alhou shikimithi ani, kughengu Pano akuka shiaji kivi itsuno ipulono akumla shiluapeke ghenguno. Igholo apami lakhi ani. Linikujoye (Workshop) ayinhemugha kumla-alo mula anipe. Akumla hipauye ighono kushokutsu eno ikusau shi ajiye ighono alomo, Liye khilemu akumla shiluchemo; tighenguno niye ikumla shikhav-eno Likumlaghishi acheni. Ninguye atsalalo ayikihedo 12, momu 13, akumla shi cheni. Nichuqupu ghi nonguwutoi khani khani lono ithulu cheni. Tishimu hipaqonomu akhoto kumono ipulono yesu hipau otsulupeke ghenguno ilovi ani.

Ino imulolono Alhou sheqhe shikimithi ani, kughengu nono xakulu laghi ipiyeke ghenguno. Niye ikuxulo akimiji ani eno khu-u ghenguno imeanikeno ithiani. Niye ilolo xakulu ghili hipau timi kumutsu lau kusajetsunike khelhoani. Ino ilolo akeu khu-uno Alhou kikimiye lono putosuvetsuluni-kea? Akughu shikeu eno ghicheghime-nomu kumoe. Alhou no aghime nitsukeu vecheono alau-alaushi nikupulu shikumuloluke. Niye ilolo Alhou-u kupukini yeliqoleqoli ani. Pan-ongu-no akumlalo imithi, ithaqhino ipulo akumla ala mlape

kughengu ino inaqhoi vemokehu. (keupulul)

Timi kutami viloghi Alhou no ilau kiumlakeno pitsulo? Pano ipulono akuxu kitheulo lhoux kitheu shilupeke ghen-guno. Hipau thiu niye inaqhoi luve nanikeshea? moe, khilemu tishimoe! Imutsu eno ituthu shelu akekutolo niye Alhou kikimiye kije hipau timi kumutsu lau ashepe shianani.

Ninguno njalo wochekelo alaghilo khristomi chepu che-iimiyo sholu cheni. Panongu sholuno ighono amulo ighi khristomi kikimiye piye cheni. Ke ghuthu lakhi alalo wochekelo train station lo aza topumi lakhino achuqupu nitsuno atsa kini nivilopi: "Alhouye xuani."

Ike kijili lakhi ninguye ighono munuve, tighenguno ningu sasuno akughuki alou zumoikeu aloqhive. Nino tile aghikemi kumutsulau Alhou lokughuno nongu gholo alopi, kikimiye kijelono pikelo; panongu kumutsuno alokivishi khochile, Alhou-u lokughuno nongu launo ithulu-pi nivilo pikha ikemu ninguye tipaujino A-a tipau qhiveno wuve.

Iye, hiye kuchouke, kughengu nigholo kupulumi kutomo-a. Kumusu-jukelo akughumi tuxaye khristomi qoke. Ningu gholo alekiphe kivimi eno akukutsu kivimi kutomo-a. tiqhen-guno ninguno akumla shiqhiveno khaniloye aqoshi ngono akughushu Lhou sheqhe lupeke ghenguno. Niye akughuki hileno aghungulo lekungo kivi kutomo shikalu eno atsala kipetsulo patsa ala ithipeke. Ipuu mpe 19 lono Jisu punu tsala atghu-u shi ikhilu, hipau tsalaye ikuxulo khilemu kumusuma mla.

Ninguye azughi mukulo mla achenikehu Alhou no kimiyeno nitsuni, baptiz shiluvea; Oh! kiutoi alokivikea! eno tihutoi opulono igholo ivilo ngoaghipeni shiani. Maria; Ino azu-u ogholo akelo kiuna kitila likhimu mlapimikeu aghiaye Alhou zhelono ikipimi qhitsulo. Ikemu Alhou no ningu kumutsu Papulou lono qhipuani eno Pano khile ningu qhipuani keno tile akumutoshi puthugho lumosake.

Iwu petha pesuno Alhou kibolorni kumutsu lautsutsulo. Alhou no ikumughatsu aketoi akiqheu lono olau kumughakeu shipeni. Ibri 12: 1-3. Iophijulo; Akusami igholo akemi kumutsuno petha otsuani, eno akupulu shiakeuno noye azu-u nigholo akeu kupulu kumuto aghinanipi akupulu shiani.

Tinguno alau nono kutamilau yesu tsukelo NI-u petha eno nighi-li pitsulo. Alhou ogholo ani.

Khristo lono atsunipu

VARIA

Yesu Apungu-u

Khristo lono

Atsunipu,

Dear ikusau Maria, ashekhaushi ipulono adokivi ithuluno yesu hipau olauyelupeke. Ino ovili pini, ikusau Alhou-u kupu kinilono apami nikujo kinikujo ashiaji kivishi ani. Ninguye itehi hilehi ani.....panonguno hile puwuveke ghenguno hile.....ani.

Ino ighono oshikimithi ani aza kikimiyetoi ipeithake ghenguno. Nono kiu ningu ghenguno kutotsu puwokeno kumutsu ithulukha, akhotono Bible ghenguno oshikimithi ani akiqheu lono. Nono kughono nikuphu kemiqo lau yenikeno ni-u petha eno shikimithikeu tsulo.

Kughengu Alhou no Pau tuqhou thonheikeu kikimiye pephe ipiyesuvea, niye ayeghi qhalo kumutsunguno alokiviu itoi keu ye kuhakeniapi kumusu ani. Khikhi ghicheghime ino kutu-u pulu anikeno, ino kumusu keuno hiye ighenguno ighono Alhou launo Ampeuno ipulo akupulu ghenguno eno paghenguno imelupeke. Tamono ighenguno akighini shit-sulo, tishi anguno ashekha kutolo ikupulu pewotolupe kepushi.

Ampeu ogholo ani. Panõ akuka otsuno akimithe ghushi shilu apeniu. Ipami nikujono - omuma ani. Kughengu panonguno nipelo A-a kutau ngovepe keulono yesu hipau olau yelu kepu shiluke. Khilemu nighenguno amulo sakevilo;

ninguye alokivi ani, kughengu nigho akijeu eno akiviuye kungughalo anike (Math 5:1-12).

Kungugha lono kusholuni. Ashekhashi ogholo ake-mikumutsu pethatsu ani. Kungugha Lhou ogholo ani. Amen.

Khristo lono

Atsunipu,

VARIA

Yesu ashekhou kumaye Viria -- launo ighikeu. Liye Communismi Khristo pululuvekemi. Liye Communist Youth League lo kihikusumi lakhi.

Lino Khristo shepe shitsukeu ghenguno akughu ghimelo eno aghime kumlalo qhive. Athiu Li ghili kiushive keno eno khileno thivekeno kiumu muthave, ikemu Li-u kupulu jukivi eno Khristo ghenguno Aghungu lono imevekeuye kumugha keuke, hitoikeu kupulu Communismi kumutsu laushilu apenike akighinishi ani.

Akupulu mulo kumuto Tuqhou kukuhoulo akeuvecheo itehi Communist yeghiqa kikije kuthu shoulo mlalu ani.

Ino Tuqhou Kukuhou Launo Ashepe Nongu Tsulu Ani

Niye tuqhou kukuhou sutsano ikuluke. Niye Jisu phimipi sasuno kusaje akeu kukuhou qholo akuzu kumomu.

Tishi aghimu niye amipe hami tuqhou kukuhoulo mla eno saphe ighivea. Hiye Alhou no ilau mlakeu akichi lono ipulono amipe 14, akughukilono akuxu alupeke. Ampe kini akithikumoshi vekeu kuqhano. Alhou no paukimiyi ilau chopulo tsuno akughukilono ixapheluno ipulo kulolau alokughunoshi akeu kukuhoulo mlalupeke.

Ino ikusami kupulumi kihikha kumla akumolo akemi zuqhushi nongu lau piluani. Ino ikusami itehi Communist yeghilo aghasulono, akuzulono, eno tuqhouno kuposhu akemi zuqhushi nongu laupilu ani. Ino akughukilono ipeghilu keuye akichiqhipu lonoke! eno akumla kiu itsukenoipulono mulalu apekeuye igholo akemi kuxukutsu vecheonoke.

Ino Tuqhou kukuhou launo ashepe sughi akeuye hike
"Khilemu ningu qhive kevalo,"

"Khilemu ningu pheve kevalo,"

"Ningu lau yemovekeu shikevalo."

Azuta angu ningu tsulo; nipulo tipau jume tsuvetsupe kepushi.

Ino inaqhoi akeu kukuhou, tuqhou kukuhou amilitsu eno atsa piphemlakeu zuqhushi piluani. Nongu kusami kupulumi Communist yeghilo imeakemi sutsa chilu tsulo! Panonguye povenikeu momu sushopenike eno akuxu

mlaleikeu khuamoe. Ikemu panonguye aghunanu lhothemi alhokusalo ghuveakemiqo sushonike ghenguno khuani, tiye ighinikeu tiqhelilo Alhou kuhaipikeu chineylo. Panonguye Bible, Alhou tsa alau vekupha tsunike ghenguno khuani. Panonguno Bible kuha kelo ye kishino Alhou kumla shilunikea?

Tuqhou kukuhouye Doctor lakhino train lono izusu wuchekelo, train tipauye train kutau sasuno kutusuve eno timi kumuzakumo izave, hamiye thive. Ike shikipiviuno izavekeqo ithuluno, ino shikipivi nhemughaqo aghikeaye..... ino ighunanuqo aghikeaye timi kutomo akithilono xapheluni cheke. Paye ighono puloniqhi-i ani ikemu paghunanu kuha. Hiye tuqhou kukuhouno puthugho ani. Puloniqhii Communist ghenguno akuxu tsunike kutopeani. Tishimu hipaqo kumutsu kumusa mlakepu azuta-angu kuhakeloye.

Nongu alokughunoshi akemi kukuhou qono aghunanu nitsuaye, Tuqhou kukuhouno amikuchoshi, akumuto lono Alhou kumla shitsunike, Kucho Yesu, Tsaiko jeli, atsakiviu eno aghunanu nitsulo. Tishi aye kiushikepukeno nimishi-loye nino shinike.

Alokughunoshi Akeu Kukuhouye Kishino Kuphulu Nani-kea?

Alokughunoshi akeu kukuhou kumutsuno ghuthu lakhi aghola kututa lono kuphulu nani.

Alhou kuha ipiakemiqoghi timike, panonguye timi kuxulo ikighilajeli avehupushimo. Panongu ghenguye ayeghiqhalo timi kuxuye kiutoi akichiqhipu lono achenikeno kumusujumo. Hiye khristomi kumutsa cheche keulono kumono akupulu likhino. Tishiaye panonguno akiviushi ningu kuphuno kutami Khristo lausaighitsu, akuxu pesutsuno khristomi aghimetsu akemi susholu nani.

Kulolau kukuhouqono nikuphu nikeuye nighenguno

inikhutsuno Communismi qo pulono xakulu ithulupe nani. Akighiniye ighono akuka ani. Tishimu nino akighinishino thoghu-uye azu-u khilemu imemokeu ghime nitsu. Jisu Khristo no Jerusalem lo inikhuketoi, paghi akighini shiveke thiuye aghimetsuno cross lono pithive. Ikemu ado kitila thiuye panonguye panongu mlo kusashi panongu mla kukhuju puhave. Tishino atsala lakhi lono timi qhetonhe pungu xaidesusu ighilu. Akighiniye khilemu kumusa shivemo, nono kutami ghenguno inikhutsu keuye olau kukumgha kije ighi-luchenipe.

Khristo no pikeu shikupu anike ghenguno Ni eno kutami kutomono Hitler eno pau timiqo ghenguno inikhutsu ach-eni. Ino pulu ani ningu kighiniye aleghuthi nguno kaumughou lono pashou tokulushinani.

Ninguye nikusughumighi kimiyema ysake, tiye kutami nguno alau Communist miqono nikisughumike. Communismi vecheono Jisu no pikeutsa kupu anike. "Ino ighikeuye kupukuno kuxu alupenike ghenguno," Khristomiqoye hitoi kutami ghenguno kupukuno kuxu tsumla aphi.

Communismi laumlanikeulo nikumla kughuchove akeu kipimiye ningu shou ikughi nani. Tighenguno ninguno panongu kimiyemla kepu shi aghinamu panongu kimiye eno tamono akighini shitsuma ysake.

Niye kikimiye likhino Communismi kukupuna xathavetsu nanipi pulumokeuye shiamoe. Ikemu niye aghakhu lau kikimiye likhino akupuna xathavetsu nanipi ashepe tsuluamoe. Tilehi policemi kuka, atsa xakuthami, alhokusami muqoqo eno akughushi akeqo kumutsuno ithaipeghi mokeloye Pastor miqo likhiye kiumu shimula.

Tinguno alau xukuami kupulumi kumutsuno akiviu pesuno Communismi qo Khristo lau saighinike ghenguno mlamo ayesae. Panonguno kiukiu xine kumla, amikuchomi kutomo pithipuaghi pinamu muthakeu kipimiye qhivetsu chenike, vethakulu lono panongu ghenguno akighini shitsulo.

Bible, Atsakiviu Itehi Avehupushi Ani

Akiniuye, alokughunoshi akeu kukuhouqono kuphulu nikeuye Bible tsupuwukeu lono. Nonguno nongu kusami kupulumiqo lau Bible tsupuwu nikeuye alaghi kutomo ani. Kughengu nighi ino Rommania lo ngoakelo kiumo kutusu mono Bible kutomo ithuluke, panongughi itehi Bible avehupushi ani.

Ighono thu-u vekeu yeghiqha eno Russia yeghilo khris-tomi qhetonhe shouno amipe muku lono lhopungu dolo Bible eno atsakiviu kiutoikeno ithumla kemiaphi.

Ghulo lakhilo aphulomi kini iqhono munamughaishi aphulono ighi. Panonguye susutsala thaqhu aqeqeno Bible lakhi qhu. Kughengu ino Bible American lono ithuluche keu panonguno ithiakehu ivilo qhuniyeno ighike. Ike panonguno qelukeu pesuno qhuniyeno ighi ikemu ino poisa lutsumoke ghenguno alokivishi pesuno aphulo wove. Atsala hami thiu yesu lakhi ithulu, ighono alokivi kijelono! ishikimithiqhi Kuchou Yesu panongu tsukeu ghenguno. Yesu hipauye aphu shighino jemichi shipuaghi, ike tiye pano dolo Bible ghakutha shighi shino phikijekeu shiaghi.

Hiye ighono akumuza kepu Russialo Bible apa lakhilo timi kutomono phikije akeughenguno, tinguno alau hamiye Bible lakhi pesuno alokivishi Amishi ngo Ane nokili, ino chilukeu timi lakhiye Bible ghenguno kulakupu nguthi jekimijeno qhuluipi. Highi Kuchou Yesu akitheu (N.T) Nino ngo akeu qhalo anuli qoye khilemu X-mass Card ithumla aphi kehu itimi lakhino ithulu aye itimi kumutsuno tipau suhupeno kichimi lakhipelono tipau ghili, Jisu punu ghili, Akimthe Liu Meria ghili eno xakulu-u ghili, pitsuchenipe. Hinguno alau panonguye Bible, atsa kivi jeli eno tsaiko jeli avehupushi ani. Eno hiye noghi kiuana hamiye kuphukulupu laghiani.

Akuthu-uye ninguno tsaiko jeli tsughupheno Commu-

nist yeghilo lhothemi Alhou kuhakeu kighithilo shikughuzu akeu khochilelu nani. Akhotono Kindergarden College lo kiphimi. Communist kaku lakhi mlapuanu tiye (The Atheist's Guidebook) hino panongu ghenguno Alhou kuhaipikeu Bible shiani, eno hipaulo kiphimiyo shika ani. Hipautughami kumla kighithi lono kichimi shivekelo aqholo Alhou pulumokeu eno kuhaipi khutive cheni. Tishimu khristomi yeghiqhalo khunomu hipau khochile tsuchemo. Tighenguno ino piakeuye hipau khochilekepu kaku jeli tsughupheno Alhou kuha ipi akighithi tsuchekeu khochilekepu. Kughengu tuqhou kukuhouye tsaiko jeli tsughuphemla kughengu panonguye awu athikhauno tsughapuatsu anikehu.

Abidiu kuphu lunikeuye, "Kumutsa kutubo kuqhano mlakeuno," tiye hekimiye eno akukuphu jeli tsuno tsavipe kumla kutami lau eno lakhino lakhilau mlalunani. Hipa doloye panongu kumtsu tsughape puani, tishino iqhoiqi mlano ani, eno kuputsa kileni keughi alano ighono kushozu-u Pastormi akughulono ipeghi kimiyoqghi Alhou tsakiviu ghenguno eno puhapuakeu ghungu ghenguno ighono amulo minheani ikemu panonguye Alhou tsapesuno A-a lakhi lono lakhilo piwu kulupushimla. Panonguye aqhilo jumekiumo kuha eno aghulo likhi.

Apungu-u ye aleboqo lono atsakiviu pikulha kepu, kughengu Communist mishika ye aleboqolono timi million shouno asutsa pikulhakeu chilu anipeke.

Hipau ghenguno ahukikhaye khaqhivetsua eno hipau kiqilono mla wove nani. Tighenguno Tuqhou kukuhouye hipau kumla huthunike kutoani, okukuphu avehupushi ani.

Kupulumi Pithivekemi Kibolo Vekusa

Ninguye kupulumi pithivekemi kibolomiqo kuphumoaye sa-ani. Akibo qhethonhe chighi shouno avekusashi ani. Kughengu kughono tuqhou kukuhoulo timi lakhi kughalovenikeno akibolomi qoye ighono avekusa kuxu shive cheni, eno panongu kuphunikeuye ayezah khilemu kuha. Akibolo anipu eno ati-anuli imevekeuno pano pulou. Kughengu apuye akughukilono thiveani kemu pakiboye akuxu tivilo ameauve cheni. Ino mutsuqheino nongu vilo piluani, tsutsala alokughunoshi akeu kukuhouno akukuphu ikibolomiqo tsumonapi aye niye khilemu akuxu achilishi aghino kaku hipau yelunichemoke.

Hipau dologhi Russia yeghilo khristomi aqhalono kughakeu doshi ani. Tishino timi kutomono akumolo wuvekeu lono akibolomi qo pulono akuxu ighono avekusalo avepe-ani. Ninguye Indiami eno Africanmi puqumiye keughenguno kuphulu aketoi Communismi yeghilo khristomi akupulu ghenguno thive eno imeakemi kuphukepu akumla kije ningu gizulo ani.

Ino akughulono ipeghikelo akhotono Europemi Mission no akukuphu kije pesuno imeakemi khristomiqo tsukeuno kupulumi kutomo xaqheluke. Hiye kimighi kutsu aghulo nono akukuphutsu akeulo. Ino tuqhou kukuhou akuxu achilishi aghikemi eno pokalu kemi zuqhushi asutsa hipau nongu pithilu ani, tiye akichiqhipu lono ningu kuxu xaphetsuno akuxu achilishi aghipeke ghenguno.

Ino itehi kumusulu akeu, kughono akughukilo akelo ipukhulo hetsukeno; imulolo eno ikichino qaipegghi. Kushiye akichino qakea? Paye hemomu. Kughengu pama kinikujo aphimipi lakhilo anike ghenguno. Tihutoi nongu Khristomi ashou akemighi Tuqhou kukuhou sasuno aphimipi lakhike khunoqo Communist ghimelo anikeno.

Noye ningu ghime pulu nanima?

Kughengu Ni-mpeu Jisu Khristo no aghimeshi Gethsemane ghutulo akighini shiakeno , Peter, Jakob eno Johan panonguye panongu sakipheu akhotou kuhavepi ithiapulaghino “panonguye akuzu kuthoshi zuauveke.” Pastor sasu kuputsano ojelono kiu okusami imeakemi ghenguno tsulu nanikeno, eno kiu mlatsulu nanikeno oputsajulo.

Itehiye zuakeu ghuloki kumoveake, ithuvelo? zuakeulono. Tishino nokusami khristomiqo tuqhou kukuhoulo akupulu ghushilo kutubotsulo?

“Ningu kumusulutsulo!”

“Ningu kuphu tsulo?”

“Ningu qhivekevalo?”

Asutsa hipauye ino Communist yeghilo, tuqhou kukuhoulo kupulumi qojelono tsuluani.

* * *

The Author welcomes correspondence at the following address.

Evangelist Dr. P.P. Job

Post Box 4532, New Delhi-110 016, India.

**Communist ki jail da chahi tara mari
awaba khangkhibagi masada
dakpham leiraba Richard Wurmbrand
na christian ichil inao chama
chamagi namthaba ngamlaroidaba
thouna amasung thajaba adugi
sakhi oikhi.**

**Makhoigi nungsiraba kayadagi
khaidoktuna masa adu itoi toina
phubikhraba adubu thawaidadi
soktaba makhoi sing aduna pukning
hanthaba leitana makhoigi christian
gi thajabada lengdana leikhi.**